

## Lucas Ñotsse Condase'cho Jesucristone

### *Chigambian'cho*

<sup>1-3</sup> In'jan'cho Teófilo: Majan a'i tseyi me'ttia'ye Jesús'ccu can'jemba osha'choma attepa va ñotsse condase'choma inginga conda'fa. Tsain'bio a'i pañamba pa'ccoma tansintsse tevaen'fa. Ña'qqe bo'tssingae osha'choma ñotsse atesupa ja'ño asi'ttaemba gi in'jan tansintsse quenga tevañe. <sup>4</sup> Qquen tevaensi qui tansintsse que osha'chove paña'choma atesuya.

### *Juanma isuya'chone condase'cho*

<sup>5</sup> Tayopi Herodes Judea ande na'suite Chigama afa'su Zacaríasja can'jen. Tisei'ccu fae'ngae Chigama afaye semasundeccuja Abiasundeccu tsu. Zacarías pushe'qqe Chigama afa'su Aarón aindeccu'su pushesu tsu. Tise iniseja Elisabet. <sup>6</sup> Tsendeccuja Chigave in'jamba ño'a'fa. Pa'cco Chiga manda'choma ñotsse pañamba shaca mecho canse'fa. <sup>7</sup> Elisabetja du'shuve isumbe'yi coenza ccasheve da. Zacarías'qqe ccashe'ye.

<sup>8</sup> Tseyi tise Abiasundeccu Chiga ettini semajeinte Zacarías'qqe Chigama afa'suve sema'jen. <sup>9</sup> Chigama afasundeccu in'janquia'caen quini'ccocho'ccoma att-ufaen'fa majan Chiga ettinga ca'nimba ñome'bama oque oraña'chove atesuye. Tsequi a'ta tsu quini'ccoja canjaen Zacarías ca'niña'chove. <sup>10</sup> Zacarías ca'nimba ñome'bama oque oraen'jen'ni poi'cco a'i tsotefanga ccutsupa Chigama in'ajan'jen'fa. <sup>11</sup> Tsa'caen Zacarías tisuyi ca'nisi Chigama sefacconi'su shondo'suja tisenga attian ñome'bama oque'je'chombe tansinfani ccutsupa.

<sup>12</sup> Zacaríasja tise ma atepa asi'ttaemba dyo. <sup>13</sup> Tsa'ma Chigama sefacconi'su shondo'suja tise ma su:

—Dyojama Zacarías. Tayo tsu Chiga Quitsaja que ña-jan'choma paña. Que pushe Elisabetja tsandie du'shuve tsu isuya. Tise ma qui inisian'faya Juanme. <sup>14</sup> Que'i qui avujatssi'faya. Tise ma isusi tsain'bio a'i'qqe avujatssi'faya. <sup>15</sup> Nane Tiseja Na'su Chiga joccapitssia a'iya tsu. Osha'cho ccusianqqe'suma tiseja cu'iya'bi. Tsa'ma toya isumbi'te tsu Chiga Qquendya'pa tise nga ca'nimba in'jaeña. <sup>16</sup> Du'shuja coenzave dapa tsu tsain'bio is-raendecuma in'jaeña cuintsu Chiga Quitsama tise'pa Na'suve tta'tta'faye. <sup>17</sup> Tiseja Na'suma o'tie tsu jiya. Tayopi'su Chiga Aya'fama afa'su Elías injama'choma an'bianqquia'caen tise'qqe osha'choma oshaya. Tiseja aindecuma in'jaeña cuintsu yayandeccu tise'pa dushundecuma in'jan'faye; cuintsu egae tsinconsundeccu'qqe ño'a a'i in'jan'chove ttatta'faye. Tsa'caen aindecuma in'jaensi tise'paja Na'suma shondo'faya.

<sup>18</sup> Tsa'ma Zacaríasja Chigama shondo'suma su:

—¿Ma'caen gi in'jaña que su'choja tansintssia've? Ña-jan coenza ccashe'ye. Ña pushe'qqe coenza ccashe.

<sup>19</sup> Tsa'caen ñajampañasi Chigama sefacconi'su shondo'suja su:

—Ña gi Gabriel. Ña gi Chiga can'jeni ccutsu'cho. Tiseja ñama moen va ñotsse condase'choma quenga condaseye. <sup>20</sup> Tsa'ma ¡que canjan! Ña suqquia'caen tsu ñoa'me tsoña. Tsa'ma queja ña su'choma in'jambipa qui ayafambie dapa can'jeña que pushe du'shuma isuya'ngae.

<sup>21</sup> Tsa'caen condase'je'ni aindecuja tsotefani Zacaríasve ro'ndá can'jen'fa. Junde sombombisi asi'ttaen'fa. <sup>22</sup> Tsa'caen asi'ttaen'jen'fani Zacaríasja sombopa afaye oshambipa tise tivei'ccu canjan'jaen.

Tsa'caen afaye oshambisi poiya'cco a'i in'jan'fa tise Chiga ettini can'jemba sefacconi'su attian'choma atte'chove.

<sup>23</sup> Tsomba Zacarías Chiga ettini sema'jen'choma nanimba tise tsaoni ja. <sup>24</sup> Omboe tise pushe Elisabet surie dapa cinco ccovuve tsaoni can'jen. Can'jemba qqen in'jan: <sup>25</sup> “Ñajan du'shu mechopa ansangé can'jen. Tsa'ma Na'su Chiga ñama in'jamba ñama ñotsse tson cuintsu cca'i ñama afambe can'faye.”

*Jesúsma isuya'chone condase'cho*

<sup>26</sup> Seis ccovu pasasi Chigaja Tisema sefacconi'su shondo'su Gabrielma mandamoen Galilea ande'su Nasaret canqqueni. <sup>27</sup> Mandasi ja, chu'a pushesu, Maríanga condaye. Tsaja, toya tsandiem aatesumbi'choa. Tsa'ma fae tsandie, José, tisema pusheye tayo ñajan. Joséja tayopi'su israe Na'su David a'i. <sup>28</sup> Gabrielja jipa Maríama ttu'sepa su:

—¡María! Que qui Chiga in'jan'cho. Chigaja quei'ccu can'jen.

<sup>29</sup> Tsama pañamba Maríaja injama'choni dyo. Jongoesie tsa'caen chigambian'chove atesumbipa asi'ttaen. <sup>30</sup> Tsa'caen dyosi Chigama sefacconi'su shondo'suja ti'tsse condase:

—Dyombe canjan, María. Chigaja ñoa'me quema ñotsse in'jan. <sup>31</sup> Surie dapa qui tsandie du'shuve isuya. Tisema qui inisiaña Jesúsve. <sup>32</sup> Tise tsu joccapitssiaya. “Joccapitssia Chigambe Dutssi'ye” qqen tsu poiya'cco tisema afa'faya. Nane Tayopi'su Na'su Davidnga mandaye antteqquia'caen Na'su Chigaja tisenga'qqe antteya cuintsu na'suve dapa mandaye. <sup>33</sup> Tsangae tsu tiseja israe aindeccuma manda'jeya. Tise na'suve da'choja minga'ni'qqe pasaya'bi tsu.

<sup>34</sup> Tsama pañamba Maríaja su:

—¿Ma'caen tsu tsa'caen tsoña ñajan tsa'ndu mechoa-majan?

<sup>35</sup> Tsa'ma Chigama sefacconi'su shondo'suja su:

—Chigaja osha'choma joccapitssiapa osha'choma oshacho. Chiga Qquendya'pa quenga ca'nisi Joccapitssia Chigaja quema oppoeña. Tsa'caen oppoensi que du'shuja ñoa'me egave mechosi tsu Chiga Dutssi'ye qquen su'faya. <sup>36</sup> Toya'caen que antian coenza Elisabet ccasheve dajipa surie da. Tsa du'shuve mechoa qquen su'cho tsu ja'ñojan surie dapa seis ccovuve can'jen. <sup>37</sup> Nane Chigaja osha'choma oshacho.

<sup>38</sup> Tsonsi Maríaja su:

—Dasu'. Ña gi Na'su Chigama shondo'su pushesu. Cuintsu Tiseja que suqquia'caen ñanga tsonjan.

Tsa'caen susi Chigama sefacconi'su shondo'suja ja.

### *María Elisabetma can'su ja'cho*

<sup>39</sup> Tsonsi Maríaja ñoñamba Judea ande'su ccotta'cco'su canqqueni pasia'su ja. <sup>40</sup> Japa Zacarías tsa'onga ca'nimba Elisabetma chigambian. <sup>41</sup> María chigambian'choma Elisabet pañasi tise du'shuja ttopa'ye quia'me oya. Tse'faei'ccuyi Chiga Qquendya'pa in'jaensi <sup>42</sup> Elisabetja quia'me afapa su:

—Quema tsu Chigaja poiya'cco pushesuma ti'tsse'tsse injancho. Que du'shuma'qqe tsu ñoa'me injancho. <sup>43</sup> Ña na'su chan ñama can'su jisi gi ñoa'me avuja. <sup>44</sup> Nane que chigambian'choma ña pañasi tsu tse'faei'ccuyi ña du'shu'qqe avujapa ña ttopa'ye quia'me oya. <sup>45</sup> Chigaja Tise su'choma ñoa'me tsoña. Tsama pañamba in'jamba qui ñoa'me avujatssiya.

<sup>46</sup> Tsonsi Maríaja su:

—Ña injama'choi'ccu gi Na'su Chigama ñotsse afa.

47 Chiga ñama ccushaen'su can'jensi tsu ña qquendya'pa'qqe avujatssi.

48 Ña gi utu'cco Chigama shondo'su. Tsa'ma Chigaja ñama attepa ñotsse in'jan.

Tsa'cansi poiyi'cco a'i tsu ja'ño, jai'ngae'qqe conda'faya ma'caen Chiga ñama ñotsse in'jan'choma.

49 Tiseja Joccapitssiapa ñama ñotsse tson.

Tise inise tsu Ño'a.

50 Poiyi'cco majan Tise've in'jamba canse'nijan tsendecuma tsu mendeyeya.

51 A'i quin'an tisu tivema canjaenquia'caen Chigaja osha'choma oshapa canjaen.

Aindeccu “Ña gi ño'a” qqen in'jan'ni'qqe Chigaja tise'pama joqqitssian maña.

52 Tiseja Nasundeccuma joqqitssiamba bove'ccondeqquiama tsu ti'tsse'tssia've tson.

53 Qquipoe'sundeccuma o'fianquia'caen ñotssiam afe.

Tsa'ma osha'choma an'biansundeccumajan me'ccoeyi maña.

54 Israendeccuja Tisema shondosundeccusi Chigaja tise'pama fuite.

Tayopi suqquia'caen tise'pamajan anttembe'yi tsangae mendeye'je.

55 Tsa'caen Chigaja ingi tayopi'su coenzandeccuma conda. Nane Abraham, tise dushundeccuma'qqe tsa'caen fuit-eye conda.

56 Maríaja tsa'caen Chigama ñotsse afapa tres ccovuve Elisabeti'ccu can'jemba toequi tise tsaoni ja.

### *Juanma isu'cho*

57 Elisabet du'shuma isuya'cho napisi tsandie du'shuve isu. 58 Pporotsse can'jensundeccu, antiandeccu'qqe Chiga tisema ñotsse tson'choma pañamba fae'ngae avuja'fa. 59 Ocho a'ta pasasi israendeccu in'janqquia'caen

du'shumbe ttonoma chhiyitevaeñe poiyyi'cco a'i bo'fa. Bopa du'shuma tise yaya inisingae Zacaríasve inisiañe in'jan'fa. <sup>60</sup> Tsa'ma chan tsu su:

—Me'i. Tsa'cambi. Juanme tsu inisiaña'cho.

<sup>61</sup> Tsonsi tisema su'fa:

—Tsa'ma me'i'on tsu que antian tsesu iniseve.

<sup>62</sup> Tsomba du'shumbe yaya Zacaríasma ñajampañañe in'jamba tivei'ccu canjan'jen'fa cuintsu du'shuma jongoesuve inisiaña'choma condaye. <sup>63</sup> Tsonsi Zacaríasja canjan'jen'choma in'jamba canjan'jen cuintsu tisenga tevaenqque'suma afe'faye. Isupa tevaen: “Tise iniseja Juan.” Qquen tevaensi poiyyi'cco a'i asi'ttaemba can'boen'fa. <sup>64</sup> Tse'faei'ccuyi Zacaríasja ccase afaye oshapa Chigama ñotsse afa. <sup>65</sup> Tsonsi pporotsse can'jensundeccuja dyopa can'boen'fa. Tsa'caen tson'chone tsain'bitsse condasecco'fa. Nane pa'cco ccotta'cco'su Judea ande'ye tsa'caen tson'chone condasecco'fa. <sup>66</sup> Poiyyi'cco majan tsane pañamba injama'choni in'jamba su'fa:

—¿Micoña tsu va du'shuja?

Chigaja ñoa'me tisema in'jamba fuitepa angacan.

### *Zacarías settapoen'cho*

<sup>67</sup> Chiga Qquendya'pa tisenga ca'nisi du'shumbe yaya, Zacaríasja, Chiga in'jaensi afa'choma afa:

<sup>68</sup> “Ñotssi tsu israe Na'su Chiga Quitsa.

Tise aindeccuma can'su jipa ccushaemba Tiseja ñotssi.

<sup>69</sup> Tisema shondo'su David omba'su dutssiyendeccu'su quin'an ccushaen'suma ttu'sepa inginga moen.

<sup>70</sup> Tayopi Chiga Tisema afasundeccuma in'jaensi tise'paja ingi ccushaya'chone afa'fa.

71 Ingima iyiccayesundeccu'ye, ingima  
chi'gasundeccuye'qqe Chigaja ingima  
ccushaeña.

72 Ingi tayopi'su coenzandecuma mende'yeya qqen  
su'chopa tsu tsa'caen tsoña.

73 Nane Chigaja Abrahami'ccu condasepa ñoa'me  
tsoña'choma tansintsse conda.

74 Ma'caen ingija ingima iyiccayesundeccu'ye ccushapa  
tisema dyombi'tsse shondo can'faya'choma.

75 Tisema shondocamba gi ño'ame dapa tsangae egae  
tsincombe'yi tisei'ccu can'jen'faya.

76 Que, ña du'shuja, Sefacconi'su Chigama afa'su qui.  
Tsa'cansi tsu poiya'cco a'i su'faya:

‘Na'suma o'tie japa tsu Tise jiya'chove ñoñaña.’

77 Egae tsincon'choma joqqitssiaña'chone tsu poiya'cco  
a'inga condaya cuintu atesu'faye tsa'caen Chiga  
a'ima ccushaeña'choma.

78 Chiga Quitsa ñoa'me ingima mende'yepa tsa'caen  
tsoña.

Nane a'ta a'ta'quua'caen Chiga sefacconi ingima attiaña.

79 Tsa'caen tsu paya'chondeccunga attiaña cuintu tise'pa  
sinttia'ni can'jen'choma catipa a'tatssianga  
ji'faye.

Inginga'qqe attiaña cuintu

ingi'qqe Tise've in'jamba cansepa  
dyombi'tsse opatsse canse'faye.”

Tsa'caen tsu Zacaríasja Chigama ñotsse afa.

<sup>80</sup> Du'shu Juan Chigave in'jamba coen. Tayo coemba a'i  
menia japa bo'tsse tseni can'jen. Nane tise israendecuma  
candusiaña'cho napiya'ngae tseni ro'ndá can'jen.

## 2

*Jesúsma isu'cho*  
(Mt 1.18-25)

<sup>1</sup> Ande na'su Agosto na'suite tiseja manda poi ande'su a'ima agattoye. <sup>2</sup> Me'ttia'ye tsa'caen agattoye mandasi Cirenio tsu Siria ande'su governoror. <sup>3</sup> Poiyi'cco tsu tise a'i canqueni ja'faya'cho tseni tise'pa inisema tevaensi cuintsu agatto'faye. <sup>4</sup> Tsa'cansi Joséja Galilea ande'su Nasaret canquene sombopa Judea andeni ja. Joséja David a'ipa Judeani japa Belén canqueni ja. Tsa canqqe tsu tayopi'su Na'su Davidma isu'cho canqqe. <sup>5</sup> Nane tise pushe Maríai'ccu tseni tise'pa inisema tevaeñe ja'fa. Maríaja tayo suri. <sup>6</sup> Tsa'cansi toya Beléni can'jen'ni tayo tsu María du'shuma isuya'cho napi. <sup>7</sup> A'i ana'jen'cho tsa'o panshaen on'basi vaura ettini can'jemba Maríaja tseni tise aishe tsandie du'shuma isu. Isupa sarupai'ccu findipa vaura an'jen'cho cafonga ppiña.

*Chigama sefacconi'su shondosundeccu attian'fa'cho*

<sup>8</sup> Beléni pporotsse tsu can'jen'fa oveja coirasundeccu. Cose potreroni can'jen'fa tise'pa ovejama coiraye. <sup>9</sup> Tse'faei'ccuyi Na'su Chigama sefacconi'su shondo'su tise'panga attian. Attiansi na'su Chiga a'tatssiaja tise'panga chanjun. Tsa'caen chanjuni ñoa'me dyo'fa. <sup>10</sup> Tsa'ma Chigama sefacconi'su shondo'suja su:

—Dyo'fajama. Ñotsse condase'choma condaye gi ji. Poiyi'cco a'i tsu vama pañamba avujatssi'faya. <sup>11</sup> Ja'ño a'ta tsu David canqueni que'ima ccushaen'suve isu. Tsaja Na'su Cristo tsu. <sup>12</sup> Nane ña su'cho du'shumanda qui atte'faya sarupai'ccu findipa vaura an'jen'cho cafonga ppiña'choma.

<sup>13</sup> Tise tsa'caen su'je'ni tse'faei'ccuyi tsain'bio Chigama sefacconi'su shondosundeccu tisei'ccu fae'ngae attian'fa. Tsa'caen attiamba Chigama ñotsse afapa su'fa:

<sup>14</sup> Sefacconi'su Chigaja ñoa'me ñotssia tsu.



Va ande'su aindeccuma ñotsse in'jamba Chigaja in'jan cuintsu poiya'cco a'i tisupapora ñotsse in'jamba opatsse canse'faye.

<sup>15</sup> Tsa'caen afa nanimba poiya'cco Chigama sefacconi'su shondosundeccu ja'fasi oveja coirasundeccu tisupapora'ccu condasecco'fa:

—Jinge Beléni jaye. Na'su Chiga va ñotsse tson'choma inginga condase'choma japa atteye.

<sup>16</sup> Cunshoa'me japa Maríama, Joséma'qqe cachui'fa. Tsomba du'shuma'qqe atte'fa, vaura an'jen'cho cafonga ppiña'choma. <sup>17</sup> Du'shuma attepa du'shune tise'panga condase'choma condase'fa. <sup>18</sup> Oveja coirasundeccu tsa'caen condase'fasi poiya'cco pañasundeccu asi'ttaemba can'boen'fa. <sup>19</sup> Tsa'ma Maríaja osha'choma in'jamba injama'choni asi'ttaén can'jen. <sup>20</sup> Tsomba ovejama coirasundeccu toequi japa Chigama ñotsse afa'fa. Nane Chigama sefacconi'su shondo'su ma'caen conda'choma tayo pañamba tsa'caen attepa Chigama avujatsse afa'fa.

### *Jesúsma Chiganga afe'fa'cho*

<sup>21</sup> Ocho a'ta pasasi du'shumbe ttonoma chhiyitevaemba tisema inisian'fa Jesúsve. Tsa'caen tsu Chigama sefacconi'su shondo'suja tayoe conda María toya surimbi'te.

<sup>22</sup> Moisés manda'cho mandaqquia'caen pushesu asetupa onjoña'chone napisi Maríaja onjon. Onjomba du'shu Jesúsma Jerusaléni anga'fa tisema Chiganga afeye.

<sup>23</sup> (Na'su Chiga manda'cho tsu su: Majan aisheve isu'cho tsandie du'shumajan tsama Chigaja in'jan Tise'beve.)

<sup>24</sup> Toya'caen Na'su Chiga manda'cho tsu manda dos ppuppuju'choma, tsambi'ta dos manambema Chiganga afeye. Tsa'caen manda'chosi María, José tsama afeye ji'fa.

<sup>25</sup> Tsaité Jerusaléni fae tsandie can'jen, tise inise Simeón. Tiseja ño'amba Chigama ñoa'me in'jan. Chiga

Qquendya'pa tisei'ccu can'jensi tiseja israendecuma ccushaëña'chove ronda'je. <sup>26</sup> Toya'caen Chiga Qquendya'pa tisema in'jaemba conda, tiseja toya pambi'te Na'su Chigambe Cristoma atteya. <sup>27</sup> Tsa'caen condapa in'jaensi Chiga ettini ja. Tseni japa can'jen'ni María, Joséi'ccu du'shu Jesúsma i'fa manda'cho suqquia'caen tisema tsoñe. <sup>28</sup> Tsa'caen i'fasi attepa Simeónjan du'shuma opipa Chigama ñotsse afapa qqen su:

<sup>29</sup> Na'su, ja'ñonda gi avujatsse paya.

Que suqquia'caen <sup>30</sup> gi Que ccushaen'suma tayo atte.

<sup>31</sup> Queja poiya'cco a'inga tisema moen cuintsu attepa in'jan'faye.

<sup>32</sup> Nane tiseja israembindeqquianga attiansi tsendeccu'qqe queve in'jan'faya.

Tise'qqe israendeccu'susi israendeccuja ti'tsse'tssia've dapa avujatssi'faya.

<sup>33</sup> Simeón tsa'caen susi José, María pañamba can'boen ccutsu'fa. <sup>34</sup> Tsonsi Simeón tise'pama ñotsse afapa du'shumbe chan Maríama su:

—¡Que canjan! Va du'shuve in'jambi'ta tsain'bio israendeccu tsu qqe'faya. Tsa'ma cca'indeccuja tise've in'jamba ti'tsse'tssia've dapa tsu avuja'faya. Aindeccu tisema afase'fasi <sup>35</sup> qui dansan'choi'ccu que injama'choma quiccu'fa'ma'caen injama'cho tsosipie ñombi'yeya. Nane tsain'bio a'i tsu tise'pa injama'cho tsosipie in'jan'choma tsa'caen poiya'cconga canjaen'faya.

<sup>36-37</sup> Toya'caen Chiga Aya'fama afa'su pushesuja Chiga ettini can'jen. Aser aindeccu'su Fanuel onque'nge tsu. Tise iniseja Ana. Tiseja ñoa'me ccashe, ochenta y cuatro canqqe'fave tsu an'bian. Tseyi coemba tsa'ndupa siete canqqe'fave can'jensi tise tsa'nduja pa. Tsa'caen pan'jaemba ja'ñojan Chiga ettini can'jen. Ni

sombombi. Tsa'ma a'ta, cose'qqe tseni can'jamba Chigama iñajan'jen. Maqui a'taja ambe'yi Chigama iñaján canse. <sup>38</sup> Simeón toya José, Maríai'ccu condase'je'ni Ana'qqe jipa cachui. Cachuiipa du'shuma attepa Chigama ñotsse afapa du'shu Jesúsne Jerusalensundeccunga condaseye ashaen. Condasesi majan Chiga ccushaëña'chove ronda'je'chondecu ja ñotsse paña'fa.

### *Toequi Nasaretni ja'cho*

<sup>39</sup> Tsonsi pa'ccoma Na'su Chiga manda'cho mandaquia'caen tsomba María, José, du'shui'ccu toequi Galileani ja'fa. Tise'pa Nasaret canqueni japa can'jen'fa. <sup>40</sup> Du'shu Jesús coenjimba quinsetssia've da. Chiga tisema ñotsse in'jansi osha'choma atesupa in'jan.

### *Jesús chuite Chiga ettini ja'cho*

<sup>41</sup> Jesús chan, tisema coëña'su yaya'qqe poi can'qqe'fa Jerusaléni jaye atesu'fa Chiga panshaen'cho in'jienge'cho fiestama panshaëne. <sup>42</sup> Jesús doce can'qqe'fave napiansi ccase tise'pa in'janquia'caen fiestani jayipa Jesúsma'qqe anga'fa. <sup>43</sup> Fiestama panshaemba toequi Galileani jayi'fasi Jesúsja toe Jerusaléni shanda. Tsa'caen shandasi tise chan, tise yaya'qqe atesumbe'yi tsu jaja'fa. <sup>44</sup> Jesúsja tayo tise amigondeccui'ccu ja qquen in'jamba jaja'fa. Tsa'caen in'jamba fae a'ta já cosepa tise've ttatta'fa. Antiandeccu, amigondeccuni japa ttatta'ma attembi. <sup>45</sup> Attembipa toequi Jerusaléni ttattaye ja'fa.

<sup>46</sup> Tsa'caen toequi japa tres a'ta tta'ttá jacamba tisema atte Chiga ettini Chiga manda'choma atesiansundeccui'ccu condasé dyai'choma. Nane atesiansundeccu su'choma pañamba osha'chove iñajampaña'jen. <sup>47</sup> Jesúsja osha'choma in'jamba tsa'caen condasesi poi'cco majan tisema pañasundeccu can'boen'fa. <sup>48</sup> Tsa'caen tson'jen'ni

Jesús chan, tise yaya'qqe tisema atepa can'boen ccut-supu Jesús chanjan su:

—Jaricho, ¿jongoesie qui ingima a'tu maña? Tsa'caen que a'tu mañasi ingija ñoa'me ñombi'yepa tta'ttá vana'jen'fa.

<sup>49</sup> Tsa'ma Jesús tise'pama su:

—¿Jongoesie qui ñame ttatta'je'fa? ¿In'jan'fambi ti qui ñajan ña Quitsa tsaoni can'jemba semaña'cho?

<sup>50</sup> Tsa'ma tsa'caen susi tise su'choma ñotsse paña'ma in'jan'fambi.

<sup>51</sup> Tsa'caen supu Jesúsja tise'pai'ccu Nasaretni ja. Tseni japa tise'pama ñotsse pañamba canse. Toya'caen Jesús chanjan osha'choma in'jamba tisu injama'choni asi'taén can'jen. <sup>52</sup> Jesúsja ti'tsse coemba osha'choma atesu. Poi a'i tisema ñotsse in'jan'fa. Chiga Quitsa'qqe tisema ñotsse in'jan.

### 3

*Feti'su Juan a'i menia candusian'cho*  
(Mt 3.1-12; Mr 1.1-8; Jn 1.19-28)

<sup>1</sup> Poi ande'suma joccapitssia na'su, Tiberio César, quince canqqe'fave tayo mandasi Poncio Pilato, Judea ande'su governarorve can'jemba manda. Toya'caen Herodesja Galilea ande na'su tsu. Tise quinshin, Felipe tsu Iturea ande na'su. Traconite andema'qqe manda. Lisanasja Abilinia ande na'su. <sup>2</sup> Chigama afa'su nasundeccuja Anas, toya'caen Caifás'qqe. Tsendeccu tsu Chiga ettini manda'fa. Poiyi'cco tsendeccu tsa'caen manda'fasi Zacarías dutssi'ye Juan a'i menia ro'ndá can'jen'ni Chigaja Tisu Aya'fai'ccu tisema in'jaen. <sup>3</sup> Tsa'caen in'jaensi pa'cco Jordán na'en utufa'ye candusiancan, a'i cuintsu tisu egae tsincon'choma catipa fettiye'faye, Chiga tise shacama

aqqepoeñe. <sup>4</sup> Tsa'caen tsomba tsu tayopi'su Chiga Aya'fa afa'su Isaías qqen tevaenqquia'caen tson:

A'i aya'fama qui paña'faya a'i menia'ñe qqen fundo'je'choma:

“Na'su jiya'chove ñoña'faja.

Tise tsaiquima tansianqquia'caen ñoña'faja.

<sup>5</sup> Sinjun'ccumajan oviviya'cho.

Ccotta'ccomajan joqqitssiamba sefaccoa andema fae'ngaeña'cho.

Tsaiqui cca'rutticcoa'ma tansiaña'cho.

Ande ccutticcoa'ma ovivipa fae'ngaeña'cho.

<sup>6</sup> Nane tsa'caen tsu injama'choma ñoñaña'cho poiya'cco a'i Chiga tise'pama ccushaeña'choma in'jañe.”

<sup>7</sup> Tsain'bio a'i Juanga fetiyeye bo'fa. Tsa'caen bo'fasi Juanjan tise'pama iyu'upa su:

—Ñoa'me qui iyo dushundeqquia'can'fa. ¿Majan tsu que'imajan dyoña? Chiga iyicca'yepa fi'ttiya'choma pañamba ¿fetiye'pama ccushaye'ta ti qui in'jan'fa?

<sup>8</sup> Injama'choni egae tsincon'choma catiye qqen in'jamba tsu egae tsincombe'yi canse'faya'cho. Aqquia injanga “Tayopi'su Abraham ingi yayasi gi ccusha'faya” qqen su'fajama tisupa injama'choma ñoquiañe. Israendeccu'qqe cca'indeccuma bove ñotssimbi tsu. Chigaja in'jan'da va patundundu'ye a'ive tsoñe osha Abraham dushundeccuve dapa cuintsu Tisema iñajan'faye. <sup>9</sup> Nane quini'cco ñotsse nambisi a'ija tsama ttuttupa si'tsive oque'faya. Tsa'caen tsu Chigaja ttuttupoeñe ovacco'choma tsuiñaqquia'caen tayo ñoña que'i injama'choma somboeñe.

<sup>10</sup> Tsonsi a'i bo'fa'chondeccuja Juanma iñajampaña'fa:

—Tsa'caenda ¿jongoesuve gi tson'faya?

<sup>11</sup> Juanjan tise'pama su:

—Tisupapora ñotsse tson'faja. Dos contome an'bian'da conto mechoa'nga fae'cco afeja. Aña'choma an'bian'da attufaen'faja.

<sup>12</sup> Gobierno impuestoma isusundeccu'qqe Juanga fetiyeye ji'fa. Juanma tsu ñajampaña'fa:

—Atesian'su, ¿jongoesuve gi ingija tson'faya?

<sup>13</sup> Juan tise'pama su:

—Gobierno isuye manda'choma pan'sha'en isu'fajama.

<sup>14</sup> Toya'caen sundarondeccu'qqe jipa ñajampaña'fa:

—¿Jongoesuve gi ingija tson'faya?

Juanjan su:

—A'ima afopoemba cca'na'fajama. Ni cca'indeccuma tssai'fajama ti'tsse corifin'dima itsaye. Tsa'ma que'i na'su afepoen'choi'ccuyi opatsse canse'faja.

<sup>15</sup> Poiyi'cco a'i Cristo jiya'chove ro'ndá canse'fa. Tsa'camba injama'choni “¿Juanda ti Cristo?” qqen in'jan'fa. <sup>16</sup> Tsa'ma Juanjan poiyi'ccongá conda:

—Ñajan tsa'ccui'ccu gi que'ima feti'je. Tsa'ma ñama ti'tsse'tssia tsu jiya. Ñajan utu'cco. Nane shaca gi tise sapato uga'choma ccupa'suve ca'niñe. Tise jipa tsu Chiga Qquendya'pai'ccu que'ima fetiya. Tsambi'ta si'ngei'ccu fetiquia'caen tsu injama'choma somboeña. <sup>17</sup> Trigoma qqe'shopa fingiain'ccu ttonoma ufattovaenququia'caen tiseja jiya fundui'sui'ccu giya'tsse funduipa ñotssia trigoma boñaququia'caen tise a'ima ñoñañe. Tsa'ma trigo ttonoma oque catiquia'caen tise've in'jambindeququiamá tsangae catiya.

<sup>18</sup> Tsa'caen candusiamba Juanjan Cristo jiya'chone ñotsse condase'choma a'inga conda. <sup>19-20</sup> Toya'caen Juanjan ande na'su Herodesma iyu'u. Herodesja osha'cho egave tsomba tise quinshimbe pushe, Herodíasma, it-sapa fae'ngae can'jen. Tsa'caen egae tsinconsi Juanjan

tisema iyu'u. Iyu'usi Herodesja ti'tsse egae tsincomba iyicca'yepa Juanma picco'je'cho ettinga ca'niamba picco.

*Jesús Juanga fetiye'cho*

*(Mt 3.13-17; Mr 1.9-11)*

<sup>21</sup> Juanjan toya piccoyembi'te poiye'cco a'ima fetipa Jesúsma'qqe feti. Jesús fetiyepa Chigama ñajansi Chigaja sefaccoma fetta. <sup>22</sup> Fettasi Chiga Qquendya'pa ppup-puju'choa'caen attiamba Jesúsnga ande. Tsonsi sefaccone afa'choma paña'fa qquen su'choma:

—Que qui ña in'jan'cho Dutssi'ye. Ñoa'me gi quema ñotsse in'jan.

*Jesúsne tayopi'su coenzandeccu*

*(Mt 1.1-17)*

<sup>23</sup> Jesúsja treinta canqqe'fave napiamba a'ima atesiañe ashaen. Tiseja José dutssi'ye qquen tsu poiye'cco a'i in'jan'fa.

Joséja Elí dutssi'ye tsu.

<sup>24</sup> Elí Matat dutssi'ye.

Matatja Leví dutssi'ye.

Levíja Melqui dutssi'ye.

Tsaja Jana dutssi'ye.

Tsaja José dutssi'ye.

<sup>25</sup> Tsaja Matatías dutssi'ye.

Tsaja Amós dutssi'ye.

Tsaja Nahúm dutssi'ye.

Tsaja Esli dutssi'ye.

Tsaja Nagai dutssi'ye.

<sup>26</sup> Tsaja Maat dutssi'ye.

Tsaja Matatías dutssi'ye.

Tsaja Semei dutssi'ye.

Tsaja Josec dutssi'ye.

Tsaja Judá dutssi'ye.

<sup>27</sup> Tsaja Joanán dutssi'ye.

Tsaja Resa dutssi'ye.

Tsaja Zorobabel dutssi'ye.

Tsaja Salatiel dutssi'ye.

Tsaja Neri dutssi'ye.

<sup>28</sup> Tsaja Melqui dutssi'ye.

Tsaja Adi dutssi'ye.

Tsaja Cosam dutssi'ye.

Tsaja Elmadam dutssi'ye.

Tsaja Er dutssi'ye.

<sup>29</sup> Tsaja Jesús dutssi'ye.

Tsaja Eliezer dutssi'ye.

Tsaja Jorim dutssi'ye.

Tsaja Matat dutssi'ye.

<sup>30</sup> Tsaja Leví dutssi'ye.

Tsaja Simeón dutssi'ye.

Tsaja Judá dutssi'ye.

Tsaja José dutssi'ye.

Tsaja Jonam dutssi'ye.

Tsaja Eliaquim dutssi'ye.

<sup>31</sup> Tsaja Melea dutssi'ye.

Tsaja Mena dutssi'ye.

Tsaja Matata dutssi'ye.

Tsaja Natán dutssi'ye.

<sup>32</sup> Tsaja David dutssi'ye.

Tsaja Isaí dutssi'ye.

Tsaja Obed dutssi'ye.

Tsaja Booz dutssi'ye.

Tsaja Sala dutssi'ye.

Tsaja Naasón dutssi'ye.

<sup>33</sup> Tsaja Aminadab dutssi'ye.

Tsaja Admin dutssi'ye.

Tsaja Arni dutssi'ye.



Tsaja Esrom dutssi'ye.

Tsaja Fares dutssi'ye.

Tsaja Judá dutssi'ye.

<sup>34</sup> Tsaja Jacob dutssi'ye.

Tsaja Isaac dutssi'ye.

Tsaja Abraham dutssi'ye.

Tsaja Taré dutssi'ye.

Tsaja Nacor dutssi'ye.

<sup>35</sup> Tsaja Serug dutssi'ye.

Tsaja Ragau dutssi'ye.

Tsaja Peleg dutssi'ye.

Tsaja Heber dutssi'ye.

Tsaja Sala dutssi'ye.

<sup>36</sup> Tsaja Cainán dutssi'ye.

Tsaja Arfaxad dutssi'ye.

Tsaja Sem dutssi'ye.

Tsaja Noé dutssi'ye.

Tsaja Lamec dutssi'ye.

<sup>37</sup> Tsaja Matusalén dutssi'ye.

Tsaja Enoc dutssi'ye.

Tsaja Jared dutssi'ye.

Tsaja Mahalaleel dutssi'ye.

Tsaja Cainán dutssi'ye.

<sup>38</sup> Tsaja Enós dutssi'ye.

Tsaja Set dutssi'ye.

Tsaja Adán dutssi'ye.

Adánjan Chiga dutssi'ye.

#### 4

*Jesúsma qqueña qquen tson'cho*

*(Mt 4.1-11; Mr 1.12-13)*

<sup>1</sup> Tsomba tse'i Chiga Qquendya'pa Jesúsnga ca'nimba in'jaen cuintsu a'i menia japa <sup>2</sup> cuarenta a'ta can'jeñe.

Tseni can'jensi cocoya na'su Satana tisema qqueñacañe ji. Jesús ambe'yi can'jemba ñoa'me qquipoe'susi <sup>3</sup> Satanajan Jesúsma su:

—Queja ñoa'me Chiga Dutssi'ye'ta mandaja cuintsu va patu panme dasi añe.

<sup>4</sup> Jesúsja tisema su:

—Chiga Tevaen'jenga qquen tsu tevaen: “A'ija aqquia panmeñi amba canse'faya'bi. Tsa'ma Chiga Aya'fa in'jaensi tsu canse'faya.”

<sup>5</sup> Tsonsi Satanajan Jesúsma ccotta'cco se'fatssia tansin'choni angapa tse'faei'ccuyi pa'cco a'i can'jen'cho andema canjaemba <sup>6</sup> conda:

—Ñanga anttesi gi pa'cco va ande na'su. Majanga ña in'jan'da tsanga gi afeye osha. Tsa'camba pa'tssima quenga afesi qui ti'tsse'tssia na'suve dapa mandaya. <sup>7</sup> Que ñanga ccarupa ññajan'ninda tsu pa'cco vaja quembe.

<sup>8</sup> Jesúsja pañamba su:

—Satana, biani jaja. Chiga Tevaen'jenga qquen tsu tevaen: “Na'su Chiga Quitsaveyi ññajaña'cho. Tise'veyi shondocaña'cho.”

<sup>9</sup> Tsonsi Satana Jerusaléni Jesúsma angapa Chiga etti omba'su tsutopanga ccutsiamba su:

—Queja ñoa'me Chiga Dutssi'ye'ta vane butto amppija.

<sup>10</sup> Nane Chiga Tevaen'jenga qquen tsu tevaen:

Chigaja Tisema shondosundecuma manda quema coiraye.

<sup>11</sup> Tise'pa tivei'ccu quema ñotsse angacaña

que tsu'tte patunga desi zuccopanshan amppisa'ne.

<sup>12</sup> Tsa'ma Jesúsja tisema su:

—Chiga Tevaen'jenga qquen tsu su: “Chigaja que Na'su tsu. Tisema qqueña qquen tsonjama.”

<sup>13</sup> Tsa'caen Satana Jesúsma qqueña qquen tson'ma os-hambipa japa ronda'je ja'i ccase qqueñacañe.

*Galileani candusiañe ashaen'cho*  
*(Mt 4.12-17; Mr 1.14-15)*

<sup>14</sup> Chiga Qquendya'pa tisema in'jaemba quiñaensi Jesús toequi Galileani shanda. Tseni jasi poi'cco pporotsse can'jensundeccu tisene pañamba condase'fa.

<sup>15</sup> Nane Jesús tise'pa Chigane atesian'jen'ttinga atesian'jensi poi'cco a'i tisene ñoa'me ñotsse afa'fa.

*Jesús Nasaret canqqueni can'jen'cho*  
*(Mt 13.53-58; Mr 6.1-6)*

<sup>16</sup> Tsonsi Jesús Nasaretni ja, tise chuite can'jemba coeni. Tise atesuqquia'caen Sabado a'ta Chigane atesian'jen'ttinga japa ca'ni. Ca'nimba Chiga Tevaen'jema cambia afaye ccutsusi <sup>17</sup> Chigama afa'su Isaias tevaen'jema tisenga afe. Isupa fettapa tta'ttapa atte qqen tevaen'choma:

<sup>18</sup> Chiga Qquendya'pa tsu ñama in'jaemba manda va ñotsse condase'choma va'chandecunga candusiañe. Ñama manda injama'choni ñombi'yesundeccuma ccushaëne.

Ñama manda indiye'chondeccunga tise'pama ccupaya'chone condaye.

Ñama manda cuintsu binindeccu atte'faye.

Ña gi noñangiañesundeccuma ccushaëña.

<sup>19</sup> Na'su Chiga tsu a'ima in'jamba ja'ño fuite'je.

Tsane gi condaseye ji.

<sup>20</sup> Tsomba Jesúsja tevaen'jema findipa tevaen'jen na'sunga afepa dyai a'ima candusiañe. Dyaisi Chigane atesian'jen'ttini can'jensundeccu poi'cco tisema can'boen'fa. <sup>21</sup> Can'boen'fasi Jesúsja qqen su:

—Ja'ño a'ta tsu va que'i paña'jen'cho Chiga Tevaen'jen su'choja tayo napi. Ñane tsu condase.

<sup>22</sup> Jesús ñotsse afa'je'choma poiya'cco pañasundeccu tisene ñotsse afa'fa. Tsa'caen ñotsse afapa can'boemba su'fa:

—¿Vaja José dutssi'yembi ti?

<sup>23</sup> Tsonsi Jesúsja tise'pama su:

—Ñoa'me gi in'jan que'ija asi'ttaemba qui tayopi'su condase'cho suqquia'caen ñama qquen su'faya: “Ccushaen'suta, tsuma o'tie ccushaenjan.” Toya'caen que'ija ña Capernaumni japa tson'choma pañamba in'jan'fa vani'qqe ña tsa'caen canjaeñe.

<sup>24</sup> Toya'caen Jesúsja ti'tsse candusiamba su:

—Ñoa'me gi que'inga su, tisu andeni jisi tsu tisu aindeccu tsa Chiga Aya'fama afa'suma chi'ga'fa. <sup>25</sup> Tansintssi tsu tayopi'su Elíasne condase'cho. Tise can'jeinte tres canqqe'fa pa'cco toya'caen faesu enttingeve unjin tuimbisi poiya'cco a'i qquipoe'su'fa. Tsain'bio tsandupajen'chondeccu israe andeni can'jemba qquipoe'su'fa.

<sup>26</sup> Tsa'ma Chigaja Elíasma manda cuintsu fae tsandupajen'choveyi fuiteye. Tsaja israe ande joccani Sidón ande'su Sarepta canqqeni can'jen. <sup>27</sup> Toya'caen Chigama afa'su Eliseo can'jeinte tsain'bio na congomba pajisundeccu israe andeni can'jen'fa. Tsa'ma Chigaja tsendecuma ccushaembisi ccushambe canse'fa. Tsa'ma faesuma, Siria ande'su Naamámeñi tsu Chigaja ccushaen.

<sup>28</sup> Ya'caen susi pañamba Nasaretsundeccu iyicca'yepa

<sup>29</sup> Jesúsma indipa canqqe'ye joqqitssian'fa. Tsa canqqeja ccotta'cconi jin. Tsa'cansi Jesúsma indipa utufani anga'fa tsene cofetta amppiamoensi cuintsu paye.

<sup>30</sup> Tsa'ma Jesúsja tise'pa enttinge'ye panshamba ja.

*Cocoya ca'ni'choma ccushaen'cho*

*(Mr 1.21-28)*

<sup>31</sup> Tsomba Jesúsja faesu Galilea'su canqqeni ja. Capernaum canqqeni japa can'jemba Sabado a'ta a'ima

atesian'jen. <sup>32</sup> Ñoa'me na'sia'caen atesian'jensi poiya'cco a'i pañamba asi'ttaen'fa.

<sup>33</sup> Tse'tti Chigane atesian'jen'ttini tsu cocoya ca'ni'cho a'ija can'jen. Tiseja fundondo'e qqen afa:

<sup>34</sup> —Ingima noñangianjama Jesús Nasareno'su. ¿Ingima fi'ttiye ti qui ji? Quemanda gi atesu. Nane queja Chiga in'jan'cho qui.

<sup>35</sup> Tsa'ma Jesúsja tiseja iyu'upa su:

—Ziyapa tsa a'i'ye somboja.

Tsonsi poiya'cco a'i camboen'jen'fa'ni cocoyaja a'ima pan'jaensi andenga amppi. Tsa'caen amppisi a'ima iña-caembe'yi somboin ja. <sup>36</sup> Somboin jasi a'i bo'fa'cho can'boemba condasecco'fa:

—¿Ma'caen tsu Jesúsja tsa'caen afaye osha? Na'sia'caen quia'me mandasi cocoyandeccu'qqe pañamba somboin ja'fa.

<sup>37</sup> Jesús tsa'caen tsonsi poiya'cco tsa ande'su a'ija Jesúsne pañamba condasecco'fa.

*Simón chancashema ccushaen'cho*  
(Mt 8.14-15; Mr 1.29-31)

<sup>38</sup> Jesúsja Chigane atesian'jen'tti'ye sombopa Simón tsaoni ja. Simón chancasheja ajepa ccui. Si'ngia'ca'en ajepa ccuisi Jesúsnga conda'fa cuintsu ccushaëne. <sup>39</sup> Jesús catsepa ajema iyu'usi ajeja chattian. Tse'faei'ccuyi push-esuja quinsetsse ccushapa jangipa poiya'ccoma cui'ña.

*Jesús pajisundecuma ccushaen*  
(Mt 8.16-17; Mr 1.32-34)

<sup>40</sup> Tsa'caen tsonsi tayo chiga amppisi poiya'cco a'i tise'pani'su pajisundecuma i'fa. Osha'cho paqqe'sui'ccu paji'fa'choma isi Jesúsja tise tivei'ccu tise'pama pporaemba ccushaen. <sup>41</sup> Jesús mandasi

cocoyandeccu'qqe tsain'bio a'i'ye sombombopa qqen fundo'fa:

—¡Queja Chiga Dutssi'ye qui!

Tsa'ma Jesúsja cocoyama iyu'upa afaye se'pi. Cocoyandeccu'qqe atesu'fa Jesúsja Chiga in'jan'cho Cristo tsu.

*Jesús Galileani japa candusian*

*(Mr 1.35-39)*

<sup>42</sup> Cosepa a'tasi Jesúsja Pedro tsaone sombopa a'i menia ja. Aindeccuja tise've tta'ttapa atepa jaye se'pi'fa.

<sup>43</sup> Tsa'ma Jesúsja su:

—Ñanda gi faesu canqueni jaya'cho tseni'qqe Chiga aindecuve daya'chone condaseye. Tsa ñotsse condase'choma condaseye gi va andeni ji.

<sup>44</sup> Tsa'caen supa Jesúsja cca'tti cca'tti jacamba Galilea ande'su Chigane atesian'jen'ttinga japa candusian'jen.

## 5

*Avuma indisi canjaen'cho*

*(Mt 4.18-22; Mr 1.16-20)*

<sup>1</sup> Fae a'ta Jesúsja Genesaret mar otafani ccutsupa candusian'jen. Tisema pañañe in'jamba aindecuja panshaen catse'fa. <sup>2</sup> Tse'tti avuma vachosundeccu'qqe dos rande shavoma tandan dusiamba tise'pa vacho'vama cashi'je'fa. Aindeccuja panshaen catse'fasi Jesúsja tsa shavoma atepa <sup>3</sup> otse. Otsepa Jesúsja shavo na'su Simónma afa cuintsu otafane re'riccoe cataemba duseye. Tsonsi shavoccunga dyaipa a'ima atesian'jen. <sup>4</sup> Atesian nanimba Jesúsja Simónma su:

—Mar ti'tsse tso'sinia angapa que vacho'vama ttupa itoyian'faja avuma indiye.

<sup>5</sup> Simónjan su:

—Na'su, pa'cco cose va'chó jaca'ma gi avuma indimbipa quimbi'fa. Tsa'ma que su'ninda gi ña vacho'vama ttuya.

<sup>6</sup> Tsa'caen supa ttusi tsain'bio avu indiyesi vacho'vaja chittaji. <sup>7</sup> Chittajisi tise'pai'ccu fae'ngae vachosundeccu faesu shavo'ni pporotsse duse'fasi fingi ttu'se'fa cuintsu fuite'faye. Jipa poi'yi'cco shavonga avuma on'boen'fa. Ti'tssecan'da tsu poi'yi'cco shavo andecoye'can. <sup>8</sup> Simón Pedroja avuma indi'choma attepa dyopa Jesúsnga tsutta'choi'ccu ccaru dyaipa su:

—Na'su, ña'ñe joquittsija. Ñanda gi egae tsincon'su.

<sup>9</sup> Nane Simón, poi'yi'cco tisei'ccu can'jensundeccu'qqe avuma indi'choma attepa can'boen'fa. <sup>10</sup> Tisei'ccu fae'ngae vachosundeccu Juan, Santiago'qqe dyopa can'boen'fa. Tsendeccuja Zebedeo dutssiyendeccu. Tsonsi Jesúsja Simónma su:

—Dyojama. Ja'ñoñi qui queja avuma ttuqquia'caen a'ima ttu'seya.

<sup>11</sup> Tsonsi tise'pa shavoma ccattufaemba pa'tssima catipa Jesús'ccu jaja'fa.

*Na congomba paji'suma ccushaen*

*(Mt 8.1-4; Mr 1.40-45)*

<sup>12</sup> Jesús fae canqueni can'jen'ni na congomba paji'su tisenga ji. Nane pa'cco ai'vo tsa'caen dapa Jesúsma attepa andenga puntssan ccuipa ññajan:

—Na'su, que in'jan'da qui ñama giya'tsse ccushaëne osha.

<sup>13</sup> Tsa'caen susi Jesús tisu tivei'ccu yasapa paji'suma ppóraemba su:

—In'jan gi ññajan. Giya'tsse qui ccusha.

Tse'faei'ccuyi giya'tsse ccushasi <sup>14</sup> Jesús tisema manda:

—Cca'indeccunga condajama. Tsa'ma japa Chigama afa'sunga tisuma canjaenjan. Moisés mandaqquia'caen ccusha'chone afeya'choma afeja cuintsu poi'yi'cco a'i que ccusha'choma tsa'caen atesu'faye.

<sup>15</sup> Tsa'ma Jesús tson'chone ti'tsse condasecco'fasi tsain'bio a'i bo'fa tisema pañañe. Pajisundeccu'qqe bo'fa cuintsu tise'pa paji'choma ccushaëne. <sup>16</sup> Tsa'ma tsa'caen bo'fa'nijan Jesúsja a'i menia japa Chigama iñajan'jen.

*Jesús ishopa paji'suma ccushaen'cho*

*(Mt 9.1-8; Mr 2.1-12)*

<sup>17</sup> Fae a'ta Jesús a'ima atesian'jen'ni fariseo in'jan'chondeccu Chiga manda'choma atesiansundeccu'qqe tisenga bo'fa. Nane poi Galilea ande'su canquene, Judea ande'su canquene'qqe tsu ji'fa. Jerusaléne'qqe jipa bopa paña'fa. Tsonsi Na'su Chiga Jesúsma quiñaensi a'ima ccushaen. <sup>18</sup> Tsa'caen a'ima ccushashaen'jen'ni cca'ija ishopa paji'suma Jesúsnga i'fa. Paji'suma tise ana'jen'chonga opi ipa tta'tta'fa ma'caen ca'nimba Jesús tsutteccofanga paji'suma ccuiñañe. <sup>19</sup> Tsa'ma tsain'bio a'i bo'fasi ca'niañe oshambipa tsao'cco omba'su ppappacconga ansunde'fa. Tsa'o'su patufin'dima shichhapa paji'suma andian'fa tise ana'jen'choi'ccu. A'i enttingenga Jesús tsutteccofanga andiansi <sup>20</sup> Jesúsja tise'pa Chigave in'jan'choma in'jamba paji'suma su:

—Tsandie, tayo tsu que egae tsincon'cho joquitssi.

<sup>21</sup> Tsa'caen susi Chiga manda'choma atesiansundeccu, fariseondeccu'qqe tisupapora iñajampañacco'fa:

—¿Jongoesu qqen tsu va a'ija in'jan? Chigayi tsu egae tsincon'choma joquitssian'su. ¿Tiseja Chiga qqen ti in'jan?

<sup>22</sup> Jesúsja tise'pa iñajampañacco'fa'choma in'jamba su:

—¿Jongoesie qui injama'choni qqen asi'ttaemba iñajampañacco'fa? <sup>23</sup> Tayo gi su: “Que egae tsincon'cho tayo joquitssi.” ¿Bove aiye'pambi ti qqen suye “Jangipa tsui jaja.”? <sup>24</sup> Tsa'ma Na'su Chigaja antte Sefaccone Ji'cho A'i



va ande'su a'i egae tsincon'choma joqquitssiañe. Ñajan Sefaccone jipa tsa'caen oshapa gi que'inga canjaeña.

Tsomba Jesús ishopa paji'suma su:

—Quema gi manda: Jangipa que ana'jen'choma isupa tisu tsaoni tsui jaja.

<sup>25</sup> Tse'faei'ccuyi tiseja jangi. Poiyi'cco camboen'jen'ni tise ana'jen'choma onccamba Chigama ñotsse afapa tisu tsaoni ja. <sup>26</sup> Tsa'caen ccushapa jasi poiyi'cco a'i atepa can'boen ccutsupa Chigama ñotsse afa'fa. Toya'caen dyopa su'fa:

—Ñoa'me ccaningae tson'choma gi ja'ño atte'fa.

*Jesús Levíma ttu'se'cho*  
(Mt 9.9-13; Mr 2.13-17)

<sup>27</sup> Tsonsi Jesúsja sombopa Levíma atte. Tiseja gobierno impuestoma isu'su tsu. Leví impuestoma isu'je'ttini dyaisi Jesús tisema ttu'se:

—Ñai'ccu jija.

<sup>28</sup> Tsonsi Leví jangipa pa'ccoma catipa Jesús'ccu ja.

<sup>29</sup> Tsomba Leví Jesúsnga pipa poiyi'cco a'ima ttu'se tise tsaoni aña. Tsain'bio gobierno impuestoma isusundeccu'qqe an'jen'cho mesa jin'tti piyive ccuipa an'jen'fa. Cca'indeccu'qqe ccuipa an'jen'fa. <sup>30</sup> Majan fariseondeccu, toya'caen tsendeqquia'caen in'jamba Chiga manda'choma atesiansundeccu'qqe can'jemba camboen'jen'fa. Jesúsma shondosundeccuma atepa iyu'uye ashaen'fa qquen iñajampañamba:

—¿Jongoesie qui que'ija va impuestoma isusundec-cui'ccu an'jen'fa? Tsendeccuja egae tsinconsundeccu tsu.

<sup>31-32</sup> Tsama pañamba Jesúsja su:

—Pajimbi'choa ccushaen'suma in'jambiqquia'caen ñajan jimbi gi tayo ño'a qquen in'jan'chondec-cuma ccushaene. Tsa'ma ccushaen'su paji'suma ccushaene

jiqquia'caen gi egae tsinconsundecuma ccushaeñe ji cuintsu tise'pa egae tsincon'choma antte'faye.

*Ambe'yi asettu'chone atesian'cho  
(Mt 9.14-17; Mr 2.18-22)*

<sup>33</sup> Toya'caen tisema iñajampaña'fa:

—Juanma shondosundecuja asettupa zutsse ambe'yi Chigama iñajan'fa. Fariseoma shondosundeccu'qqe tsa'caen atesu'fa. Tsa'ma quema shondosundecuja aset-tumbe'yi injanga amba cu'i'fa.

<sup>34</sup> Tsonsi Jesúsja tise'pama su:

—Tsandie pusheye tson'jemba a'ima ttu'sesi bojin sheque'ta fae'ngae tsandiei'ccu avujatsse amba cui'je'fa. Ña gi tsa tsandieca'on ja'ño can'jen. <sup>35</sup> Tsa'ma maqui a'ta cca'indeccu tsandiema joqquitssiansi tsu tisupanaccu asettupa ambe'yi can'jen'faya.

<sup>36</sup> Tsa'caen supa Jesúsja faesu condase'choma condase:

—A'ija cuna ondiccu'jema chittaya'bi tssoruma pi'piye. Tsa'caen tson'da cunama'qqe tsu dañña. Toya'caen ma'ppa'ninda tsa pi'pi'cho zupa tssoru ondiccu'jema ti'tsse chittaya.

<sup>37</sup> Toya'caen tsu a'ija vinoma cupoemba tssoru ttono botiyanga fiñañambi. Vinojan ompantssimba ttonoma chittaemba tsu catiyeya. Toya'caen ttono'qqe tsu tsan-gae dañongeya. <sup>38</sup> Tsa'ma cuna vinomanda tsu cuna ttono botiyanga fiñaña'cho. Tsa'caen fiñasi vino, ttono'qqe dañongembe'yi ccutsuya.

<sup>39</sup> Tsa'caen tsu a'ija ñotssia tayoyi ccutsu'cho vinoma cu'ipa cuna ansintssia vinoma in'jambi. Tsa'ma “Tayoyi ccutsu'cho tsu bove ñotssi” qquen tsu suya.

## 6

*Sema'ma'qquia a'tane condase'cho**(Mt 12.1-8; Mr 2.23-28)*

<sup>1</sup> Jesús sema'ma'qquia a'ta nasipa'ye jacansi tisema shondosundeccu'qqe jacamba trigoma sintti isupa shuju qqe'shopa an'fa. <sup>2</sup> Tsama attepa majan fariseondeccuja su'fa:

—¿Micomba qui sema'ma'qquia a'ta qqen sema'jen'fa? Chiga manda'chota tsu se'pi sema'ma'qquia a'ta tsa'caen semañe.

<sup>3</sup> Tsama pañamba Jesúsja su:

—¿Paña'fambi ti qui tayopi'su David tson'choma? Tiseja tisei'ccu jacansundeccu'qqe qquipoe'su'fa.

<sup>4</sup> Tsomba Davidja Chiga ettinga ca'nimba Chiganga afe'cho panma isupa an. Tisei'ccu jacansundeccunga'qqe afesi tise'pa'qqe an'fa. Tsa panjan Chigama afasundeccuyi an'faya'cho. Chiga manda'choja se'pi faesu aña. Tsa'ma David tsa'caen tsonsi Chigaja se'pimbi.

<sup>5</sup> Toya'caen Jesúsja su:

—Ña, Sefaccone Ji'cho A'i gi sema'ma'qquia a'tane na'su.

*Tive samba dañonge'cho**(Mt 12.9-14; Mr 3.1-6)*

<sup>6</sup> Faesu sema'ma'qquia a'ta Jesúsja Chigane atesian'jen'ttinga ca'nimba atesian'jen. Tse'tti tsu fae tsandie tansinfa'su tive samba dañonge'cho can'jen.

<sup>7</sup> Fariseondeccu, Chiga Aya'fama atesiansundeccu'qqe Jesúsma camboen'jen'fa. Nane sema'ma'qquia a'ta Jesús se'je ccushaen'ninda, tiseja egae tsincon'su qqen suye ronda'je'fa. <sup>8</sup> Tsa'ma Jesúsja tise'pa in'jan'choma in'jamba tive dañonge'choma su:

—Jipa va'ttinga ccutsuja.

Qquen susi tiseja jangipa Jesúsi'ccu ccutsu. <sup>9</sup> Tsonsi Jesús poiysi'ccoma ñajampaña:

—Chiga manda'cho sema'ma'qquia a'ta egae tsoñe se'pi'ta ¿ñotsse tsoñe'qque ti se'pi? Fi'ttiye se'pi'ta ¿ccushañe'qque ti se'pi?

<sup>10</sup> Qquen supa piyicamba poiysi'ccoma can'boemba paji'suma su:

—Que tivema yasaja.

Tsandie tsa'caen yasasi tise tiveja giya'tsse ccusha.

<sup>11</sup> Tsa'ma tsa'caen tsonsi fariseondeccu, Chiga Aya'fama atesiansundeccu'qque ñoa'me iyicca'yepa condasecco'fa ma'caen Jesúsma patsuya'chove.

*Doce shondosundecuma ttu'se'cho*

*(Mt 10.1-4; Mr 3.13-19)*

<sup>12</sup> Faesu a'ta Jesús ccotta'cconi japa ansunde Chigama ñajaña. Pa'cco cose Chigama ñaján can'jen. <sup>13</sup> A'tasi tisema shondosundecuma ttu'sepa docema tisene afa-sundecuve inisian. <sup>14</sup> Tsendecuja: Simón (Jesús tisema afa, Pedro); tsambe quinshin Andrés; Santiago; Juan; Felipe; Bartolomé; <sup>15</sup> Mateo; Tomás; Santiago (tsaja Alfeo dutssi'ye); Simón (Zelote qquen su'cho); <sup>16</sup> Judas (Santiago antian); Judas Iscariote (Jesúsma jai'ngae chi'gapa afeya'cho).

*Jesús aindeccuma atesian'jen'cho*

*(Mr 4.23-25)*

<sup>17</sup> Tsomba Jesús tisema shondosundecui'ccu ccotta'cco'ye andepa fae'ngatssia andeni ccutsu'fa. Tsain'bio a'i Judea andene, Jerusaléne'qque jipa tseni bo'fa. Toya'caen mar otafani'su Tiro canqque, Sidón canquene'qque ji'fa Jesúsma pañañe. Tise'pa paji'choma ccushaye in'jamba tsu ji'fa. <sup>18</sup> Jesúsja cocoyanga noñangiañesundecuma'qque ccushaen. <sup>19</sup> Poiysi'cco

a'i tsu Jesúsma pporaeñe in'jan'fa. Nane pporaen'da tse'faei'ccuyi tsu ccusha'fa.

*Majan tsu avujatssi'fa*

*(Mt 5.1-12)*

<sup>20</sup> Tsomba Jesús tisema shondosundecuma cambia su:

—Que'i mechondequija ñoa'me qui avujatssi'fa.

Nane Chiga aindeccu qui.

<sup>21</sup> Que'i qquipoe'sundeccu ñoa'me qui avujatssi'fa. Que'i qui tteppu'faya.

Que'i inasundeccu ñoa'me qui avujatssi'fa. Que'i qui feña'faya.

<sup>22</sup> Ñajan Sefaccone Ji'cho A'i. Que'i ñame in'jansi cca'indeccu que'i inisema dañioñe afa'ni'qqe ñoa'me qui avujatssi'fa. Aindeccu ñane que'ima chi'ga'fa'ni'qqe qui avujatssi'fa. Ñane que'ima se'pipa afase'fa'ni'qqe qui avujatssi'fa. <sup>23</sup> Nane tayopisundeccu'qqe tise'pa can'jeinte'su Chiga Aya'fama afasundeccuma tsa'caen egae tson'fa. Maqui a'ta tsa'caen que'ima afase'nijan ti'tsse avujatssi'faja. Nane Chiga sefacconi qui osha'cho ñotssiaman injantsse an'bian'fa.

<sup>24</sup> Tsa'ma vana'faya qui que'i osha'choma an'biansundeccu. Que'imbe ñotssiaman qui tayo an'bia'an.

<sup>25</sup> Vana'faya qui que'i amba tteppu'chondeccu. Qquipoe'su'faya qui.

Vana'faya qui que'i ja'ño feñasundeccu. Ñombi'yepa qui i'na'faya.

<sup>26</sup> Vana'faya qui poi'cco a'inga ñotsse afayesundeccu. Nane tayopi'su Chiga Aya'fama afa'su qquen afopoensundeccu afopoensi tise'pa can'jeinte'su aindeccu tise'pama tsa'caen ñotsse afa'fa.

*Chi'ga'choma ñotsse in'jaña'cho*

*(Mt 5.38-48; 7.12)*

<sup>27</sup> Tsa'ma que'i ñama pañasundecunga gi conda: Que'ima egae tsinconsundecuma ñotsse in'jan'faja. Que'ima chi'gasundecuma ñotsse tson'faja. <sup>28</sup> Que'ima afasesundecuma ñotsse afa'faja. Que'ima dañosundecune Chigama iñajan'faja cuintsu tise'pama ñotsse tsoñe. <sup>29</sup> Majan a'i faefa'su tsovejuma tssai'ninda ccafa'su tsovejuma'qqe canjaen'faja. Majan a'i que oppoen'cho sarupama itsa'ninda que ondiccu'jema'qqe se'pimbe'yi afe'faja. <sup>30</sup> Majan a'i osha'chove quema iñajan'ninda se'pimbe'yi afe'faja. Majan a'i que an'bian'choma itsa'ninda toequi afeye iñajan'fajama. <sup>31</sup> Ma'caen cca'i que'ima tsoñe in'jan'da tsa'caen tise'panga'qqe tson'faja.

<sup>32</sup> ¿Tisuma in'jan'chondeccuve'yi ñotsse in'jan'da ti qui ñotsse tson'fa? Nane egae tsinconsundeccu'qqe tsa'caen tisupapora ñotsse injancco'fa. <sup>33</sup> ¿Tisuma ñotsse tsonsundeccuveyi ñotsse tson'da ti qui ñotsse tson'fa? Nane egae tsinconsundeccu'qqe tsa'caen tson'fa. <sup>34</sup> ¿Jai'ngae ccase isuye corifin'dima cca'indeccunga afe'ta ti qui ñotsse tson'fa? Nane egae tsinconsundeccu'qqe tsa'caen tisupaporanga afeye atesu'fa jai'ngae ccase isuye. <sup>35</sup> Tsa'ma que'ija tisuma egae tsonsundecuma ñotsse in'jan'faja. Tsendecuma ñotsse tson'faja. Corifin'dima afe'ta ccase isuye in'jambe can'faja. Tsa'caen tson'da qui Ti'tsse'tssia Chiga que'ima in'jansi Tise dushundeccuve dapa ti'tsse ñotsse osha'choma isu'faya. Chiga Quitsaja Tisema chi'gasundecuma in'jamba mende'ye. Egae tsinconsundecuma'qqe in'jamba mende'ye. <sup>36</sup> Chiga que'i Quitsa mendeyequica'caen que'i'qqe cca'indeccuma mende'ye'faja.

*Egae tsincon'choma ttatta'fajama  
(Mt 7.1-5)*

<sup>37</sup> Cca'i egae tsincon'choma ttatta'fambian'da Chiga'qqe que'i egae tsincon'choma tta'ttaya'bi. Ni cca'imbe egae tsincon'cho shacane qquen afambian'da Chiga'qqe que'i egae tsincon'cho shacane afaya'bi. Cca'indeccu que'ima egae tsincon'ninda tise'pama in'jamba tise'pa egae tsincon'choma aqqepoen'faja. Tsa'caen aqqepoe'ninda Chiga'qqe que'ima in'jamba que'i egae tsincon'choma aqqepoeña. <sup>38</sup> Cca'indeccunga tsu afe'faya'cho. Tsa'caen tso'ninda tsu Chiga'qqe que'inga afeya. Agatto'cho tasanga on'boemba pisa'ñacca tssai oyae'ñacca on'batsse on'boenqqiacaen tsu Chigaja que'inga afeya. Nane que'i cca'indeccunga afeye agattoquia'caen tsu Chiga'qqe agattopa que'inga afeya.

<sup>39</sup> Tsomba Jesús va condase'choma conda:

—¿Bininda ti osha faesu binima angacañe? Me'i, fae'ngae tsu ande changonga amppi'faya. <sup>40</sup> Shondo'suja tisema atesian'suma ti'tsse'tssimbi tsu. Tsa'ma poi shondo'su osha'choma paña'da ñoa'me tise atesian'sia'caen tsu da'faya.

<sup>41</sup> ¿Mingapa qui faenga'su tso'fe ccappi'choma attequia'caen tise egae tsincon'choma atte'fa? Tsa'ma tisu tso'feni quini'cco eje'choma qui atesu'fambi. <sup>42</sup> Toya'caen qui su'fa: “Faenga'su, ñajan que tso'fe ccappi'choma somboeña.” Tsa'ma tisu tso'feni quini'cco eje'choma atesumbiqquia'caen qui que'i egae tsincon'choma atesu'fambi. Queja ño'a qquen attiamba ñoa'me afopoen'su qui. O'tie tsu que tso'feni quini'cco eje'choma somboemba ñotsse atteya'cho. Tsomba qui faenga'suma fuitepa tise tso'fe ccappi'choma somboeñe osha.

*Teta'choma attepa quini'ccoma in'jan  
(Mt 7.17-20; 12.34-35)*

<sup>43</sup> Ega teta'choja ñotssia quini'jinga nambi. Ni ñotssia teta'cho'qqe ega quini'jinga nambi. <sup>44</sup> Nane tise teta'choma attepa gi quini'jima atesu'fa. Higuerama pi'sho'fambi gi nojansifanga japa. Ni tsajama gi pi'sho'fambi ancco'singa japa. <sup>45</sup> Toya'caen ño'a a'ija tise injama'cho'su ñotsse in'jan'chone ñotssiama tsu canjaen. Tsa'ma ega a'ija tise injama'cho'su egae jincho'chone egama tsu canjaen. Nane tisu injama'cho jinchoquia'caen tsu a'ija afa.

*Dos tsaone condase'cho*  
(Mt 7.24-27)

<sup>46</sup> ¿Micomba qui ñama su'fa: “Na'su, Na'su,” ña manda'choma chig'ga'ta? <sup>47</sup> Qquen tsu ñanga jipa ña su'choma ñoa'me pañamba canse'cho: <sup>48</sup> Fae a'i tsu tsaña'jemba tso'sitsse dya'dyapa fattocconga ta'etsse dyaiña. Tsonsi tsu na'en jipa zonzoe'ma osiañe oshambi tise tsa'oma. Ñotssiave tsao'ñasi ta'etsi tsu. <sup>49</sup> Tsa'ma majan a'i ña manda'choma pañamba tson'sumbi'ta faesu tsao'ñasia'can tsu. Tsaja sisipandundunga tsao'ñasi na'en jipa tsa'onga zonzoeni junde osui. Osuipa tsa'oja tsangae ja.

7

*Capitámbe sema'suma ccushaen'cho*  
(Mt 8.5-13)

<sup>1</sup> Jesúsja aindecuma candusian nanimba Capernaum canqueni japa ca'ni. <sup>2</sup> Tse'tti tsu romano sundaro capitán can'jen. Tise in'jan'cho sema'su pajipa paye tson'jen. <sup>3</sup> Tsa'cansi capitánjan Jesúsne pañamba is-rae'su nasundecuma manda moen Jesúsma afaye cuintsu tise'be sema'suma ccushaeñe. <sup>4-5</sup> Manda moensi Jesúsnga catsepa tsain'bitsse iñajan'fa qquen supa:



—Va a'ija ñoa'me ñotssia tsu. Ingi a'ima ñotsse in'jamba corifin'dima afe ingi Chigane atesian'jen'ttima tsao'ñañe. Ñotssi tsu que tise in'jan'choma tsoñe.

<sup>6</sup> Tsonsi Jesús tsendeccui'ccu japa capitán tsa'onga pan napiji'ni capitánjan tise amigondeccuma manda moen cuintsu Jesúsma cachui'nga'faye. Tsendeccuja jipa capitán qqen su'choma conda'fa:

—Na'su, ñotssimbi gi que ña tsaoni jiye. <sup>7</sup> Tsa'camba ñajan cambajunaccu cachuiccoye jambi quema iñajañe. Tsa'ma queja toe'tti ccutsupa mandaja cuintsu ñambe sema'su ccushaye. <sup>8</sup> Ñajan sundaro a'i. Ña nasundeccuja ñama manda'fa. Ña'qqe ñama bove'cco sundarondccuma manda. Fae'ccoma “Jaja” qqen mandasi tiseja ja'je. Faesuma “Jija” qqen mandasi tiseja ji'je. Ña sema'suma “Qquen ñoñaja” qqen mandasi tsa'caen tiseja tson'jen.

<sup>9</sup> Jesús tsama pañamba sundaro capitáne asi'ttaén ccutsu. Tsomba piyicamba tisei'ccu jacansundeccuma su:

—Tsa a'ija ñoa'me tsu ñame in'jan. Ni fae is-rae'suyi'qqe qqenda ñame in'jan'fambi.

<sup>10</sup> Tsa'caen susi mandasicondasundeccu toequi capitán tsaoni japa sema'su ccusha'choma atte'fa.

### *Du'shu pa'choma quendyaen'cho*

<sup>11</sup> Tsomba tse'i Jesúsja Naín canqqeni ja. Tisema shondosundeccu, tsain'bio a'i'qqe tisei'ccu fae'ngae jaja'fa. <sup>12</sup> Canqqe sombo'ttinga catsepa a'i bo'fa'choma cachuicco'fa. A'i pasi canqqe'ye sombo'fa pa'choma angapa a'tuye. Pa'choja tsandupajen'cho du'shu fae'cco tsu. <sup>13</sup> Na'su Jesús tsandupajen'choma atepa mende'yepa su:

—I'nambe canjan.

<sup>14</sup> Tsomba Jesús catsepa pa'choma ccuiña'cho asiccoma pporaensi angasundeccuja já ccutsu'fa. Tsonsi Jesúsja pa'choma su:

—Jaricho, ¡qquendyaja!

<sup>15</sup> Qquen susi pa'choja jangi dyaipa afaye ashaen. Tsonsi Jesús tise ma fuite cuintsu tise mamani jaye. <sup>16</sup> Poiyi'cco a'i tsama attepa ñoa'me dyo'fa. Tsa'ma Chigama ñotsse afapa su'fa:

—Joccapitssia Chiga Aya'fama afa'su tsu inginga attian. Toya'caen tsu su'fa:

—Chigaja Tise aindeccuma in'jamba fuiteye ji.

<sup>17</sup> Tsama condasesi poiyi'cco Judea andeni'su a'i'qqe paña'fa. Poiyi'cco pporotsse can'jensundeccu'qqe tsa'caen Jesúsne paña'fa.

*Feti'su Juan ñajampañasundeccu*  
(Mt 11.2-19)

<sup>18</sup> Juan toya picco'je'cho ettini piccoyepa can'jen'ni tise ma shondosundeccu Jesús tson'choma tise nga condase'fa. <sup>19-20</sup> Condasesi pañamba Juanjan tsendeccu'suma dosve ttu'sepa Na'su Jesúsni maña. Tsendeccu jipa Jesúsma su'fa:

—Feti'su Juan tsu ingima mandamaña quema qqen ñajampañañe: “¿Que ti qui Cristo, jiya'cho qqen su'choja? Tsambi'ta ¿faesuve ti gi ronda'je'faya?”

<sup>21</sup> Tsendeccu caña'jen'ni Jesúsja tsain'bio pajisundeccuma ccushaen'jen. Nane osha'cho paqqe'sui'ccu pajisundeccuma ccushaen. Cocoyama joqquitssiamba binindeccuma'qqe bittaen. <sup>22</sup> Tsa'caen ccushaen'jemba Juanma shondosundeccuma su:

—Japa que'i attepa paña'choma Juanga conda'faja. Binindeccu tsu bitta'fa. Ccutsumbindeccu tsu tsui jacan'fa. Na congomba pajisundeccu tsu giya'tsse ccushapa ja'fa. Tsosinambindeccu tsu paña'fa. Nane panjin ccui'chondeccu tsu ccase qquendya'fa. Va'chandecchu'qqe tsu Chiga a'ima ccushaëña'chone

ñotsse condase'choma paña'fa. <sup>23</sup> Majan ñame in'jamba ansangembi'ta ñoa'me tsu avujatssi'faya.

<sup>24</sup> Juan mandasi iñajampañasundeccu jasi Jesúsja aindeccunga Juane qqen condase:

—Que'ija a'i menia ja'ta ¿jongoesuma atteye qui ja'fa? ¿Fingian canttini'ccoma oyaen'jen'choma cañe ti qui ja'fa? <sup>25</sup> Tsambi'ta ¿jongoesuma atteye qui ja'fa? ¿A'i ñotssia sarupama ondiccucho'choma cañe ti qui ja'fa? Me'i, ñotssiam a ondiccucho'chondeccuja na'su tsaoni can'jemba tsa'caen ñotsse canse'fa. <sup>26</sup> Tsa'ma ¿jongoesuma atteye qui ja'fa? ¿Chiga Aya'fama afa'suma atteye ti qui ja'fa? Ju, tsane qui japa atte'fa. Nane Juanjan Chiga Aya'fa afa'suma ti'tsse'tssia tsu. <sup>27</sup> Tisene tsu Chiga Aya'faja su:

Que canjan. Quema o'tie gi ñane afa'suma manda moeña. Tise tsu o'tie japa que ji'je'choma ñoñañe.

<sup>28</sup> Va andeni faesu a'i Feti'su Juanma ti'tsse'tssia've me'i'on tsu. Tsa'ma Chiga aindeccuve da'fasi ñoa'me utu'cco tsu Juanma ti'tsse'tssiya.

<sup>29</sup> Jesúsma pañamba poiya'cco a'i, nane gobierno impuestoma isusundeccu'qqe, “Chigaja ño'a” qqen tsu su'fa. Tsendeccuja tayoe Juanga fetiyepa can'jen'fa. <sup>30</sup> Tsa'ma fariseondeccu, Chiga manda'choma atesu'chondeccu'qqe Juanga fetiyembipa Chiga tsa'caen tise'pama ccushaeña'choma chi'ga'fa. <sup>31</sup> Tsonsi Na'su Jesúsja su:

—¿Jongoesui'ccu gi ja'ño'su aindeccui'ccu fae'ngae canjaeña cuintsu que'i ñotsse in'jan'faye? ¿Jongoesia'caen tsu tson'fa? <sup>32</sup> Ñoa'me dushundeccu chavaen'jen'tti'su atandunduni dyaipa fae'ngae co'fe'fambiqquia'caen tsu ja'ño'su aindeccuja fae'ngae in'jan'fambi. Nane dushundeccuja tisupaporai'ccu fundocco'fa: “Casara'chove co'feqquia'caen fendo'jesi qui

boira'fambi. Pa'choma a'tuquua'caen ñombi'ye cofe'jesi qui i'na'fambi.” <sup>33</sup> Feti'su Juan jipa añá'choma ambipa asettu. Tse'tse'pama'qqe cu'imbi. Tsa'cansi que'ija su'fa: “Tsaja cocoya ca'ni'cho.” <sup>34</sup> Ja'ño ñajan Sefaccone Ji'cho A'i jipa gi osha'choma amba cu'i. Tsa'ma que'ija su'fa: “Va a'ija ñoa'me panshaen an'jemba tse'tse'pa singo tsu. Egae tsinconsundeccu, gobierno impuestoma isusundeccu'qqe tisei'ccu fae'ngae jacan'fa.” <sup>35</sup> Qquen qui su'fa. Tsa'ma tsaveqqe'su tsu. Chiga dushundeccuja Chiga tansintsse in'jan'choma canjaen'fa.

### *Jesús fariseo tsaoni japa an'cho*

<sup>36</sup> Tsonsi fa'e fariseo a'i Jesúsma ttu'se cuintsu tise tsaoni jipa añe. Jesúsja tseni japa cca'indeccui'ccu mesa jin'tti piyive ccui. <sup>37</sup> Tsa'caen ccuipa an'jen'ni push-esuja Jesús fariseo tsaoni can'jen'choma pañamba jipa ca'ni. Tsa pushesuja egae tsincon'su. Patuma ñoña'cho botiyanga ñome'bama ipa Jesús tsutteccofanga ccutsupa i'na. <sup>38</sup> I'namba tise inanzaccui'ccu Jesús tsu'ttema tssipoemba cashi. Tsomba tise tosei'ccu Jesús tsu'ttema ccucha. Ccuchapa tsu'ttema mochapa ñome'bai'ccu on-joen. <sup>39</sup> Pushesu tsa'caen tsonsi Jesúsma ttuse'su fariseoja atepa tisu injama'choni asi'ttaen: “Va a'ija ñoa'me Chiga Aya'fa afa'suta tsu tisema pporaen'su pushesuma atesuya. Nane pushesu ma'caen egae tsincon'choma tsu atesuya.” <sup>40</sup> Tsonsi Jesúsja fariseo in'jan'choma in'jamba su:

—Simón, ñajan quenga condaye in'jan.

Simónjan su:

—Atesian'su, ¿jongoesuma qui condaye in'jan?

Tsonsi Jesúsja tisema su:

<sup>41</sup> —Na'su tsu dos a'inga shacaen. Fae a'i shacaja quiniento corifin'di. Faesu shacaja cincuenta corifin'di.

<sup>42</sup> Tsendeccu afepoeñe osha'fambisi na'suja poimbe shacama fi'tti. ¿Majan tsa dos a'i'su tsu na'suma ti'tsse in'jaña?

<sup>43</sup> Simónjan su:

—Jm jím. ¿Tsa ti'tsse shacaen'sumbi ti?

Tsonsi Jesús tise ma su:

—Ñotsse qui in'jamba su.

<sup>44</sup> Tsomba piyicamba pushesuma canjaemba Simónma su:

—Va pushesuma canjan. Ña que tsa'onga ca'nisi queja tsa'ccuma afembi ña tsu'ttema cashiye. Tsa'ma va pushesuja tise inanzaccui'ccu ña tsu'ttema tssipoemba cashipa tise tosei'ccu ccucha. <sup>45</sup> Queja ñama mochapa chigambiambi. Tsa'ma ña tseyi ca'nisi tiseja ánttembe'yi ña tsu'ttema mocha'je. <sup>46</sup> Que ña tsovema yayapoembisi tiseja ña tsu'ttema ñome'bai'ccu onjoen. <sup>47</sup> Tsa'cansi gi quema su: Tsa pushesuja tsain'bitsse egae tsincon'chopa pa'ccoma joqqitssiangepa ñame ñotsse in'jan. Tsa'ma majan a'i re'riccoe egae tsincon qqen in'jamba re'riccoe joqqitssiangepa aquia re'riccoe ñame in'jan.

<sup>48</sup> Tsomba Jesús pushesuma su:

—Que egae tsincon'choja tayo joqqitssi.

<sup>49</sup> Qquen susi cca'indeccu fae'ngae Jesúsi'ccu ansundeccuja qqen condasecco'fa:

—¿Majan gi qqen te tiseja in'jan, tsa'caen egae tsincon'choma joqqitssiañe'jan?

<sup>50</sup> Tsonsi Jesús pushesuma su:

—Opatsse canseja. Ñame in'jamba qui ccusha.

## 8

### *Pushesundeccu Jesúsma fuite'cho*

<sup>1</sup> Can'jenccapa Jesúsja faesu canqqueni, faesu a'i can'jen'ttinga japa ma'caen Chiga aindeccuve

dapa canseya'chone condasepa candusian'jen. Tisema doce shondosundeccu'qqe fae'ngae jacan'fa. <sup>2</sup> Toya'caen majan pushesundeccu'qqe Jesús tise'pama ccushaensi fae'ngae jacan'fa. Majan tsendeccu'suta cocoya can'jensi joqqitssian'cho; majanda pajisi ccushaen'chondeccu. Fa'eja, María Magdalena, tsu siete cocoyave joqqitssian'cho. <sup>3</sup> Faesuja Juana. Tise tsa'nduja, Choza, tsu ande na'su Herodes tsa'o na'su. Toya'caen Susana, cca'indeccu'qqe fae'ngae jacan'fa. Tise'pa an'bian'choi'ccu, tise'pa corifin'di'ccu Jesúsma, tisema shondosundeccuma'qqe fuitepa osha'chove ñoña'fa.

*Gaiña jon'sune condase'cho*

*(Mt 13.1-9; Mr 4.1-9)*

<sup>4</sup> Poiyi'cco A'i canquene fae'ngae Jesúsnga bo'fasi tiseja qqen condase'choi'ccu atesian'jen:

<sup>5</sup> —Jon'suja gaiña jon'su ja. Gaiñasi enttingeja tsaiqui utufanga sheque. A'i tsanga tsuisi chhiriria'qqe jipa an'fa. <sup>6</sup> Enttingeja patupa andenga sheque. Sho'yopa pandipa samba, tsa'ccu me'i'onsi. <sup>7</sup> Enttingeja anccos-iccunga sheque. Tsa'ma anccosi fae'ngae coensi ñotsse jon'cho nambeyi pa. <sup>8</sup> Faesu enttingeja ñotssia andenga shequepa sho'yopa ñotsse na'fa. Fae cho tsu cieme atapa'fa.

Jesúsja tsa'caen atesiamba fundopa afa:

—Majan tsosinapaja paña'faja.

*Jesús condase'cho condaye in'jan'cho*

*(Mt 13.10-17; Mr 4.10-12)*

<sup>9</sup> Jesúsma shondosundeccu condase'cho in'jan'chone tisema iñajampañasi <sup>10</sup> Jesúsja qqen su:

—Tayoe ma'caen Chiga aindeccuve dapa canse'faya'chone Chigaja condambi. Tsa'ma ja'ño

que'inga pañaëne in'jan. Cca'indecungaja aqquia condase'choi'ccu condaseya'cho cuintsu atte'ma atesu'fambiye; cuintsu paña'ma in'jan'fambiye.

*Gaiña jon'sune ma'caen in'jan'cho*

*(Mt 13.18-23; Mr 4.13-20)*

<sup>11</sup> Condase'cho tsu qquen: Choja Chiga Aya'fa tsu. <sup>12</sup> Majan a'ija tsaiquina sheque'choacan'fa tsu. Chiga Aya'fama pañasi cocoya na'su junde jipa choma itsaquia'caen tise'pa paña'choma aqqepoen tise'pa in'jamba ccushasa'ne. <sup>13</sup> Majan a'ija patupa andenga sheque'choacan'fa tsu. Tseyi Chiga Aya'fama pañamba avujatsse in'jan'fa. Tsa'ma setsa'fa shacaquia'caen injama'cho ta'etssimbi. Re'riccone in'jamba me'detsse canse'ta antte'fa. <sup>14</sup> Cca'ija cho anccosicunga sheque'choacan'fa tsu. Tsendeccuja Chiga Aya'fama pañamba panshaen va ande'su jincho'choma in'jan'fa. Ricove daye in'jan'fa. In'jangae canseye in'jan'fa. Tsa'caen in'jamba Chiga Aya'fama paña'choma fi'ttiqqia'caen tise in'jan'choma nañámbi. <sup>15</sup> Tsa'ma majan a'ija ñotssia andenga jon'choa'caen Chiga Aya'fama pañamba injama'choi'ccu aqqe'pambi'tsse in'jan'fa. Tise'pa injama'choja ñotssisi tsa'caen anttembe'yi ñotsse naqquia'caen canse'fa.

*Tuñoma setsaen'chone condase'cho*

*(Mr 4.21-25)*

<sup>16</sup> A'ija tuñoma setsaemba ombanga apima puviaña'bi. Ni anambacco tsosicunga tuñoma ccutsiaña'bi. Tsa'ma setsaemba sefani ancaña'cho cuintsu poi'i'cco a'i cuar-tonga ca'ni'da ñotsse atte'faye. <sup>17</sup> Tsa'cansi tsangae a'tuya'choja jinchombi. Tsa'ma osha'cho jai'ngae attiansi qui atte'faya. Ni tsangae condayembitsse pasaye'ta jinchombi. Jai'ngae condasesi qui a'tatsse

pañ'a'faya. <sup>18</sup> Tsonsi ñotsse pañamba in'jan'faja. Ma-  
jan tayo in'jan'chota ti'tsse tsu in'jan'faya. Tsa'ma ma-  
jan in'jambi'choa'ta tise injanga in'jan'choma'qqe tsu  
qqeñaña.

*Jesús antian bo'fa'cho*

*(Mt 12.46-50; Mr 3.31-35)*

<sup>19</sup> Tsonsi Jesús chan, tise quinshingendeccu'qqe  
can'su ji'fa. Tsa'ma tsain'bio a'i shequesi tisenga cats-  
eye osha'fambi. <sup>20</sup> Tsa'caen osha'fambisi cca'ija Jesúsma  
conda'fa:

—Que mama, que quinshingendeccu'qqe tsu tsotefani  
ccutsu'fa quema atteye in'jamba.

<sup>21</sup> Tsama pañamba Jesúsja su:

—Poiyi'cco majan Chiga Aya'fama pañamba tsa'caen  
tson'da ñoa'me ña mama, ña quinshingendeccu'fa  
tsu.

*Jesús fingian, shave'pama iyu'u'cho*

*(Mt 8.23-27; Mr 4.35-41)*

<sup>22</sup> Fae a'ta Jesús, tise ma shondosundeccu'qqe  
shavonga otse'fa. Jesúsja tise'pama su:

—Jinge mar jonifani ise'faye.

Tsa'caen susi ja'fa. <sup>23</sup> Fingian shavoma angajisi  
Jesúsja ana. Fingian ti'tsse quia'me fingiansi tsa'ccu  
shavonga ca'nisi a'ija cu'nosa'ne dyo'fa. <sup>24</sup> Dyopa Jesúsma  
qquendyaemba su'fa:

—Na'su, Na'su cu'nomba gi paye tson'jen'fa.

Tsonsi Jesúsja qquendyapa fingiama iyu'usi pasa.  
Rande shave'pama'qqe iyu'usi ppimppianccuve da.

<sup>25</sup> Tsomba Jesúsja su:

—¿Mingapa qui ñame in'jan'fambi?

Tise'paja dyopa Jesúsma can'boemba qqen con-  
dasecco'fa:



—¿Majan tsu va a'ija? Tise mandasi fingian, shave'pa'qqe tisema paña'fa.

*Gadara ande'su cocoya ca'ni'cho*

*(Mt 8.28-34; Mr 5.1-20)*

<sup>26</sup> Tsomba Galilea ande isevetsse ccattufa'fa Gadara andeni. <sup>27</sup> Jesús shavo'ye sombosi fa'e tsa ande'su a'i tisema cachuiye ji. Táyoyi cocoyaja tisenga ca'nisi chu'cco jacamba tsaoni can'jembipa ayandeccu atú'ttini can'jen. <sup>28-29</sup> Jesúsma attepa fundopa Jesús tsutteccofanga ccarupa dyai. Nane tsain'bitssi cocoya tsa a'inga ca'nisi canque-sundeccuja tisema coiraye candena yoshavai'ccu tandamba an'bian'fa. Tsa'ma cocoya ca'ni'choja candenama oppattu catisi cocoya tisema anga a'i menia. Jesúsja tsa a'i'ye joqqitssiye cocoyama mandasi a'ija quia'me fundopa su:

—Joccapitssia Chigambe Dutssi'ye qui, Jesús. ¿Jongoesie qui ñani ji? Chigáne ñama noñangianjama.

<sup>30</sup> Tsonsi Jesúsja cocoyama iñajampaña:

—¿Jongoesu inise qui?

Tiseja su:

—Legión (Injantssia Sundarondeccu) gi.

Tsain'bitssi cocoya ca'ni'chopa tsu tsa'caen su.

<sup>31</sup> Qquen supa cocoyandeccuja Jesúsma iñajan'fa cocoya can'jeni tise'pama moembe cañe. <sup>32</sup> Tse'tti ccotta'cco piyiccu'fani tsain'bitssi cochi an sheque'fasi cocoyandeccuja Jesúsma iñajan'fa cuintsu cochinga tise'pama mandaye. Iñajansi Jesús tsa'caen anttesi <sup>33</sup> cocoyandeccuja a'i'ye sombopa cochinga ca'ni'fa. Ca'nisi cochi sheque'cho sumbie dapa fattocócufanga butto amppi'fa marnga. Tsomba andeccopa pa'fa.

<sup>34</sup> Cochima coirasundeccu cochi sumbie da'choma atepa buttoccoin ja'fa canqueni. Tse'tti can'jensundeccu, biacca can'jensundeccunga'qqe conda'fasi <sup>35</sup> aindeccuja

ma'caen da'choma can'su ja'fa. Jesúsni jipa cocoya ca'ni'cho a'i ccusha'choma atte'fa. Tiseja ondiccupa ñotsse in'jamba Jesús tsu'tte jin'ttinga dyai. Tisema atepa poiyyi'cco a'i dyo'fa. <sup>36</sup>Dyo'fasi tseni can'jensundeccu cocoya ca'ni'cho ma'caen ccusha'choma atepa poiyyi'cco a'inga conda'fa. <sup>37</sup>Tsa'caen condasesi poiyyi'cco tsa Gadara andesundeccu ñoa'me dyopa Jesúsma iñajan'fa cuintsu tise'pa ande'ye sombopa ccani jaye. Tsonsi Jesúsja shavonga otsepa toequi shanda. <sup>38</sup>Tayoe cocoya ca'ni'cho a'i ccusha'choja Jesúsma iñajan fae'ngae jaye. Tsa'ma Jesúsja tisema mandamaña qquen supa:

<sup>39</sup>—Que tsaoni toequi shandapa poiyyi'cconga condaseja ma'caen Chiga quema mende'yepa tson'choma.

Tsa'caen mandasi tiseja japa poiyyi'cco tsa canquesundeccunga conda ma'caen Jesús tisema ccushaen'choma.

*Jesús Jairo onque'ngema ccushaen*

*Ondiccu'jema pporaemba ccusha'cho*

*(Mt 9.18-26; Mr 5.21-43)*

<sup>40</sup> Jesús Galilea andeni toequi shandasi a'i bopa tise've rondasundeccu avujatsse tisema chigambian'fa.

<sup>41</sup> Tson'jen'ni Chigane atesian'jen'tti'su na'su, Jairo, jipa Jesús tsutteccofanga ccaru dyaipa Jesúsma iñajan cuintsu tise tsaoni jaye. <sup>42</sup> Tseni tise onque'nge fae'cco pa-jipa ccuipa paye tson'jen. Tsaja doce canqqe'fave an'bian'cho.

Jesús Jairoi'ccu jayisi tsain'bio a'i fae'ngae jayipa ñoa'me ta'yotssi. <sup>43</sup> Tsendeccu enttinge'ye pushesu'qqe jayi. Tsa pushesuja tise egápai'ccu dañongepa doce canqqe'fa me'detsse canse. Ccushambe'yi pa'cco tise corifin'dima afepoen cati sejesundeccunga. <sup>44</sup> Tsaja sepa-ccofae Jesúsnga catsepa tise ondiccu'je utufama pporaen. Pporaensi tse'faei'ccuyi tise egápaja samba.

<sup>45</sup> Tsa'caen tsonsi Jesúsja ñajampaña:

—¿Majan tsu ñama pporaen?

Tsa'ma poiyyi'cco a'i pporaembi qqen su'fa. Poiyyi'cco tsa'caen su'fasi Pedroja su:

—Na'su, vui'o a'imbipa shoquendipa ppororaensi, ¿ma'caen qui su: “¿Majan tsu ñama pporaen?”?

<sup>46</sup> Tsa'ma Jesúsja su:

—Fae'cco ñama pporaemba ccusha. Tayo gi in'jan ña ccushaen'jen'cho ña'ñe somboqquia'caen a'ima ccushaen.

<sup>47</sup> Tsonsi pushesuja Jesús tayo atesu qqen in'jamba ttun'dundu'je japa Jesúsnga catsepa tise tsutteccofanga ccaru dyai. Tsomba poiyyi'cconga condase tise in'jama'choni in'jamba Jesúsma pporaemba tse'faei'ccuyi ccusha'choma. <sup>48</sup> Tsonsi Jesúsja tisema su:

—Shim'ppi, ñame in'jamba qui ccusha. Opatse canseja.

<sup>49</sup> Jesús toya pushesui'ccu condase'je'ni faesu a'i na'su Jairo tsaone jipa Jairoma su:

—Tayo tsu que onque'ngeja pa'ya. Ti'tsse atesian'suma noñangiambe ántteja.

<sup>50</sup> Tsama pañamba Jesúsja Jairoma su:

—Dyombe canjan. Que ñame in'jan'ninda tsu que onque'ngeja ccushaya.

<sup>51</sup> Tsaoni napipa Jesúsja se'pi poiyyi'cco a'i tisei'ccu ca'niñe. Tsa'ma Pedro, Santiago, Juan, du'shumbe yaya, du'shumbe mamama'qqe angapa tsa'onga ca'ni'fa.

<sup>52</sup> Poiyyi'cco tsaonisundeccu qqejeccopa ina'jen'fasi Jesúsja su:

—Ina'fajama. Du'shuja pambi'tsse'yi ana'jen.

<sup>53</sup> Tsa'ma tayo ñoa'me pa'chosi in'jamba Jesúsma feña'fa. <sup>54</sup> Tsonsi Jesús du'shu tive'ye indipa tisema qqquendyañe ttu'se:

—Du'shu, jangija.

<sup>55</sup> Qquen susi tise qquendya'pa toequi jisi tse'faei'ccuyi du'shuja jangi. Tsonsi Jesúsja manda cuintsu du'shuma o'fiañe. <sup>56</sup> Du'shumbe yaya, du'shumbe mama'qqe can'boen ccutsu'fa. Tsa'ma Jesúsja tise'pama manda cuintsu cca'indeccunga condambe can'faye.

## 9

### *Candusiañe manda'cho*

*(Mt 10.5-15; Mr 6.7-13)*

<sup>1</sup> Jesús tisema doce shondosundecuma ttu'se boñamba tise'pama in'jaemba manda osha'cho cocoyama joqqitssiañe, pajisundecuma ccushaen'faye.

<sup>2</sup> Tsomba tise'pama mandamaña cuintsu japa ma'caen Chiga aindecuve dapa canseya'chone candusiamba pajisundecuma'qqe ccushaen'faye. <sup>3</sup> Tise'pama su:

—Me'ccoyi jaja'faja. Ni jacan'cho accuicco'cho, ni o'va, ni anqqe'su, ni corifin'di, ni faesu ondiccu'jema anga'fajama. <sup>4</sup> Majan tsa'onga ca'ni'da tse'ttiniñi can'jen'faja canqqueni sombopa jaya'ngae. <sup>5</sup> Ma'tti pañañe in'jan'fambisi tse'ttie sombo'ta tsu'ttenga ancamba totopa'ma fanttundu'faja tise'pa egae tson'choma canjañe.

<sup>6</sup> Tsonsi tsendecuja sombopa cca'tti cca'tti poi canqquenga japa Chiga ñotsse condase'choma candusian'fa. Mani ja'a'qqe pajisundecuma ccushaen'fa.

### *Na'su Herodes feti'su Juanma fi'tti*

*(Mt 14.1-12; Mr 6.14-29)*

<sup>7</sup> Ande na'su Herodes osha'cho Jesús tson'choma pañamba injama'choni dyo. Majan a'ija “Feti'su Juan'ñe ccase qquendya” qqen tsu in'jan'fa. <sup>8</sup> Cca'indeccuja: “Tayopi'su Chiga Aya'fama afa'su Elías tsu attian” qqen

tsu in'jan'fa. Toya'caen: “Tayopi'su Chiga Aya'fama afa'su ccase qquendya,”<sup>9</sup> Tsa'ma Herodesja su:

—Tayo gi Juan tsovema chattuye mandasi tsu fi'tti. Tsa'ma ¿majan tsu va ña osha'chone paña'jen'cho?

Qquen asi'ttaemba dyopa Jesúsma atteye in'jan.

*Jesús cinco mil a'ima o'fian'cho*

*(Mt 14.13-21; Mr 6.30-44; Jn 6.1-14)*

<sup>10</sup> Jesúsne afasundeccu candusiañe japa toequi jipa tise'pa osha'cho tson'choma Jesúsnga condase'fa. Tsonsi Jesúsja tise'pama ccani anga. Betsaida canqqe pporotsse japa can'jen'fa. <sup>11</sup> Tsa'ma a'i bo'fa'choja Jesús mani ja'choma pañamba omboe jaja'fa. Tsonsi Jesúsja tise'pama avujatsse chigambiamba ti'tsse ma'caen Chiga aindeccuve dapa canseya'chone candusian. Pajisundeccuma'qqe Jesúsja ccushaen.

<sup>12</sup> Tayo chiga ondusesi tsa doce Jesúsne afasundeccu tisenga jipa su'fa:

—Aindeccu bo'fa'choma mandamañajan cuintsu canqqeni, cca'tti'su tsaoni'qqe japa amba ana'faye. Nane vanijan a'i menia gi can'jen'fa.

<sup>13</sup> Tsa'ma Jesúsja tise'pama su:

—Que'i tise'pama o'fian'faja.

Tsa'ma su'fa:

—Nane cinco panmeñi dos avuveyi gi an'bian'fa. ¿Queta ti qui in'jan ingi japa anqqe'suma chavapa poi'cco vandecuma o'fiañe?

<sup>14</sup> Nane tsandiendeccuyi tsu cinco milca'on can'jen'fa. Tsa'ma Jesúsja tisema shondosundeccuma su:

—Aindeccuma manda'faja cuintsu cca'tti cincuenta cca'tti cincuenta bopa dyai'faye.

<sup>15</sup> Tsa'caen mandasi a'i dyai'fasi <sup>16</sup> Jesúsja tsa cinco pan, dos avuma isupa Chiga sefacconima asuccocan. Asuccocamba Chiga tsu ñotssia qquen afapa pan, avuma'qqe doñamba tisema shondosundeccunga afe cuintsu aindeccunga attufaen'faye. <sup>17</sup> Tsonsi poiye'cco a'i amba tteppu'fa. Jesúsma shondosundeccuja pan, avu antt-eye'cho sheque'pama taipa doce saparove on'boen'fa.

*Pedro Jesúsja Cristo qquen conda'cho*

*(Mt 16.13-19; Mr 8.27-29)*

<sup>18</sup> Fae a'ta Jesús tisema shondosundeccui'ccu tisuyi Chigama ñajam'jen. Tsomba Jesúsja tise'pama ñajampaña:

—¿Majan qquen tsu ñamajan faesu a'ita su'fa?

<sup>19</sup> Tise'paja su'fa:

—Majanda tsu su'fa: “Feti'su Juan.” Cca'ija: “Tayopi'su Elías.” Cca'ija: “Tayopi'su Chiga Aya'fama afa'su ccase qquendya'cho.”

<sup>20</sup> Tsonsi Jesúsja tise'pama ñajampaña:

—Tsa'ma que'ija, ¿majan qquen qui ñamajan su'fa?

Tsonsi Pedroja su:

—Queja Chiga in'jan'cho Cristo qui.

*Jesús tisu paya'chone conda'cho*

*(Mt 16.20-28; Mr 8.30-9.1)*

<sup>21</sup> Qquen susi Jesúsja tise'pama quia'me manda cuintsu majangayi'qqe condambe can'faye. <sup>22</sup> Qquen tsu su:

—Sefaccone Ji'cho A'i gi osha'choi'ccu vanaña. Ingi ande'su coenzandeccu, Chigama afa'su nasundeccu, Chiga Aya'fama atesiansundeccu'qqe ñama chi'ga'faya. Ñama fi'ttisi papa gi tres a'tangae ccase qquendyaya.

<sup>23</sup> Toya'caen Jesúsja poiye'cco a'ima su:

—Majan a'i ñai'ccu fae'ngae jiye in'jan'chota, tisu in'jan'choma tsu catiya'cho. Tisu avuja'ccoma

opiquia'caen tsu tiseja poi a'ta ña'caen paya'ngae vanaña'cho. Toya'caen ñai'ccu fae'ngae jacaña'cho. <sup>24</sup> Majan a'i tisuma ccushaeñe in'jan'da tsu papa catiyeya. Tsa'ma majan ñame in'jamba pa'ta ñoa'me tsu ccushaya. <sup>25</sup> A'i poi'ccoma patsupa osha'choma an'biamba toya'caen tisuma qqueña'ninda, ¿jongoesune tsu bareya? <sup>26</sup> Majan a'ija ñane, ña aya'fane'qqe ansange'fa. Tsa'ma ña, Sefaccone Ji'cho A'i gi ccase jipa ccane'qqe tise'pane ansangeya. Ña joccapitssia've dapa attiansi Chiga ña Quitsaja ñama ñotssiave canjaeña. Sefacconi'su ñotssia Chigama shondosundeccu'qqe ñama ñotssiave canjaen'faya. <sup>27</sup> Jai'ngae tsu tsa'caen tsoña'cho. Tsa'ma majan que'i'su toya pambi'te qui Chiga aindeccuve daya'choma atte'faya.

*Jesús ccaningae da'cho*  
(Mt 17.1-8; Mr 9.2-8)

<sup>28</sup> Tsa'caen supa ocho a'ta'caen pasasi Jesúsja Pedro, Juan, Santiagoma'qqe anga ccotta'cconi Chigama iñajañe. <sup>29</sup> Jesús Chigama iñajansi tsu tise cambajuja ccaningae da. Tise ondiccu'je'qqe chhariccotssia totoave da. <sup>30-31</sup> Dos a'i'qqe a'tatssia've attiamba Jesús'ccu condase'je'fa. Tsendeccuja tayopi'su Moisés, tayopi'su Elías'qqe. Jesús Jerusaléni japa paya'chone tsu condase'je'fa. <sup>32</sup> Pedro, tise'ccu fae'ngae can'jensundeccu'qqe anae'supa anae'su'je'ttie qquendyapa Jesús ñotssia a'tatssia've da'choma atte'fa. Jesús'ccu fae'ngae ccutsusundeccuma'qqe atte'fa. <sup>33</sup> Tsendeccu Jesúsma chigambiamba jaye tson'jensi Pedroja Jesúsma su:

—Na'su, ñotssi tsu ingi va'tti can'jeñe. Jinge tres tsao'cho'ccoe tsao'ña'faye -fae'cco quembe, faesuja Moisésmbé, faesuja Elíasmbé.

Pedroja tisu su'choma atesumbi'ma injanga afa. <sup>34</sup> Tsa'caen susi ccuttopa'si tise'pama picco. Tsa'caen piccosi Jesúsma shondosundeccuja dyo'fa. <sup>35</sup> Ccuttopa'si'ye aya'faja qquen afa:

—Vaja ña in'jan'cho Dutssi'ye tsu. Tisema paña'faja.

<sup>36</sup> Aya'fa qquen afa'nijan Jesúsja tisuyi ccutsu. Shondosundeccuja tsama atte'ma condambi'tsse can'jen'fa. Nane Jesús toya can'jeinte cca'indeccunga tsama conda'fambi.

*Shanccopajasheve da'cho du'shu*

*(Mt 17.14-21; Mr 9.14-19)*

<sup>37</sup> Ccaqui a'ta ccotta'cco'ye andesi tsain'bio a'i tisema cachui'cco'fa. <sup>38</sup> Fa'e tse'tti can'jen'choja fundondo'e afa:

—Atesian'su, chigáne ña du'shuma mende'yeja. Ña dutssi'yeja fae'cco'a tsu. <sup>39</sup> Cocoya tisema indi'nijan tse'faei'ccuyi fundopa cunshomboen dapa aya'fa'ye ttotomboemba pa'je. Cocoyaja anttembe'yi tisema ma'dyisi si'ma'en da. <sup>40</sup> Tsama somboeñe quema shondosundecuma iñajansi tise'paja osha'fambi.

<sup>41</sup> Tsa'caen susi Jesúsja su:

—Que'i ja'ño'su aindeccuja itoyetsse in'jamba Chigave in'jambindeqquia qui. ¿Min'ge'e gi tsuin'da quei'ccu can'jemba angacaña? I'ngaja que dutssi'yema.

<sup>42</sup> Du'shu jiñasi cocoyaja tisema mandyi indi pan'jaen. Tsa'ma Jesúsja cocoyama iyu'upa du'shuma ccushaemba tise yayanga afe. <sup>43</sup> Tsa'caen ccushaensi poi'yi'cco a'i can'boemba in'jan'fa Chigaja ti'tsse'tssia've.

*Jesús tisu paya'chone ccase conda*

*(Mt 17.22-23; Mr 9.30-32)*

Aindeccu toya tsa'caen Jesús tson'choma camboen'jen'fa'ni Jesúsja tisema shondosundecuma su:



<sup>44</sup> —Va condase'choma ñotsse pañamba in'jan'faja: Ña-  
jan Sefaccone Ji'cho A'i. Tsa'ma ñama indipa a'inga  
afe'faya cuintsu fi'tti'faye.

<sup>45</sup> Jesús tsa'caen tisune condasesi paña'ma atesu'fambi.  
Nane ccaningae in'jamba ñoa'me su'choma atesuye  
osha'fambi. Toya'caen dyojopa tise su'chone Jesúsma  
iñajampaña'fambi.

*¿Majan tsu ti'tsse joccapitsia?*

*(Mt 18.1-5; Mr 9.33-37)*

<sup>46</sup> Tsomba Jesúsma shondosundeccu tisupaporai'ccu  
majan tsu ti'tsse'tssia qquen afacco'fa. <sup>47</sup> Tsa'ma Jesús  
tise'pa injama'cho in'jan'choma in'jamba du'shuma ipa  
tisu'ttinga ccutsiamba <sup>48</sup> su:

—Majan ña a'ive dapa va du'shuma ñoa'me in'jan'da tsu  
ñama'qqe ñoa'me in'jan. Majan ñama ñoa'me in'jan'da  
tsu ñama moen'su Chigama'qqe ñoa'me in'jan. Majan  
que'i'su utu'coa'ta tsaja ñoa'me ti'tsse'tssia tsu.

*Majan chi'gambi'ta fuite'su tsu*

*(Mr 9.38-40)*

<sup>49</sup> Juanjan pañamba su:

—Na'su, atte'fa gi a'i'ma que inisema afapa cocoyama  
joquitssian'jen'choma. Tsa'ma tise ingi'ccu fae'ngae  
jacambisi gi tisema se'pi'fa.

<sup>50</sup> Tsa'ma Jesúsja su:

—Tisema se'pi'fajama. Majan que'ima chi'gambi'ta  
que'ima fuite'su tsu.

*Jesús Santiago, Juanma iyu'u'cho*

<sup>51-52</sup> Tisu papa sefacconi jaya'cho pan napijisi Jesúsja  
tansintsse Jerusaléni jaye ashaen. Tisema o'tie a'ima  
moensi japa Samaria ande'su canqqueni ca'ni'fa tsa'ove  
afaye. <sup>53</sup> Tsa'ma Samariasundeccuja Jesús Jerusaléni jayi  
qquen pañamba se'pipa tsa'oma afe'fambi. <sup>54</sup> Tsonsi

Jesúsma shondosundeccu, tsa Santiago, Juan'qqe pañamba iyicca'yepa su'fa:

—Na'su, ¿in'jan ti qui ingi Elías'caen Chigama ñajañe cuintsu si'nge sefaccone amppipa va samariasundeccuma oque catiye?

<sup>55</sup> Tsa'ma Jesúsja piyicamba tise'pama iyu'upa su:

—¿Atesu'fambi ti qui que'inga ca'ni'cho Qquendya'pama? <sup>56</sup> Sefaccone Ji'cho A'i gi jimbi a'ima fitti'ttiye. Tsa'ma a'ima ccushaeñe gi ji.

Qquen supa faesu canqqueni ja'fa.

*Jesúsi'ccu fae'ngae jacansundeccu*

*(Mr 8.19-22)*

<sup>57</sup> Tsaiqui'ye jayisi a'ija Jesúsma su:

—Na'su, mani que ja'ni'qqe ña'qqe fae'ngae jaya.

<sup>58</sup> Jesúsja tisema su:

—Quiyata tsu tise'pa ana'jen'cho changove an'bian'fa. Chhiriria'qqe tise'pa tsao'pave an'bian'fa. Tsa'ma Sefaccone Ji'cho A'i gi mani japa anaña'chove an'biambi.

<sup>59</sup> Cca'ima Jesús qquen su:

—Ñai'ccu fae'ngae jija.

Tsa'ma tsa a'ija su:

—Na'su, shondo'jeja. Ña yaya pasi a'tupa gi quei'ccu jaya.

<sup>60</sup> Tsa'ma Jesúsja tisema su:

—Antteja cuintsu ñame in'jambindequua tsa'caen vasepa pa'chondeccuma a'tuye. Tsa'ma queja ñame in'jamba japa ma'caen Chiga aindeccuve dapa canseya'chone condaseja.

<sup>61</sup> Faesu a'ija su:

—Na'su, ña gi quei'ccu fae'ngae jaya. Tsa'ma o'tie tsaoni japa gi ña antiama chigambiamba jiya.

<sup>62</sup> Tsa'ma Jesúsja tisema su:

—A'ija vaurai'ccu andema chhochho'jepa sepacconima piyican'da tansintsse jaye oshambi. Tsa'caen majan a'i ñame in'jamba toya'caen tayo'su in'jan'choma in'jan'da Chiga a'ive daye oshaya'bi.

## 10

### *Jesús setentama manda moen'cho*

<sup>1</sup> Omboe Jesúsja faesu setenta tisema shondosundecuma ttu'sepa mani tisu jaye tson'jen'ni dosve dosve mandamaña. Majan canqqueni tise jayani tsendeccuma o'tie mandamaña. <sup>2</sup> Tise'pama su:

—Nasipanga jon'cho cu'chosi taiya'cho napiquua'caen tsu a'ija pañañe ronda'je'fa. Tsa'ma taisundeccu shacaquua'caen tsu Chiga ñotsse condase'choma condasesundeccuja shaca. Chiga Quitsaja taiya'cho na'su tsu. Tisema ñajan'faja cuintsu ti'tsse'o a'ima ttu'sesi fuite'faye. <sup>3</sup> Que'ija vama in'jamba jaja'faja: Oveja du'shuma ttesi andenga mandamañaquua'caen gi que'ima mandamaña'jen. <sup>4</sup> Tsa'ma corifin'di bosama angajama. Ni o'va, ni sapatoma angajama. Tsaiqui'ye japa cca'indeccuma bia've chigambian'fajama. <sup>5</sup> Majambe tsa'onga ansunde'ta na'suma chigambian'faja cuintsu opatsse canseye. <sup>6</sup> Chigave in'jan'chondeccu tseni can'jen'da tsu que'i chigambian'choma pañamba tsa'caen opatsse canse'faya. Tsambi'ta chi'ga'fasi que'i su'cho toequi shandasi qui que'i opatsse canse'faya. <sup>7</sup> Majan tsa'onga ca'ni'da tse'tti can'jen'faja. Can'jamba tise'pa anqqe'suma an'faja. Tise'pa cui'ccuma cu'i'faja. Nane sema'su semasi tsu afepoeña'cho. Que'ija atesiansi tsu o'fiaña'cho. Cca'tti cca'tti faesu tsa'onga ja'fajama. <sup>8</sup> Tsa'ma fae canquenga ca'nimba que'ima ñotsse chigambiansi tise'pa que'inga afe'cho anqqe'suma an'faja. <sup>9</sup> Tise'pani'su pajisundeccuma ccushaen'faja.

Tsenisundeccunga conda'faja: “Ca'tsa tsu napiji que'i Chiga aindeccuve da'faya'cho.” <sup>10</sup> Tsa'ma majan canquenga ca'nisi ñotsse chigambian'fambian'da tsa canque'su atandunganga japa tsa'su a'ima qqen condase'faja: <sup>11</sup> “Que'i ingima chi'gasi ccane'qqe gi va canque'su andema chi'ga'fa. Nane ingi tsu'ttema'qqe gi ccucha'fa. Va ccuchaye'je'cho ande tsu que'i egae tsincon'choma canjaen. Tsa'ma Chiga aindeccuve daya'choja ca'tsa napiji qqen condasesi qui ja'ño tayo paña'fa.” <sup>12</sup> Ñoa'me gi su maqui a'ta Chiga a'i injama'choma somboe'nijan tsa canqquesundeccu tsu bove dyo'otsse da'faya. Nane tayopi'su Sodoma canque'su egae tsinconsundeccuma bove dyo'otsse tsu da'faya.

*Majan canqquesundeccu paña'fambi  
(Mt 11.20-24)*

<sup>13</sup> ¡Vana'faya qui Corazín canqquesundeccu! ¡Vana'faya qui Betsaida canqquesundeccu! Que'ija ñotsse Chiga tson'choma atte'fa. Nane Chiga tsa'caen Tiro, Sidón canquema tsoña'choecan'da tsu junde tseni'su aindeccuja tise'pa egae tsincon'choma chi'gapa Chigama iñajan'faye'can. Nombi'ye'choma canjaenqqe'su sarupama ondiccupa cusepai'ccu tsu onjon'faye'can tise'pa in'jan'choma canjaeñe. <sup>14</sup> Tsa'ma injama'choma somboeña'cho a'ta napisi Tiro, Sidón canqquesundeccuja que'ima bove aye'pambi'ccoe vana'faya. <sup>15</sup> Toya'caen que'i Capernaum canqquesundeccu: ¿Asi'ttaen'fa ti qui Chiga que'ima in'jamba sefacconi angaye'ja? Me'i, tsa'ma si'nge anchanda'je'chonga tsu que'ima catiya.

<sup>16</sup> Majan que'ima paña'da ñama tsu paña'fa. Majan que'ima chi'ga'ta ñama tsu chi'ga'fa. Majan ñama

chi'ga'ta ñama moen'su Chiga Quitsama'qqe tsu chi'ga'fa.

*Setenta toequi jipa conda'fa'cho*

<sup>17</sup> Tsa setenta Jesúsma shondosundeccu ja'fa'cho toequi jipa avujatsse bopa su'fa:

—Na'su, que inisema afapa gi osha'choma manda'fa. Cocoyama'qqe a'ye somboye mandasi tsu sombo'fa.

<sup>18</sup> Tsa'caen susi Jesúsja tise'pama su:

—Ju ñoa'me tsanda veyenqquia'caen Satana sefaccone amppi'choma gi atte. <sup>19</sup> ¡Que canjan! Tayo gi antte que'ija tini, iyonga tsui'a'qqe qui vana'faya'bi. Que'ima chi'gasundecuma qui patsu'faya. Me'i'on tsu jongoesu que'ima dañña'chove. <sup>20</sup> Tsa'ma tsa'caen cocoya que'ima pañamba sombo'fa'ni'qqe panshaen avuja'fajama. Que'i Chiga a'ive dasi tsu Chigaja que'i inisema sefacconi tevaen. Tsane avujatssi'faja.

*Jesús avuja'cho*

*(Mt 11.25-27; 13.16-17)*

<sup>21</sup> Tse'faei'ccuyi Chiga Qquendya'pa Jesúsma in'jaensi avujapa Chiga Quitsama qquen afa:

—Yaya Chiga Quitsa, Que qui sefacconi'su Na'su. Pa'cco ande'su Na'su qui. Tsa'ma va ande'su injama'pandeqquianga qui tisuma canjaembi. Atesu'chondeccunga canjaembipa qui va aindecunga tisuma canjaen. Ñotssia du'shu pañaqquia'caen tise'paja ñotsse pañamba in'jan'fa. Yaya, ñotsse qui tson. In'jamba que tsa'caen anttesi gi avujatssi.

<sup>22</sup> Tsa'caen Chigama ññajamba Jesúsja su:

—Tayo tsu ña yayaja osha'choma ñanga afe. Cca'i ñama atesu'fambisi Chiga Quitsayi tsu ñama atesu'cho. Ññajan Tise Dutssi'ye. Toya'caen cca'ija Chiga Quitsama atesu'fambisi ñañi gi Tisema atesu'cho. Tiseja ña yaya tsu.

Toya'caen ñajan Chiga Dutssi'yepa gi majama in'jan'da tsanga condase cuintsu tsendeccu'qqe Chiga Quitsama atesu'faye.

<sup>23</sup> Tsomba Jesúsja piyicamba tisema shondosundecunga a'tutsse su:

—Que'i tso'fei'ccu osha'cho va tson'choma atepa qui ñoa'me avujatssi'fa. <sup>24</sup> Ñoa'me gi su: Tayopi'su nasundeccu, tayopi'su Chiga Aya'fama afasundeccu'qqe que'i atte'choma atteye in'jan'ma osha'fambi. Que'i paña'jen'choma pañañe in'jan'ma osha'fambi.

*Ño'a samaritanone condase'cho*

<sup>25</sup> Tsonsi Chiga manda'choma atesu'cho jangi ccutsupa Jesúsma qqeñañe in'jamba su:

—Na'su, ¿jongoesuma gi tsoña tsangae canseye'ta?

<sup>26</sup> Jesúsja tisema su:

—¿Jongoesu qquen tsu Chiga manda'choja su? Queja Chiga tevaen'jema zutsse can'da ¿jongoesu qquen qui in'jan?

<sup>27</sup> Tiseja pañamba su:

—Na'su que Chigama ñotsse in'jaña'cho. Nane pa'cco injama'choi'ccu, pa'cco que in'jan'choi'ccu, pa'cco que quin'sui'ccu tsu Na'su Chigama ñotsse in'jaña'cho. Toya'caen faenga'suma tsuma'caen ñotsse in'jaña'cho.

<sup>28</sup> Tsonsi Jesúsja tisema su:

—Ñotsse qui in'jamba su. Tsa'caen tson'da qui canseya.

<sup>29</sup> Tsa'ma Chiga manda'choma atesu'choja toya Jesúsma qqeñañe in'jamba tsu condase'chone ti'tsse iñanjampaña:

—¿Majan tsu “ña faenga'suta”?

<sup>30</sup> Tsonsi Jesúsja su:

—A'i Jerusaléne sombopa Jericó canqqueni ande jisi ccanambandeccuja tisema indi'fa. Indipa tsu pa'tssima

cca'na'fa. Tise ondiccu'je'cho sarupama'qqe oshich-haemba tisema ochhai iñaccaen'fa. Paye tson'jen qquen in'jamba tisema catipa ja'fa. <sup>31</sup> Tsama atesumbi'ma Chigama afa'su'qqe tsa tsaiqui'ye jayipa ccanange'suma atte'ma catseme'yi tsaiqui ccafa'su utufa'ye tsui panshamba ja. <sup>32</sup> Toya'caen Leví a'i'qqe tsangae napipa a'ima atte'ma ccafa'su utufa'ye panshamba ja. <sup>33</sup> Tsonsi fa'e samaria'su a'i'qqe tsu tsaiqui'ye jayipa atte. Nane samariasundeccu israendecui'ccu ñotsse jincho'fambi. Tsa'ma tsa samaria'su a'ija ccanange'suma atepa mende'ye. <sup>34</sup> Mende'yepa catsepa vino, yayapai'ccu tise iñacca'choma se'je. Se'jepa sarupai'ccu tandan. Tsomba tisu boronga a'ima otsian dyaiñamba anga jacansundeccu ana'jen'cho tsa'onga. Tseni tisema coira'je. <sup>35</sup> Ccaqui a'ta jaye tson'jemba tsa'o na'suma ttusepa cincuenta corifin'dive afepa su: “Tisema ñotsse coiraja. Tisema coiraye ti'tsse chavasi shaca'nijan ña toequi jayipa gi pa'ccoma quenga afepoeña.” <sup>36</sup> Jen'da, va tres a'i'su, Chigama afa'su, Leví a'i, samaria'su a'i, ¿majan tsu ñoa'me tsa ccanange'suma “tisu faenga'su” qquen in'jan?

<sup>37</sup> Chiga manda'choma atesu'choja su:

—Tisema mendeye'su tsu “faenga'su” qquen gi in'jan.

Tsonsi Jesúsja su:

—Que'qqe tsa'caen poiya'ccoma ñotsse in'jamba canseja.

### *Jesús can'su ja'cho Marta tsaoni*

<sup>38</sup> Jesús, tisema shondosundeccu'qqe japa faesu canquenga ca'ni'fa. Fa'e pushesuja, Marta, tseni can'jen. Martaja Jesúsma tisei'ccu jacansundecuma'qqe chigambiamba tise tsa'onga ca'nian. <sup>39</sup> Marta que'tte, María, Martai'ccu fae'ngae can'jemba Jesús atesian'jen'choma pañañe in'jamba tise tsutteccofanga

dyaipa paña'jen. <sup>40</sup> Tsa'ma Martaja osha'choma ñoñañe tisuyi vase'jepa iyicca'yepa Jesúsnga jipa su:

—Na'su, in'jambi ti qui ña que'tte ñama catisi gi tisuyi vase'je. Tisema mandaja cuintsu ñama fuiteye.

<sup>41</sup> Tsa'ma Na'su Jesús Martama su:

—Marta, Marta, iyicca'yembe canjan. Panshaen qui asi'ttaemba osha'chove ñoñañe vase'je. <sup>42</sup> Ingima cui'ñambayi antteja. Maríata tsu ñotssiamá in'jamba paña'jensi gi tisema se'pimbi.

## 11

### *Chigama ñajaña'chone atesian'cho*

*(Mt 6.9-15; 7.7-11)*

<sup>1</sup> Maquita Jesúsja Chigama ñajan'jen. Ñajan nanisi fa'e tisema shondo'suja jipa su:

—Na'su, ingima atesianjan ma'caen Chigama ñajaña. Nane feti'su Juanjan tisema shondosundecuma tsa'caen atesian. <sup>2</sup> Tsonsi Jesúsja tise'pama su:

—Que'ija Chigama ñajaña in'jan'da qqen su'faja: Sefacconi Canjen'su Na'su, ingi Quitsa, que qui ñoa'me joccapítssia.

Que inise tsu egave metssipa ti'tsse'tssia.

Queyi Na'suve dapa poima mandaja.

Que in'janqquia'caëni pa'cco tsu jinchoja.

Que sefacconi mandaqquia'caen va andeni'qqe mandaja.

<sup>3</sup> Poi a'ta coirapa ingima an'bianjan ingi cu'ipa amba canseye.

<sup>4</sup> Ingi quema egae tsincomba shacaen'choma aqqepoenjan,  
ingima egae tsincomba shacaensundecuma aqqepoenqquia'caëni.

Ingi egae tsinconsa'ne ottuni ttupa coiraja.



Tsomba osha'cho ega'ye ingima ccushaenjan.

<sup>5</sup> Tsomba Jesús tisema atesiamba su:

—Va aquia condase'choma asi'ttaen'faja: Majan que'i'su enttinge cose faenga'su tsaoni japa qquen tsu su: “Ccashe'ye, tres panme ñanga afeja. <sup>6</sup> Faesu ña amigo biani jacamba ña tsa'onga napisi gi ñajan jon-goesuma o'fiaña'chove mecho.” <sup>7</sup> Qquen susi tsu suya: “Ñama noñangianjama. Tayo sombo'ttima piccopa gi ña dushundecui'ccu ana'jen'fa. ¿Ma'caen gi ja'ñojan jangipa panma quenga afeya?” <sup>8</sup> Tsa'ma ñoa'me gi su, tiseja tisu amigombi'ma'caen jangipa quenga afem-bipa pashaen noñangiansa'ne tsu jangipa osha'cho que in'jan'choma afeya. <sup>9</sup> Tsa'cansi gi que'inga su: Iñajan'ninda tsu Chigaja afeya. Ttatta'ta qui atte'faya. Sombo'ttima tssai jeña'ninda na'su tsu fettaya. <sup>10</sup> Nane poiyyi'cco majan iñajan'da tsu isu'faya. Poiyyi'cco majan tta'tta'ta tsu atte'faya. Poiyyi'cco majan tssai jeña'da na'su fettasi tsu ca'ni'faya.

<sup>11</sup> Majan que'i'suja du'shuma an'bian'fa. ¿Que du'shu panme iñajan'ninda ti qui patuma afeya? ¿Avuve iñajan'ninda ti qui avuma se'pipa iyoma afeya? <sup>12</sup> ¿Arapandusu'chove iñajan'ninda ti qui tinima afeya? Me'i. <sup>13</sup> Que'ija ño'ambi'a'qqe tsa'caen que'i dushundecunga ñotssiam afeye atesusi ñoa'me tsu Sefacconi'su Na'su Chiga Quitsaja bove ñotssiam afeya. Nane majan Tisema iñajan'ninda tsu tsanga Tise Qquendya'pama afeya.

*A'i Jesúsma afase'cho*

*(Mt 12.22-30; Mr 3.20-27)*

<sup>14</sup> Ayafambie da'choma Jesúsja cocoyama joqqitssian. Cocoya joqqitssisi afa'jembí'choa afa'jesi poiyyi'cco a'i can'boen'fa. <sup>15</sup> Tsa'ma majan a'ija su'fa:

—Cocoya na'su Beelzebú va Jesúsma in'jaensi tsu tsa'caen cocoyama joqquittsiañe osha.

<sup>16</sup> Tsa'ma cca'indeccuja Jesúsma qqueñañe in'jamba tisema ññajan'fa cuintu sefacconi'su canjaen'choma canjaeñe. <sup>17</sup> Tsa'ma Jesúsja a'i qqueñañe in'jan'choma in'jamba tise'pama su:

—Majan ande'su a'i tisupanaccui'ccu chi'gacco'fa'nijan tsa ande tsu népiya. Fae etti'sunaccu iyicco'ta fae'ttini can'jeñe osha'fambi. <sup>18</sup> Tsa'caen Satana tsa Beelzebú qquen su'cho tsuma chi'ga'ta ¿ma'caen tsu tiseja na'sia'caen mandaya? “Beelzebú Jesúsma in'jaensi cocoyama joqquittsian'jen” qquen qui su'fa. <sup>19</sup> Ñama tsa'caen tsa in'jaen'ninda ¿majan tsu que'ima shondosundecuma in'jaen cuintu tise'pa cocoyama joqquittsian'faye? Nane que'ima shondosundecuja que'i qque'choma tsu canjaen'faya. <sup>20</sup> Tsa'ma Chiga Qquendya'pa ñama in'jaensi gi cocoyama joqquittsian'jen. Tsa'caen in'jaemba canjaensi qui Chiga osha'choma oshachopa ma'caen manda'choma atte'fa.

<sup>21</sup> Quin'an a'i tise matichi'ccu tisu tsa'oma ñotsse coira'ninda ¿majan tsu tise an'bian'choma cca'nañe oshaya? Nane Satanajan tsa'can tsu. <sup>22</sup> Tsa'ma faesu tisema ti'tsse quin'an iyiccoye ji'ta tisema tsu patsuya. Nane tsa quin'an a'imbe matichima itsa'ninda ¿ma'caen tsu tsuma ccushaeña? Tisema patsupa tise an'bian'choma angapa attufaeña'cho.

<sup>23</sup> Majan fae'ngae ñai'ccu semambi'ta ñai'ccu iyicco'su tsu. Taya'caen majan ñai'ccu fae'ngae taimbi'ta ñoa'me shequian cati'su tsu.

*Cocoya toequi ca'ni'cho*

*(Mt 12.43-45)*

<sup>24</sup> Cocoyaja a'i'ye joqquittsipa cocoya can'jeni ñombi'ye jacán. Tsa'ma tsa'caen ñombi'yepa oshambipa tsuma

su: “Ña mane somboni gi toequi jaya.” <sup>25</sup> Toequi japa atte tayo tsa'oma funduipa ñoñaquia'caen tsu a'ija ñotsse injienge. <sup>26</sup> Attepa japa tisema bove ega siete cocoyama'qqe i'ngasi poiyi'cco tsu tsa a'inga ca'nimba can'jen'fa. Tsonsi tayoe'ma bove ega tsu tsa a'ine.

*Ñoa'me avujatssiya'cho*

<sup>27</sup> Jesús tsa'caen su'je'ni pushesuja a'i bo'cho'ye fundondo'e tisema su:

—Que mamajan quema isupa coeña'supa tsu ñoa'me avujatssi.

<sup>28</sup> Tsa'ma Jesúsja su:

—Ju, tsa'ma majan Chiga Aya'fama pañamba tson'da tsa tsu ti'tsse avujatssi.

*Aindeccu canjaen'chove iñajan'fa'cho*

*(Mt 12.38-42; Mr 8.12)*

<sup>29</sup> A'i ti'tsse bo'fasi Jesúsja su:

—Ja'ño'su aindeccuja egae in'jamba sefacconi'su canjaen'choma in'jan'fa. Tsa'ma tayopi'su Chiga Aya'fama afa'su Jonás canjaen'chove'yi canjaemba Chigaja faesu canjaen'chove canjaeña'bi. <sup>30</sup> Tayopi'su Jonásja Nínive canque'su aindeccunga Chiga canjaen'chove tsu da. Ñajan Sefaccone Ji'cho A'ipa gi ja'ño'su aindeccunga Chiga canjaen'chove daya. <sup>31-32</sup> Osefaeña'cho a'ta napisi ja'ño'su aindeccuja Nínivesundecuma bove egae tsu canjaen'faya. Tsendecuja Jonásma pañamba tisupa egae tsincon'choma chi'ga'fa. Jonásma ti'tsse'tssia gi ja'ño can'jen'ma qui que'i egae tsincon'choma chi'ga'fambi. Toya'caen tayopi'su Sabá ande na'su pushesuja biane ji Salomón ñotsse in'jamba su'choma pañañe. Osefaeña'cho a'ta napisi tise'qqe ja'ño'su aindeccu bove ega qqen canjaeña. Salomónma ti'tsse'tssia gi ja'ño can'jen'ma que'ija ñama paña'fambi.

*Tso'feja ai'vo'su tuño tsu*  
(Mt 5.15; 6.22-23)

<sup>33</sup> A'ija tuñoma setsaemba a'tu'faya'mbi. Ni cafon tsoiccunga ccutsian'faya'bi. Tsa'ma sefani tsu an-caeña'cho cuintsu majan ca'ni'da ñotsse atte'faye. <sup>34</sup> Que tso'fe'qqe ai'vo'su tuño tsu. Tso'fe ñotssimajan ai'voja a'tatssiani can'jen. Tsa'ma tso'fe ñotssimbian'da ai'voja sinttia'ni can'jen. <sup>35</sup> Tsa'cansi injama'tse, sinttia'ni can'jenquia'caen que'i injama'cho egae in'jaensi egae cansesa'ne. <sup>36</sup> Tsa'ma ai'vo a'tatssiani can'jenquia'caen que'i injama'cho ñotsse in'jaensi egae in'jan'chove me'isi qui ñotsse a'tatsse canse'faya. Tuño a'tatsse attian-qquia'caen tsu que'i tso'feja que injama'choma attian.

*Jesúsja atesiansundeccuma iyu'u*  
(Mt 23.1-36; Mr 12.38-40; Lc 20.45-47)

<sup>37</sup> Jesús afa nanisi fa'e fariseo a'i tisema ttu'se tise tsaoni japa añe. Ttu'sesi japa Jesúsja an'jen'cho mesa jin'ttinga dyai. <sup>38</sup> Jesús añe tson'jemba fariseo in'janquia'caen tivema otishimbisi fariseoja can'boen. <sup>39</sup> Tsa'ma Na'su Jesúsja tisema su:

—Que'i fariseondeccuja apisho'tto, tasa sepaccoma cashisi naccuja toya amundetssiqqia'caen ñotsse attiamba que'i injama'choni toya egae in'jamba qui egae tsincon'fa. <sup>40</sup> ¡Ñoa'me injamambi'fa qui! ¿Sepaccove ñoña'suta ti naccuve'qqe ñoñambi? <sup>41</sup> Bove ñotssi tsu que injama'choni ñotsse in'jamba tsa'caen cca'indeccunga ñotsse tsoña'cho cuintsu Chigama ñoa'me avujaeñe. Que'i injama'cho ñotssimanda qui ñoa'me pa'cco giya'tssi.

<sup>42</sup> ¡Tsa'ma vana'faya qui fariseondeccu! Que'ija osha'choma fae decimoveyi Chiganga afeye atesu'fa Tisema avujaeñe. Nane pa'cco ccoma, pa'cco shinccapama'qqe qui fae decimoveyi Chiganga afeye

atesu'fa. Tsa'ma ñotsse qui tson'fambi ni Chiga a'ima in'janquia'caen in'jan'fambi qui. Que'i Chiganga afe'je'choma aqque'pambe'yi a'ima in'jamba ñotsse tson'faya'cho.

<sup>43</sup> ¡Vana'faya qui fariseondeccu! Chigane atesian'jen'ttinga japa bove ñotssia dyaipa'chove qui in'jan'fa. Chava'je'cho atandundunga japa qui chigambianccoye in'jan'fa cuintsu poi'yi'cco a'i que'ima atepa que'ija ti'tsse'tssia qquen in'jan'faye.

<sup>44</sup> ¡Vana'faya qui Chiga Aya'fama atesu'chondeccu, fariseondeccu'qqe! ¡Ñotsse attianquia'caen tsomba injama'choni egae in'jansundeccu qui! A'i atesumbe'yi pa'chombe atu'ttimbe omba'ye tsui jaquia'caen a'ija que'i egae in'jan'choma atesu'fambi.

<sup>45</sup> Tsonsi fa'e Chiga Aya'fama atesu'cho Jesúsma su:

—Atesian'su, tsa'caen fariseondeccune condasepa qui ingima'qqe afase.

<sup>46</sup> Qquen susi Jesúsja su:

—¡Vana'faya qui que'i Chiga Aya'fama atesu'chondeccu! Que'i'qqe osha'cho manda'choi'ccu a'ima vanaen'fa. Tise'pa oshambi'ni'qqe qui fuite'fambi. Ni tive utufa'su tsimian'ccoi'ccuyi'qqe qui fuite'fambi.

<sup>47</sup> ¡Va'cha'fa qui! Que'i yayandeccu Chiga Aya'fama afasundeccuma fi'ttisi que'i'qqe Chiga Aya'fama afasundeccumbe atu'ttive patui'ccu ñotsse ñoña'fa. <sup>48</sup> Tsa'caen tsomba qui que'i yayandeccu'caen fae'ngae ega'fa. Que'i yayandeccu a'ima fi'tti'fasi que'ija ñotssi tsu qquen in'jamba pa'chombe atu'ttive ñoña'fa.

<sup>49</sup> Chigaja osha'chone in'jamba tayoe su: “Ña aya'fama afasundeccuma ñane condasesundeccuma'qqe gi manda moeña. Tsa'ma aindeccuja majan tsendeccu'suma fi'tti'faya. Majan tsendeccu'suma noñangiamba vanaen'faya.” <sup>50</sup> Nane Chiga suquia'caen a'ija

tsa'caen ande agattointe ashaemba Chiga Aya'fama afasundecuma fittitti'fa. Nane Chigaja tsendeccu shacane'qque tsu va ja'ño'su aindecuma ñajaña. <sup>51</sup> Me'ttia'ye tayopi'su Abelma fi'tti ashaemba fitti'tti canse'fa. Voeyiytsse Zacaríasja Chiga ettini ccutsupa Chiganga oque oraen'jen'cho jin'tti Chiga Aya'fama condase'je. Condase'je'ni tisema fi'tti'fa. Tsa'caen tsomba tsu shacapa'fa. Shacama tsa'caen boñasi tsu Chigaja va ja'ño'su aindecuma ñajan.

<sup>52</sup> ¡Vana'faya qui manda'choma atesu'chondeccu! Que'ija tansintssia Chiga Aya'fama atesupa se'pi'fa cca'indecu paña'sa'ne. Tansintsse su'choma atesu'ma qui tsama chi'ga'fa. Cca'indecu atesuye in'jan'ninda qui se'pi'fa.

<sup>53</sup> Jesús tsene sombojisi Chiga Aya'fama atesiansundeccu, fariseondeccu'qque iyicca'yepa Jesúsma noñangiamba zutsse ñajansepoen'fa cuintsu Jesús osha'chone afapa qqueye. <sup>54</sup> Ron'da'fa Jesús ccaningae su'chove su'ninda pañamba tise injama'choma somboeñe.

## 12

### *Ñotsse attiamba afopoensundeccu*

<sup>1</sup> Tsomba tse'i ti'tsse'o a'i bopa tayosi tisupapora tsuicco'fa. Tsa'caen bo'fasi Jesúsja tisema shondosundecuma su:

—Injama'tse. Fariseondeccuja ñotsse attiañe in'jamba afopoemba tsa'caen tson'fa. Injama'tse, tise'pa'caen tsonsa'ne. Nane tise'pa egaja cupana'cco'a'caen a'tu'cho tsu. <sup>2</sup> Osha'cho ja'ño a'tu'chota jai'ngae canjaeña'cho. Ja'ño atesumbi'choa'qque jai'ngae atesuya'cho. <sup>3</sup> Que'i jongoesuma a'tutsse cose condase'ni'qque jai'ngae a'ta'nijan poi'yi'cco tsu a'tatsse paña'faya. Que'i tsa'o'su

cuarto'ye a'tutsse afa'ni'qqe jai'ngae tsao'cco ombanga ccutsupa fundo'faya.

*Majama tsu dyo'faya'cho*

*(Mt 10.26-31)*

<sup>4</sup> In'jan'chondeccu, ñoa'me gi su dyo'fajama majanda que'i ai'voma fi'ttiye osha. Tsa'caen fi'tti'ma ti'tsse dañõe oshambi. <sup>5</sup> Tsa'ma que'inga gi condaya majama dyo'faya'chove. Chigaja a'ima fi'tti'ta tise canse'pama'qqe si'nge anchanda'je'chonga catiye osha. Tsa'cansi gi que'ima su: Chigama tsu dyo'faya'cho.

<sup>6</sup> A'ija chhiririama chavaen'fa. Cinco chhiririama tsu dos reave chavaen'fa. Tsa'ma tsa'caen baratosi toya tsu Chigaja tsesu chhiririave injan'jen. <sup>7</sup> Nane Chigaja que tsove'su tosema agattopa injan'jen. Tsa'cansi dyombe can'faja. Chhiririama ti'tsse tsu Chigaja que'ima in'jan.

*Cristove in'jamba condaya'cho*

*(Mt 10.32-33; 12.32; 10.19-20)*

<sup>8</sup> Ñoa'me gi que'inga su: Majan ñame in'jamba dyombi'tsse cca'indeccunga condase'ninda ccane'qqe ñajan tsane ñotsse afaya. Chiga sefacconi'su shondosundeccu paña'jen'ni gi afaya. <sup>9</sup> Tsa'ma majan ñama chi'gapa cca'indeccunga ñama a'tie'ninda ccane'qqe ñajan tsa a'ima chi'gapa Chiga sefacconi'su shondosundeccu caña'jen'ni tisema a'tieña.

<sup>10</sup> Poiyi'cco majan Sefaccone Ji'cho A'ima afase'ninda tise tsa'caen egae tsincon'choja joqqitssi'qqe'su. Tsa'ma majan Chiga Qquendya'pama afase'ninda ñoa'me tsu tise egae tsincon'choja joqqitssi'masia.

<sup>11</sup> Ñame in'jansi que'ima indipa Chigane atesian'jen'ttinga anga'faya cuintsu nasundeccu, joccapitssiande'qqe que'ima que'i injama'choma somboeña. Que'ima tsa'caen iñanjansepoen'fa'ni'qqe

dyo'fajama jongoe qquen asi'ttaemba suya'chove tisuma ccushaeñe. <sup>12</sup> Que'i tseni ccutsu'ninda Chiga Qquendya'pa tsu que'ima in'jaeña jongoe qquen suya'chove.

*Osha'choma an'biamba qqe'faya'cho*

<sup>13</sup> A'i bo'fa'cho'su fae a'i Jesúsma qquen ñajampaña:

—Atesian'su. Ña quindya tsu se'pi. Tisema mandaja cuintsu yaya'ye pasi inginga afe'choma ñai'ccu attufaeñe.

<sup>14</sup> Tsa'caen susi Jesúsja tisema su:

—Ccashe'ye, ñajan jimbi gi tsa'caen a'i injama'choma somboeñe ni osha'choma attufaeñe.

<sup>15</sup> Tsomba Jesúsja poiya'cconga su:

—Injama'tse. Faesumbema in'jan'fajama. Osha'choma an'biambi'a'qqe toya qui ñotsse canse'faya.

<sup>16</sup> Tsomba Jesús va condase'choma conda:

—Fae a'i osha'choma an'bian. Tise andeja ñotssiasi osha'cho ñotsse sho'yopa na. <sup>17</sup> Tsa'cansi a'ija asi'ttaemba tisuma su: “¿Ma'caen gi tsoña? Tayo tsu tsa'o on'ba pa'cco ña tai'choma boñamba an'biañe.” <sup>18</sup> Ti'tsse asi'ttaemba tsu qquen in'jan: “Qquen gi tsoña: Ña taipa boña'cho tsa'oma asittapa gi faesu ti'tsse ran-deve tsao'ñaña. Tsanga gi pa'cco tai'choma an'biamba osha'cho ña an'bian'choma'qqe coiraya. <sup>19</sup> Tsa'caen tsomba gi tisu injama'choni asi'ttaemba tisuma qquen suya: ‘Ñoa'me osha'choma an'biamba gi bo'tssingae ñotsse canseya. Semambe'yi gi canseya. An'jemba, cui'jepa avujatsse gi canseya.’ ” <sup>20</sup> Tsa'ma Chiga Quitsaja tisema su: “¡Injamambi! Ja'ño cose qui paya. Que osha'choma boñamba an'bian'choja, ja'ño ¿majambe tsu?” <sup>21</sup> Tsa'caen tsu daya poiya'cco a'i majan Chiga in'jan'choma in'jambipa tisupa in'jan'choma boña'da.

*Chiga tisebema ñotsse coira'je'cho*

(Mt 6.25-34)



<sup>22</sup> Tsomba Jesúsja tisema shondosundecuma su:

—Tsa'cansi gi que'ima su: Que'i vani canse'chone panshaen asi'ttaen'fajama. Que'i anqqe'sune panshaen asi'ttaen'fajama. Que'i ai'voni jinqqe'su sarupave'qqe jongoesuma ondiccuye panshaen asi'ttaen'fajama. <sup>23</sup> Ingi canse'cho tsu ingi anqqe'suma ti'tsse'tssia. Ingi ai'vo tsu ingi ondiccu'je'choma ti'tsse'tssia. <sup>24</sup> Pindoma canjan. Tsendecuja jon'fambi ni tai'fambi. Ni taipa boña'je'cho tsa'ove an'bian'fambi. Tsa'ma Chiga Quitsa tsu tise'pama ofian'jen. Que'i qui ñoa'me pindoma ti'tsse joccapitssia. <sup>25</sup> Toya'caen ¿majan qui que'i'suja in'jamba fae a'ta ti'tsse canseye'ta oshaya? Ñoa'me qui oshambi. <sup>26</sup> Tsa'caen que'ija va re'riccoa'ma oshambi'ta ¿ma'caen qui osha'chone panshaen asi'ttaen'fa?

<sup>27</sup> Ñotssia te'tama can'faja. Aquia tsu sho'yopa te'ta. Semambi ni tise'pa ondiccu'jema anchombi. Tsa'ma ¿majan tsu tisia'caen ondiccucho? Nane ti'tsse'tssia na'su Salomón'qqe tisia'caen ñotsse ondiccu'chombi. <sup>28</sup> Shoshovija ja'ño injanga sho'yopa cansesi tu'i a'ija tsama taipa panme matssañe oque'faya. Tsa'ma Chiga Quitsaja tsa'caen te'tai'ccu shoshovima ñotsse ondiqquiamba ti'tsse tsu que'imajan ondiqquiamba coira'je. ¿Micomba qui in'jambe canse'fa? <sup>29</sup> Panshaen asi'ttaen'fajama. Que'i anqqe'suve, que'i cuiqqe'suve ttatta'fajama. <sup>30</sup> Poi ande'su aindecu tsu tsa'caen in'jamba canse'fa. Tsa'ma Chiga que'i Quitsaja tayo tsu in'jan que'i osha'chove in'jamba shaca'choma. <sup>31</sup> Bove ñotssi tsu Chigave in'jamba Tise in'jan'chove tta'ttaye. Tsa'caen cansesi tsu Chigaja que'ine osha'cho ñotssiave ñoñaña.

*Sefacconi an'biaña'cho*  
(Mt 6.19-21)

<sup>32</sup> Que'i qui ña in'jan'cho ovejandeccu. Re'ricco'fa qui. Tsa'ma dyombe can'faja. Chiga que'i Quitsave in'jamba Tise in'jan'chove tta'ttasi tsu Tiseja que'ima na'suve tsoña. <sup>33</sup> Que'i vani an'bian'choma chavaen'faja mendeqquianga afeye. Tsa'caen afepa qui Chiga sefacconi osha'cho ñotssiama boña'faya. Tseni an'bian'choja mingui'te'qqe sefaya'bi ni tssoruve daya'bi. Ccanamba'qqe cca'nañe oshambi ni shipicco añe oshambi. <sup>34</sup> Mani que'i an'bian'choma coira'je'ta tsenima qui ti'tsse injan'jen'fa.

### *Ñoñamba ronda'jeya'cho*

<sup>35</sup> Ondiccupa que'i tuñoma setsaemba ronda'je'faja. <sup>36</sup> A'i tise na'suve ronda'jeqquia'caen canse'faja. Nane tise'pa na'su casara'je'cho fiestane jipa sombo'ttima tssai jeña'nijan junde fettaye ronda'je'faya'cho. <sup>37</sup> Majan semasundeccuja tise'pa na'su ji'je'ni toya anambi'ta ñoa'me tsu avujatssi'faya. Ñoa'me gi su tsama atepa tsu na'suja mandaya cuintsu an'jen'cho mesanga dyai'faye. Tsomba na'suja osha'choma ñoñamba tise'be semasundecunga o'fiaña. <sup>38</sup> Nane enttinge cose tsambi'ta a'taningae na'su jipa tsa'caen ronda'je'choma atte'ninda ñoa'me tsu tsa semasundeccuja avujatssi'faya. <sup>39</sup> Toya'caen vama paña'faja: Tsa'o na'suja ccanamba jiya'chove atesuchoecan'da tsu tayo bittapa tise tsa'oma coiraye'can ccanamba ca'nisa'ne. <sup>40</sup> Que'i'qqe ñoñamba ron'da'faya'cho. Atesu'fambi qui maqui Sefaccone Ji'cho A'i ccase jiya'choma. Que'i in'jambi'te gi ñajan jiya.

### *Semasundeccu ma'caen tson'faya'cho*

*(Mt 24.45-51)*

<sup>41</sup> Tsa'caen susi Pedroja Jesúsma iñajampaña:

—Na'su, ¿ingingayi ti qui va condase'choma condase?  
Tsambi'ta ¿poi'ccongati qui condase?

<sup>42</sup> Tsonsi Na'suja su:

—A'ija ñotsse in'janhopa na'su in'janqquia'caen tso'ninda tsama na'suja ti'tsse in'jan. Nane na'suja biani jaye tson'jemba tsanga manda antte cuintsu tise tsa'oma semasundeccuma coirapa poi a'ta tise'pama ofian'jeñe. <sup>43</sup> Tsomba na'su jai'ngae toequi jisi tsa sema'su, na'su mandaqquia'caen tso'ninda ñoa'me avujatssi tsu. <sup>44</sup> Ñoa'me gi su, na'su jipa pa'cco tise an'bian'choma tsu tsa sema'sunga afeya cuintsu coiraye. <sup>45</sup> Tsa'ma majan sema'su: “Ña na'suja uta jiya'bi” qquen in'jamba tsa sema'su faesu semasundeccuma tssaiye ashaemba majan tsandie, majan pushesuma'qqe tsse'tsse tsincomba toya'caen an'jemba tse'tse'pama cu'ipa ccusi'ninda <sup>46</sup> tsa sema'su in'jambi'te tsu na'suja jiya. Na'su jipa tsu tsa sema'suma ma'ppipa in'jambindeccui'ccu fae'ngae tisema catiya.

<sup>47</sup> Majan sema'su na'su in'jan'choma atesu'ma ñoñam-bipa tsa'caen tsombian'da ñoa'me tsu na'su tisema quia'me ma'ppiya. <sup>48</sup> Tsa'ma majan sema'su na'su in'jan'choma atesumbipa tsa'caen ñotsse tsombian'da re'riccoe tsu tisema ma'ppiya. Nane poi'cco majan ti'tsse isu'ta ti'tsse tsu tsoña'cho. A'ija majanga ti'tsse afe'ta ti'tsse tsu tsendeccune in'jan'faya.

*Jesúsve in'jamba attufacco'fa'cho*

*(Mt 10.34-36)*

<sup>49</sup> Ñajan va andeni ji si'ngema setsaeñe. Ñoa'me tayo anchanda'je'ma'caen gi in'jan. <sup>50</sup> Ñajan fetiyeqquia'caen vanaña'cho. Toya tsa'caen fetiyembipa gi injama'choni ñoa'me vana'jen. Tsa'caen gi vanaña'cho tsa feti'cho naniña'gae. <sup>51</sup> ¿Jongoesu qquen qui asi'ttaemba in'jan'fa? ¿Ñanda ti gi va andeni ji cuintsu poi'cco a'i opatsse canse'faye? Me'i. Ñoa'me gi su, ñajan ji a'ima iyic-coeñe. <sup>52</sup> Ja'ño tsu fae tsa'o'su ñoa'me iyicco'faya'cho.

Tres ñame in'jansi dos ñama chi'ga'faya. Tsambi'ta dos ñame in'jansi tres tsu ñama chi'ga'faya. <sup>53</sup> Yaya tsu tise dutssi'yema iyicca'yeya. Dutssi'ye'qqe tise yayama iyicca'yeya. Chanjan tise onque'ngema iyicca'yesi onquenge'qqe tise mamama ccane'qqe iyicca'yeya. Chan ccashe tise chinama iyicca'yesi china'qqe ccane'qqe chan ccashema iyicca'yeya.

*Jai'ngae tsoña'chove canjaen'cho*

*(Mt 16.1-4; Mr 8.11-13)*

<sup>54</sup> Toya'caen tsu Jesúsja a'i bo'fa'chonga su:

—Que'ija chiga amppije'ni unjimba jinchoma attepa qui: “Unjin tuiye tson'jen” qqen su'fa. Qquen su'fa'nijan tsa'caen tsu tui. <sup>55</sup> Neguev andefae fingian jisi que'ija su'fa: “Ñoa'me coe'jeye tson'jen.” Qquen susi tsa'caen tsu coe'je. <sup>56</sup> Ñotsse in'janquia'caen supa aquia afopoen-sundeccu qui. Que'ija sefaccoma cambia qui osha'choma tsa'caen atesu'fa. Tsa'ma ña ja'ño tsoña'choma atte'ma qui atesu'fambi.

*Tisuma iyiccaye'suma ñoquiaña'cho*

*(Mt 5.25-26)*

<sup>57</sup> ¿Micomba qui injama'choni asi'ttaen'fambi ñotsse tsoña'chove in'jañe? <sup>58</sup> Nane a'i quema iyicca'yepa na'sunga angaji'ninda toya na'sunga napimbi'teyi tsu tisema ñoquiaña'cho. Ñoquiambian'da na'su tsu capitána mandaya cuintsu que'ima indiyey. Capitán tsu picco'je'cho ettinga que'ima piccoya. <sup>59</sup> Ñoa'me gi su, tseni picco'ninda pa'ccoma nane reama'qqe tsu afepoña'cho tisu somboye.

<sup>1</sup>Tsequi a'ta majan a'i Jesúsnga jipa condase'fa ma'caen ande na'su governoror Pilato Galilea aindecuma fi'tti'choma. Tsa aindecuja Chigama ñajañe tise'pa afe'cho ovejama ipa fi'tti'fa. Oveja anjampa tssain jasi pa'fasi Pilatoja sundaronddecuma mandasi tsa aindecuma fi'tti'fa. Fi'tti'fasi tise'pa anjampa'qqe oveja anjampai'ccu echhoen fae'ngae tssain ja. <sup>2</sup>Jesúsja pañamba su:

—¿Jongoesu qqen qui asi'ttaen'fa? ¿Va Galileasundecuta ti cca'i Galileasundecuma ti'tsse egae tsincon'fa? ¿Tsa'camba ti tsa'caen vaná'fa? <sup>3</sup>Me'i. Tsa'ma que'i'qqe que'i egae tsincon'choma chi'gapa ántteya'cho tsendequia'caen pasa'ne. <sup>4</sup>Toya'caen voeyi tsu Siloé'su se'fatssia tsa'o osuipa amppisi diez y ocho a'i pa'fa. ¿Tsendecuta ti poi'yi'cco Jerusalensundecuma ti'tsse shacapa'fa? <sup>5</sup>Me'i. Tsa'ma que'i egae tsincon'choma chi'gapa ánttembi'ta que'i'qqe qui tsa'caen pa'faya.

#### *Higuera tetachojine condase'cho*

<sup>6</sup>Tsomba Jesúsja va condase'choma conda:

—A'ija higuera teta'choma tise ovaccuni jon. Tise naite na'suja jipa name tta'tta'ma attembi. <sup>7</sup>Tsomba ovaccuma coira'sunga su: “Tres canque'fave gi jipa name tta'tta'ma attembi. Ttuttu catija. Ño'a andenga najema'can qui aquia aten'jeña.” <sup>8</sup>Tsa'ma coira'suja su: “Na'su, cuintsu ttuttumbe'yi va canque'fama ronda'jeja. Ñajan va quini'cco setsa'cho'su andema vuviamba vaura ccopai'ccu echhochhoeña. <sup>9</sup>Tsonsi faesu naite na'ninda tsu ñotssi. Tsa'ma nambian'da ttuttu catiya'cho.”

#### *Sema'ma'qquia a'ta ccushaen'cho*

<sup>10</sup>Fae sema'ma'qquia a'ta Jesúsja Chigane atesian'jen'ttinga japa atesian'jen. <sup>11</sup>Tse'tti pushesu paji'su can'jen. Diez y ocho canque'fave cocoya tisenga

ca'nisi puntssan antteyepa tansintsse ccutsuye oshambi.

<sup>12</sup> Jesúsja tisema attepa ttu'sepa su:

—Pushesu, tayo qui ccusha que paji'choma.

<sup>13</sup> Qquen supa tise tivei'ccu pushesuma pporaen. Tse'faei'ccuyi tise ai'vo tansinsi pushesuja Chigama ñotsse afa. <sup>14</sup> Tsa'ma Chigane atesian'jen'tti'su na'suja Jesús sema'ma'qquia a'ta ccushaensi iyicca'yepa a'inga su:

—Seis a'ta tsu semaña'choja. Tsesu a'tayi tsu jipa ccushaengeya'cho. Tsa'ma sema'ma'qquia a'taja ji'masia.

<sup>15</sup> Tsonsi Na'su Jesús su:

—Que'ija ñotsse attianqquia'caen supa aqquia afopoen-sundeccu qui. ¿Majan que'i'su qui sema'ma'qquia a'ta tisupa vaurama tisupa boroma'qqe ccupa'fambi naini angapa cui'ñañe? <sup>16</sup> Tsa'candeqquia'ta ¿ma'caen qui cocoya na'su Satana va pushesuma diez y ocho canqqe'fave noñangiansi sema'ma'qquia a'ta ña ccupaqquia'caen ccushaen'ninda se'pi'fa? Nane tise'qqe tayopi'su Abraham aindecumbe onque'nge tsu.

<sup>17</sup> Jesús tsa'caen susi poi'cco tisema iyicayesundeccu ansange'fa. Poi'cco a'i Jesús ñotsse tson'choma attepa ñoa'me avujatssi'fa.

*Mostasa chone condase'cho*

(Mt 13.31-32; Mr 4.30-32)

<sup>18</sup> Tsa'caen tsonsi Jesúsja su:

—A'ija Chiga aindecuve dapa ti'tsse tsu atapa'faya. Tsane condaseye in'jan'ma ¿jongoesui'ccu gi condaseya?

<sup>19</sup> Ñoa'me tsu a'i Chiga aindecuve da'faya'cho chipiri mostasa cho'can'chocco. A'ija mostasa choma tise nasipanga jonsi sho'yopa quini'jime dasi chhajeqqe'su chhiriria jipa ttembanga tsao'paen'fa.

*Cupana'ccone condase'cho*

(Mt 13.33)

<sup>20</sup> Toya'caen Jesúsja su:

—Ma'caen a'i Chiga aindecuve dapa ti'tsse atapa'faya'chone condaseye in'jan'ma ¿jongoesui'ccu gi condaseya? <sup>21</sup> Nane cupana'cco'a'ca'on tsu. Pushesu panme ñoñaque'su tres agatto'chonga cupoensi coemba pa'ccoma atapoen.

*Ta'yoquiccoa sombo'tti*

*(Mt 7.13-14, 21-23)*

<sup>22</sup> Tsomba Jesús rande canqqe, chipiri canqqe'ye jacamba a'ima atesian'jen. Tsa'caen jacamba Jerusaléni napisi <sup>23</sup> fae a'i tisema iñajampaña:

—Na'su, ¿re'ricco a'i ti ccusha'faya?

Jesúsja tisema su:

<sup>24</sup> Ta'yoquicco tsu Chiga sefacconi ca'niña'choja. Tsa'ma tsangae ca'nicanjan. Nane tsain'bio a'i ca'niñe in'jan'ma osha'faya'bi. <sup>25</sup> Tsa'o na'su tayo jangipa sombo'ttima piccosi qui que'ija tsotefanga ccutsupa tssai jeñañe ashaen'faya qqen supa: “Na'su, sombo'ttima fettaja ingi ca'niñe.” Tsa'ma tiseja que'ima suya: “Ñanda gi que'ima atesumbi. Ni mane ji'chove'qqe gi atesumbi.”

<sup>26</sup> Tsonsi qui qqen su'faya: “Tsa'ma fae'ngae quei'ccu an'jemba gi cu'i'fa. Queja ingi tsaiquini japa atesian.”

<sup>27</sup> Tsa'ma tiseja suya: “Ñoa'me gi su: Ñajan que'i mane ji'chove atesumbi. Que'i egae tsinconsundecuja, ña'ñe joqqitssi'faja.” <sup>28</sup> Abrahamma qui atte'faya. Isaac, Jacob, nane poi'icco Chiga Aya'fama afasundecuma'qqe qui atte'faya. Tsendeccu Chigai'ccu can'jensi que'ija tsotefanga joqqitssiangepa qui i'na'faya. Ñoa'me ttun'dundu'jeve iyicca'yepa qui i'na'faya. <sup>29</sup> Nane poi andene tsu a'ija jipa bo'faya Chigai'ccu an dyaiye.

<sup>30</sup> ¡Que canjan! Majan ja'ño utu'cco'a'ta ti'tsse'tssia've tsu

da'faya. Tsa'ma majan ja'ño ti'tsse'tssia'ta utu'ccoave  
tsu da'faya.

*Jesús Jerusalénma attepa i'na'cho*

*(Mt 23.37-39)*

<sup>31</sup> Toya Jesús tsa'caen atesian'jen'ni majan fariseon-  
deccu jipa tisema su'fa:

—Va'ttieja junde jaja. Ande na'su Herodes tsu quema  
fi'ttiye in'jan.

<sup>32</sup> Jesúsja pañamba tise'pama su:

—Herodesja afopoen'su tsu. Japa tisenga qqen su'faja:  
“¡Que canjan! Ñajan ja'ño a'ta, tu'i'qqe cocoyama jo-  
qquitssiamba a'ima ccushaen'jeña'cho. Tui've gi naniña.”

<sup>33</sup> Tsa'ma que'inga gi su: Ja'ño a'ta, tu'i, tui've'qqe  
gi dyombi'tsse jacaña'cho. Nane Chiga Aya'fama afa'su  
Jerusaléni can'jembian'da ¿ma'caen tsu tisema fi'tti'faya?

<sup>34</sup> Jerusalén, Jerusalensundeccu, Chiga Aya'fama afa-  
sundeccuma qui fi'tti'fa. Chigaja majama que'inga  
moensi atesiansi qui patui'ccu fi'tti'fa. Tsain'bitsse gi  
in'jan que'ima coiraye. Nane arapa chan tise du'shuma  
sancopai'ccu piccopa coiraqquia'caen gi que'ima coiraye  
in'jan. Tsa'ma que'ija in'jan'fambi. <sup>35</sup> ¡Que canjan! Chi-  
gaja que'i can'jen'ttima tsu catiya. Ñoa'me gi su, Ccatsse  
qui ñama atte'faya'bi que'i ñama qqen suya'ngae:  
“Ñoa'me ñotssia tsu Na'su Chiga moensi ji'cho.”

## 14

*Ttun'dunduje'e dapa paji'cho*

<sup>1</sup> Fae sema'ma'qquia a'ta Jesúsja fariseo in'jan'cho  
na'sumbe tsaoni añe ja. Cca'i fariseondeccu Jesúsma  
camba ronda'je'fa egae afaye. <sup>2</sup> Toya'caen tsa tsaoni tsu  
can'jen a'i ttun'dunduje'e dapa paji'cho. <sup>3</sup> Jesúsja Chiga  
Aya'fama atesu'chondecuma, fariseondeccuma'qqe su:



—¿Chiga manda'chota ti se'pi sema'ma'qquia a'ta a'ima ccushaëne'ja? Tsambi'ta ¿se'pimbi ti?

<sup>4</sup> Tsa'ma tisema pañasundeccuja ziyapa afa'fambi. Tsonsi Jesúsja paji'choma pporaemba tisema ccushaen. Ccushaemba tisema manda mañamba <sup>5</sup> fariseondeccuma su:

—¿Majan que'i'su qui tisupa vaura, tisupa boro tsa'ccu posonga amppi ca'ni'ninda junde somboen'fambi? Nane ¿sema'ma'qquia a'ta'qque ti qui somboen'fambi?

<sup>6</sup> Tsa'caen susi paña'ma jongoesu qqen suye osha'fambi.

*Casara'cho fiestane condase'cho*

<sup>7</sup> Añe ttu'sesi ji'chondeccuja bopa poi'cco tsu ttatta'fa ti'tsse joccapitssia dyaini dyaipa añe. Tsama atepa Jesúsja va condase'choma tise'panga conda:

<sup>8</sup> —A'i casara'cho fiestanga que'ima ttu'sesi ja'ta ti'tsse joccapitssia dyaipa'chonga dyaijama. Tsa'caen dyai'ninda faesu que'ima ti'tsse joccapitssia jisi <sup>9</sup> ttuse'suja queni jipa condaya: “Joquitssija cuintsu va a'i dyaiye.” Tsonsi qui ansangepa utu'cco dyaipa'chonga dyaiya. <sup>10</sup> Tsa'ma ttuseyepa ja'ta utu'cco dyaipa'chonga dyaija cuintsu ttuse'su jipa quenga suye: “In'jan'cho, bove ñotssianga dyaija.” Tsonsi tsu fae'ngae mesani dyaisundeccu atepa quene ñotsse afa'faya. <sup>11</sup> Poi'cco majan patsuye in'jan'da utu'cco tsu da'faya. Tsa'ma poi'cco majan patsuye in'jambi'ta ti'tsse joccapitssia've tsu da'faya.

<sup>12</sup> Tsomba Jesúsja tisema ttuse'suma qqen su:

—Queja fiestaemba a'ima o'fiañe in'jan'da que in'jan'chondeccuve'yi ni que antiandecuve'yi ni pporotsse canjen'su ricondecuveyi ttu'sejama. Tsendecuja tise'pa fiestani ccane'qqe quema ttu'sepa afepoëne osha'faya. <sup>13</sup> Tsa'ma fiestaen'jen'da va'chandecuma ttu'seja. Toya'caen dañonge'chondeccu,

ccareshendeccu, binindeccuma'qqe ttu'seja.  
<sup>14</sup> Tsendeccuja ccane'qqe quenga afepoeñe oshambisi  
 qui ñoa'me avujatssi'faya. Toya'caen Chigaja  
 ño'andeccoma ccase qquendyaemba que'inga'qqe  
 ñotsse afepoeña.

*Na'su fiestane condase'cho*  
 (Mt 22.1-10)

<sup>15</sup> Tsama pañamba fae a'i mesani an dyai'su Jesúsma su:  
 —Majan a'i Chiga aindecuve dapa tseni'su  
 anqqe'suma an'jen'da ñoa'me avujatssiya'cho tsu.

<sup>16</sup> Tsa'ma Jesúsja tisema su:

—A'ija tayoe rande fiestave fiestaemba tsain'bio a'ima  
 ttu'se. <sup>17</sup> Fiesta pan napijisi tisema shondo'suma manda  
 cuintsu ttuseye'chondecuma qqen conda'ngaye:  
 “Tayo tsu ñoña osha'choma. Junde ji'faja.” <sup>18</sup> Tsa'ma  
 ttuseye'chondecuja pañamba poiyl'cco ccaningae  
 tsoña'chove condaseye ashaen'fa. Fa'eja tisema su:  
 “Ñajan jiye oshambi. Nasipama chavapa gi can'su  
 jayi. Chigáne ñama anttéja ña jimbecañe.” <sup>19</sup> Faesuja  
 su: “Diez sema'jen'cho vaurama chavapa gi jayi  
 tise'pama semoencañe. Chigáne ñama anttéja ña  
 jimbecañe.” <sup>20</sup> Cca'ija su: “Voeyi pushepa gi jiye  
 oshambi.” <sup>21</sup> Tsa'caen su'fasi na'suma shondo'suja  
 jipa na'sunga conda. Tsonsi tsa'o na'suja iyicca'yepa  
 tisema shondo'suma su: “Canqueni japa poi tsaiquima  
 tta'ttapa va'chandeccu, dañonge'chondecu, binindeccu,  
 ccareshendecuma'qqe ttu'sepa ija.” <sup>22</sup> Shondo'suja  
 tsa'caen tsomba su: “Na'su, que suquía'caen tso'ma toya  
 on'bambi tsu que tsa'o.” <sup>23</sup> Tsonsi na'suja shondo'suma  
 manda: “Jocani'su tsaiquina, nasipanga'qqe japa  
 majama cachui'ta ttu'seja cuintsu a'i bosí ña tsa'o

on'baye. <sup>24</sup> Ñoa'me tsu o'tie ttuseye'chondeccuja ña  
aña'choma an'faya'bi.”

*Cca'ima catipa Jesúsveyi in'jaña'cho*  
(Mt 10.37-38)

<sup>25</sup> Ñoa'me tsain'bio a'i Jesús'ccu jacan'fasi tiseja piyi-  
camba tsendeccuma su:

<sup>26</sup> —Majan a'i ñani ji'ta cca'ima tsu chi'ga'faya'cho.  
Nane tisu yaya, tisu mama, tisu pushe, du'shu,  
quindyandeccu, quinshingendeccu, shesheyendeccu,  
quettayendeccu, nane tisuma'qqe chi'gambi'ta  
ñoa'me ñama shondo'suve daye oshambi. <sup>27</sup> Majan  
ña'caen vanañe tise avuja'ccoma opi angambi'ta ñama  
shondo'suve daye oshambi. <sup>28</sup> Majan que'i'suja se'fatssia  
tsa'ove tsao'ñañe in'jan'da o'tie tsu dyaipa bare'choma  
agattoya'cho naniñe'me'se qqen atesuye. <sup>29</sup> Tsambi'ta  
dyaiña'choma dyaiñamba ti'tsse tsao'ñamba naniñe  
oshambian'da poiyo'cco a'i tsu can'boemba <sup>30</sup> su'faya:  
“Tsaja tsa'ove tsao'ñañe ashae'ma naniñe oshambi.”  
<sup>31</sup> Toya'caen majan ande na'su faesu na'sui'ccu geraeñe  
tson'jen'da o'tie tsu dyaipa asi'ttaeña'cho. Tisema  
fuitesundeccui'ccu condasecco'faya'cho atesuye tise'paja  
diez mil sundarondeccui'ccu faesu na'su veinte mil  
sundarondeccuma patsuve'se. <sup>32</sup> Asi'ttaemba oshambi  
qqen in'jan'da faesu na'su toya catsembi'te tsu  
aindeccuma moeña'cho tisema ñoquiañe cuintsu  
antte'faye. <sup>33</sup> Tsa'cansi que'i'qqe majan tismbe  
osha'choma chi'gambi'ta ñama shondo'suve daye  
osha'fambi qui.

*Ega ansine condase'cho*  
(Mt 5.13; Mr 9.50)

<sup>34</sup> Patu ansinjan ñotssi tsu. Tsa'ma patu ansi'ñe ansin  
tssutssu catiye'ninda ¿ma'caen tsu ccase ansinpave daya?

<sup>35</sup> Ñoa'me barembi tsu. Andema tsu dañ'o'jen. Ni vaura ccopa'caen andema fuitembi. Injanga tsu catiya'cho. Majan tsosinapa'ta ñotsse paña'faja.

## 15

### *Oveja qque'chone condase'cho*

(Mt 18.10-14)

<sup>1</sup> Gobierno impuestoma isusundeccu, poiyo'cco egae tsinconsundeccu'qqe Jesúsnga catse'fa paña'ne. <sup>2</sup> Tsonsi fariseondeccu, Chiga Tevaen'jema atesu'chondeccu'qqe Jesúsma qquen afase'fa:

—Va a'ija egae tsinconsundeccuma in'jamba tise'pai'ccu fae'ngae an'jen.

<sup>3</sup> Jesúsja tsama pañamba va condase'choma conda:

<sup>4</sup> —Majan que'i'su cien ovejave an'biamba fae'ccoe qqueña'da noventa y nuevema toeni a'i menia ántteya'cho tsa qque'choveyi tta'ttaye. Nane atteya'ngae tta'ttaya'cho. <sup>5</sup> Attepa andu'ta avujatsse shanda.

<sup>6</sup> Tsaoni napipa tise amigondeccu, tisei'ccu porotsse can'jendeccuma'qqe ttu'sepa tsu su: “Ñai'ccu fae'ngae avujatssi'faja. Tayo gi atte oveja qque'choma.” <sup>7</sup> Ñoa'me gi su tsa'caen tsu Chiga sefacconi. Nane noventa y nueve ño'andeccu egae tsincon'chove mecho'fasi Chiga sefacconisundeccu tise'pai'ccu avujatssipa fae'cco egae tsincon'su tise egae tsincon'choma chi'gapa antte'ninda ti'tsse tsu avujatssi'fa.

### *Corifin'di qque'chone condase'cho*

<sup>8</sup> Toya'caen majan pushesu diez totoa corima ñoña'cho corifin'dive an'biamba fae'ccoe qqueña'da tuñoima setsaemba pa'cco tsa'oma fundu'ndu tta'ttaya atteya'ngae. <sup>9</sup> Atte'ta tsu amigondeccuma, pporotsse can'jensundeccuma'qqe ttu'sepa qquen suya: “Ñai'ccu

avujatssi'faja. Tayo gi atte ña corifin'di qqe'choma.”  
<sup>10</sup> Tsa'cansi gi su, fae egae tsincon'su tise egae tsincon'choma chi'gapa antte'ninda Chiga sefacconi'su shondosundeccuja avujatssi'faya.

*Dutssi'ye qqe'chone condase'cho*

<sup>11</sup> Tsomba Jesúsja su:

—A'ija dos dutssi'yeye an'bian. <sup>12</sup> Chu'a tsu tise yayama su: “Yaya, junde ñanga afeja que pasi ña jai'ngae isuya'choma.” Yayaja “Ju” qqen supa tsa'caen tise osha'choma dutssiyendecunga attufaen. <sup>13</sup> Tise yayai'ccu can'jenccambeyi tsu chu'aja pa'cco tise isu'choi'ccu biani'su andenga ja. Tseni can'jemba in'jangae cansepa tisu an'bian'choma injanga catiti. <sup>14</sup> Pa'cco corifin'dima catiti sefaensi tsa andeni ñoa'me egae qquipoesuite tsu napi. Tsa'cansi tise'qqe añ'a'cho mechoe dapa qquipoe'supa <sup>15</sup> japa tsa ande'su a'imbe sema'suve da. Tsa a'ija tisema manda moen cuintsu tise cochima coirapa ofian'jeñe. <sup>16</sup> Qquipoe'supa ñoa'me cochi anqqe'su teta'cho ttonoma añe ñombi'ye. Tsa'ma majan ni fae teta'choveyi'qqe tisenga afembi. <sup>17</sup> Tsonsi chu'aja injama'choni tsuma in'jamba su: “Poiyi'cco ña yayambe semasundeccuja ttepupa tsu can'jen'fa. Nane an antteye'choma'qqe aquia cati'je'fa. Tsa'ma ñajan vani ti'tsse can'jen'da qquipoe'supa paya. <sup>18</sup> Ja'ño gi ña yayani jaya. Napi'ta gi tisema suya: ‘Yaya, ñajan egae tsincomba gi Chigama egae tsomba quema'qqe egae tson. <sup>19</sup> Barembi gi que “Ña dutssi'ye” qqen ñama afaye. Ñama mendeye'ta quembe sema'sia'caen ñama an'bianjan.’ ” <sup>20</sup> Tsa'caen asi'ttaemba jangipa tise yayani ja.

Tsa'ma toya tise catsembi'te tise yayaja bianima atepa mende'yepa buttoin jipa cachuipa musimba mocha.  
<sup>21</sup> Tsonsi dutssi'yēja su: “Yaya, ñajan egae tsincomba gi

Chigama egae tsomba quema'qqe egae tson. Barembi gi que 'Ña dutssi'ye' qquen ñama afaye..." <sup>22</sup> Tsa'ma yayaja tisema shondosundecuma su: "Ñotssia ondiccu'jema i'ngapa tisema ondiqquan'faja. Tise tivenga sotijama ejian'faja. Sapatoma'qqe tandan'faja tise tsu'ttenga. <sup>23</sup> Yayapatssia vaura du'shuma fi'ttipa sho'cco'en'faja. Jinge avujatsse an'faye. <sup>24</sup> Va ña dutssi'ye pa'cho'ye qquendyaquua'caen tsu canse. Tsangae nepi'choma gi atte'fa." Qquen susi poi'cco avujaye ashaen'fa.

<sup>25</sup> Tsa'caen tson'jen'ni quindyaja nasipani sema'jemba jiñamba tsa'onga catsepa settapoen'jen'choma paña. Boira'je'choma'qqe pañamba <sup>26</sup> sema'suma ttu'sepa tsane iñajampaña. <sup>27</sup> Sema'suja tisenga su: "Tayo tsu que quinshinjan ji. Pambe'yi jisi que yayaja avujapa yayapatssia vaura du'shuma fi'ttipa shoccoen'jen avujatsse añe." <sup>28</sup> Tsa'ma quindyaja iyicca'yepa tsa'onga ca'niñe chi'gapa tsotefani ccutsu. Tsonsi tise yayaja sombopa tisema ca'nian qquen tson. <sup>29</sup> Tsa'ma tiseja tise yayama su: "Tsain'bio canqqe'fa gi quema shondopa sema'jen. Que manda'nijan tsa'caeñi gi tson'jen. Tsa'ma ni fae chivo du'shuveyi'qqe qui ñanga afembi ña amigondeccui'ccu fiestañe. <sup>30</sup> Tsa'ma va que dutssi'ye tayo que corifin'dima in'jangae pushesundecui'ccu injanga catitipa jisi ja'ñojan tisene qui yayapatssia vaura du'shuma fi'ttipa shoccoen'jen." <sup>31</sup> Tsama pañamba yayaja su: "Ña dutssi'ye, queja tsangae ñai'ccu can'jensi osha'cho ña an'bian'cho tsu quembe'yi. <sup>32</sup> Tsa'ma ja'ñojan ñotssi tsu ingi avujaye. Que quinshinjan tayo paquua'can tsu ja'ñojan canse. Tsangae nepi'choma gi ccase atte'fa."

## 16

### *Ega shondo'sune condase'cho*

<sup>1</sup> Toya'caen Jesúsja tisema shondosundecuma su:

—Ricoja can'jen. Tsambe shondo'suja tise an'bian'choma coira'je. Tsa'ma shondo'su osha'choma ñotsse coirambisi cca'indeccuja na'sunga conda'fa. <sup>2</sup> Tsama pañamba na'suja shondo'suma ttu'sepa ñajampaña: “¿Jongoesu tsu va ña quene paña'jen'choja? Pa'cco que chavapa chavaen'choma tevaenjan ña atteye. Tsa'ma queja ti'tsse ña corifin'dima coira'suve can'jeñambi qui.” <sup>3</sup> Na'su tsa'caen susi shondo'suja tisuma su: “Ña na'su ñama joquitssia'ninda ¿jongoesuma gi tsoña? Quin'ambi gi matichi'ccu semañe. Injanga corifin'dima ñajaña'qque gi ansange.” <sup>4</sup> Tsa'caen asi'ttaemba in'jamba su: “Unjun, tayo gi in'jan jongoesuma ña tsonsi cca'indeccu ñame in'jamba amigoen'faya'choma. Tsonsi na'su ñama joquitssia'ninda gi tsendeccumbe tsaoni can'jeña.” <sup>5</sup> Tsa'caen in'jamba fae'cco fae'ccoveyi tise na'suma shacaendecuma ttu'se. Fa'e jisi tisema ñajampaña: “¿Min'getsse qui shacaen ña na'suma?” <sup>6</sup> Tiseja su: “Yayapa cien rata randeve gi shacaen.” Shondo'suja tisema su: “Que tevaen'jema isupa junde cuname tevaenjan cincuenta rataveyi.” <sup>7</sup> Tsomba faesu shacaen'suma su: “¿Queja mi'getsse qui shacaen?” Tiseja su: “Cien saparo trigove gi shacaen.” Shondo'suja tisema manda: “Que tevaen'jema isupa junde cuname tevaenjan ochenta aparoveyi.” <sup>8</sup> Ega shondo'su tsa'caen shacama andiansi tise na'suja pañamba asi'ttaemba iyicca'yembe'yi tisema ñotsse afa. Ñoa'me tsu va ande'su aindeccuja ma'caen tisupanaccu canseya'chove ñotsse in'jan'fa. Tsa'ma Chiga aindeccuja toya tsa'caen tisupanaccu caseya'chove in'jan'fambi.

<sup>9</sup> Ñoa'me gi que'inga su: Corifin'dija ega na'su tsu. Tsa'ma ñotsse in'jamba que'i corifin'di'ccu

cca'indeccuma fuite'faja corifin'di sefasi sefacconi osha'choma ñotsse an'biamba tsangae Chigai'ccu canseya.

<sup>10</sup> Majan a'i re'riccoama ñotsse coirapa an'bian'da ti'tsse'tssiama'qqe tsu ñotsse coirapa an'biaña. Tsa'ma majan re'riccoama ñotsse coirambi'ta ti'tsse'tssiama'qqe ñotsse coirambipa cca'naña.

<sup>11</sup> Que'i va andeni jinchoma ñotsse coirambian'da ¿majan tsu ñoa'me ñotssiama que'inga afeya? <sup>12</sup> Que'i cca'imbema ñotsse coirambian'da ¿majan tsu ñoa'me que'imbetssiama que'inga afeya?

<sup>13</sup> Ni majan sema'suyi'qqe dos na'suma shondoye oshambi. Nane fa'ema chi'gapa tsu faesuma in'jaña. Tsambi'ta fa'ema ñotsse in'jamba tsu faesuma chi'gaya. Chigama, que'i corifin'dima'qqe fae'ngatsse in'jañe osha'fambi qui.

<sup>14</sup> Fariseondeccuja tsain'bitssi corifin'dive in'jañe atesucho pañamba tisema feña'jen'fa.

<sup>15</sup> Tsa'ma Jesúsja tise'pama su:

—Que'i afopoensi aindeccuja que'ija ñotssi qqen in'jan'fa. Tsa'ma Chiga Quitsaja que'i injama'choma ñotsse atesu. Nane a'i jongoesuve asi'ttaemba ti'tsse'tssi tsu qqen in'jan'ninda Chigaja tsama chi'ga.

### *Chiga Manda'choja pasaya'bi*

<sup>16</sup> Chiga manda'cho, Chiga Aya'fa afasundeccu tevaen'jen'qqe ingima tayoe atesian. Tsa'ma Juan jipa ma'caen Chiga aindeccuve dapa canseya'chone ñotsse condase'choma candusiañe ashaen. Ja'ño tsain'bio a'i pañamba quia'me in'jan'fa Chiga aindeccuve daye. <sup>17</sup> Tsa'ma Chiga manda'choja pasaya'bi. Ni fae tevaen'ttiyi'qqe pasaya'bi. Nane bove aiye'pambicco tsu sefacco, ande pasa'faya'cho. Tsa'ma Chiga manda'choja pasaya'bi.



*Pushema cati'chone Jesús atesian  
(Mt 19.1-12; Mr 10.1-12)*

<sup>18</sup> Poiyi'cco majan tise pushema catipa faesu pushesuma pushe'ta ñoa'me tsu egae tsincomba canse. Toya'caen tsa'caen tise pushema catisi majan tsa pushesuma pushe'ta tsa'qqe egae tsincomba canse.

*Lázaro, rico'qqe pa'fa'cho*

<sup>19</sup> Ricoja can'jen. Ñotssia tototssia sarupama ondiccupa na'su cu'a omba'su ondiccu'jema ondiccucho. Poi a'ta tiseja osha'cho ñotssiama an'jen. <sup>20</sup> Tsa'ma tise'pa sombo'tti jin'tti tsu va'cha a'ija pa'cco ai'vo ccopi'pa ccui. Tiseja Lázaro qquen inise'chocho. <sup>21</sup> Tsaja ñombi'ye ricombe mesa'ye amppipa catiye'je'choma añe. Toya'caen ainjan jipa tise cco'pima be'ya'fa. <sup>22</sup> Tsa'caen canse va'cha pasi Chiga sefacconi'su shondosundeccu tisema anga'fa cuintsu tayopi'su Abrahami'ccu can'jeñe. Omboe rico'qqe pasi a'tu'fa. <sup>23</sup> Papa si'nge anchanda'je'chonga me'detsse vana'jemba bianima camba Abrahamma atte. Tisei'ccu Lázaroma'qqe atepa <sup>24</sup> quia'me fundo: “¡Yaya Abraham, ñama mende'yeja! Lázaroma mandaja cuintsu tise tsimian'ccoma tsa'ccunga tssipoemba ña menzanza'fama pporaen'giye. Ñoa'me gi vana'jen va si'nge anchanda'je'chonga.” <sup>25</sup> Tsa'ma Abrahamjan su: “Dusu'tssi ñotsse in'janjan que canseite osha'cho ñotssiave an'biamba qui ja'ñojan vana'jen. Tsa'ma Lázaroja tise canseite osha'cho egave vana'jemba ja'ño mende'yeyepa vani ñotsse can'jen. <sup>26</sup> Toya'caen ingi enttingeni tsu ampashan'masia changoja jin. Ñajan que'ini jiye in'jan'ma tsama panshañe oshambi. Toya'caen tseni quei'ccu can'jensundeccu'qqe vafanga panshañe osha'fambi.” <sup>27</sup> Tsonsi su: “Yaya Abraham, Chigáne Lázaroma mandamoenjan ña

yaya tsaoni <sup>28</sup> ña cinco quinshingendecunga. Tsendeccuma tsu condaya'cho vani vana'jen'chonga ji'fasa'ne.” <sup>29</sup> Tsa'ma Abrahamjan su: “Tsendeccuja Moisés manda'choma an'bian'fa. Chiga Aya'fama afasundeccu tevaen'jema'qqe an'bian'fa. Tsa'suma tsu paña'faya'cho.” <sup>30</sup> Tsa'ma tiseja su: “Me'i, Yaya Abraham. Tsa'ma fa'e pa'chondecu'su tise'panga jasi tsu pañamba tise'pa egae tsincon'choma chi'gapa cati'faya.” <sup>31</sup> Tsa'ma Abrahamjan tisema su: “Moisés manda'choma pañambi'ta, Chiga Aya'fama afasundeccu tevaen'jema pañambi'ta ñoa'me pa'cho qquendya'pa ja'ni'qqe tisema paña'faya'bi.”

## 17

*Egae tsincon'chone condase'cho*

*(Mt 18.6-7, 21-22; Mr 9.42)*

<sup>1</sup> Tsomba Jesúsja tisema shondosundeccuma su:

—Tsaveqqe'su tsu va andenijan osha'cho tsu jin a'ima qqueñasi cuintsu egae tsincon'faye. Tsa'ma va'cha tsu tsa a'i majan cca'ima egae tsoñe injaen'suja. <sup>2</sup> Majan va ñame in'jan'cho du'shuma egae tsoñe in'jaen'ninda tisene bove ñotssi tsu toya tsa'caen injaembite sunda'cho patuma tise tsifonga tandamba singu'ccunga andeccoemoëne.

<sup>3</sup> Tisuma ñotsse coira'faja tsa'caen tsonsa'ne.

Que faenga'su quema egae tsincon'nijan tisema candusiaña'cho. Tsa'ma tsa a'i tise egae tsincon'choma chi'ga'nijan aqqepoeña'cho. <sup>4</sup> Tiseja fae a'ta si-ete se quema egae tsincomba siete se quema ño-quiañe in'jan'ninda tise egae tsincon'choma tsu aqqepoeña'cho.

*In'jan'da osha'choma oshaya'cho*

<sup>5</sup> Tisema shondosundeccuja Na'suma su'fa:

—Ingima in'jaenjan queve ti'tsse in'jañe.

<sup>6</sup> Na'su tise'pama su:

—Que'ija ñame re'riccoe in'jan'da ñoa'me qui osha'choma osha'faya. Nane mostasa choja ñoa'me'qqe chipiri tsu. Que'i in'jan'choja tsa'caen chipiri'ccu qui va rande quini'jin joqqitssiye mandaye osha'faya. “Joqqitssipa na'enga amppija!” qquen manda'ninda tsa'caen tsu daya.

### *Semasundeccu sema'faya'cho*

<sup>7</sup> Majan que'imbe semasundeccuja andema pa'fupa joñe sema'fa. Majan semasundeccuja que'i ovejama coira'je'fa. Tsa'ma sema nanimba tsaoni jisi ¿majan que'i'suja tisema qquen suya: “Junde ca'nimba dyaipa anjan”? <sup>8</sup> Me'i. Tsa'caen qui su'faya'bi. Ñoa'mejan qquen qui tisema su'faya: “Ña anqqe'suma sho'ccoengan. Osha'chove ñoñamba ñama o'fiamba cui'ñajan. Ña an nanisi qui omboe amba cu'iyá.” <sup>9</sup> Sema'suja ñotsse pañamba tsa'caen tsonsi ¿na'suta ti sema'suma ñotsse afaya'cho? <sup>10</sup> Me'i, tsaveqqe'su tise'pambe sema'sumajan. Toya'caen que'i'qqe osha'cho Chiga manda'choma pañamba tson'da qui qquen su'faya'cho: “Aquia semasundeccu gi. ¿Ma'caen tsu ingine ñotsse afa'faya? Aqquiatsse ingima mandasi gi tson'jen'fa.”

### *Diez na congomba pajisundeccu*

<sup>11</sup> Jesúsja Jerusaléni jayipa Galileane sombopa Samari-ani napipa <sup>12</sup> chipiri canqquenga ca'ni. Ca'ni ji'ni diez na congomba pajisundeccu tisema cachui'fa. Biane ccutsupa <sup>13</sup> quia'me fundopa afa'fa:

—¡Na'su Jesús, ingima mende'yeja!

<sup>14</sup> Jesúsja tise'pama attepa su:

—Japa Chigama afasundeccunga tisuma canjaen'faja.

Tise'pa jayi'fa'ni Jesúsja tise'pama ccushaen.  
<sup>15</sup> Tsonsi fae'cco tsendeccu'su tisu ccusha'choma attepa toequi shanda. Quia'me fundopa Chigane ñotsse afa'je. <sup>16</sup> Tsomba Jesús tsutteccofanga puntssamba camba'jui'ccu andenga ccuipa Jesúsma ñotsse afa. Tiseja samaria'su a'i. <sup>17</sup> Tsonsi Jesúsja su:

—¿Diezyi'cco a'i ti ccusha'fa? ¿Mani tsu faesu nueveta?

<sup>18</sup> ¿Aquia ti va israemi'su toequi jipa Chigama ñotsse afa? ¿Faesujeja me'i'on ti?

<sup>19</sup> Tsomba Jesúsja tisema su:

—Jangipa japa canseja. Queja ñame in'jamba qui ccusha.

*¿Chiga aindeccuve da'faya'cho?*

*(Mt 24.23-28, 36-41)*

<sup>20</sup> Fariseondeccuja Jesúsma ñajampaña'fa: “¿Minga'ni tsu a'ija Chiga aindeccuve da'faya?” Tsa'caen ñajampaña'fasi Jesúsja tise'pama su:

—A'i Chiga aindeccuve da'faya'choma que'ija atteye osha'faya'bi. <sup>21</sup> Ni a'ija qquen su'faya'bi: “Va'tti tsu tsa'caen da,” ni “Tse'tti tsu tsa'caen da.” Ñoa'me tsu Chigaja que'i injama'chonga ca'nisi qui tayo Tise aindeccuve da'fa.

<sup>22</sup> Tsa'caen supa Jesúsja tisema shondosundecuma su:

—Junde qui que'ija Sefaccone Ji'cho A'i que'i'ccu fae a'tayi'qqe can'jeñe in'jan'faya. Tsa'ma ñajan que'i'ccu can'jeña'bisi qui ñombi'ye'faya. <sup>23</sup> Cca'indeccuja que'inga conda'faya: “Joni tsu tiseja can'jen”, Taya'caen “Va'tti tsu Jesúsja can'jen.” Tsa'ma paña'fajama ni ñame ttatta'fajama. <sup>24</sup> Ña jiña'nijan poiya'cco tsu fae'ngatsse ñama atte'faya. Nane tsanda veyansi poiya'cco fae'ngatsse attequia'caen tsu poiya'cco ñama atte'faya. <sup>25</sup> Tsa'ma o'tieta gi ñoa'me vanaña'cho. O'tie tsu poiya'cco vani'su aindeccuja ñama chi'ga'faya. <sup>26</sup> Tayopi'su Noé

can'jeintequia'caña tsu ña ccase jiya'ngae. <sup>27</sup> Noé tsa'o shavonga otseya'ngae a'ija an'jemba cui'je'fa. A'ija pushe'fa. Tise'pa onquengendeccoma'qqe antte'fa. Tsa'caen canse'fa'ni na'en jipa poi'yi'ccoma piccasi tsangae pa'fa. <sup>28</sup> Toya'caen tsa'caeñi tsu tayopi'su Lot can'jeinte'qqe da'fa. Nane a'ija an'jen'fa, cui'je'fa, chava'je'fa, chavaen'jen'fa, jon'jen'fa, tsaoña'jen'fa. <sup>29</sup> Tsa'ma Lot Sodoma canqqe'ye sombosi tsu si'ngeja asufrei'ccu sefaccone amppipa poi'yi'ccoma oque cati. <sup>30</sup> Tsa'caeñi tsu ja'ño'su aindecu'qqe Chigave in'jambe'yi injanga canse'faya ña ccase jiya'ngae.

<sup>31</sup> Tsequi a'ta majan a'i tsa'o omba'su ppappaconi dyaipa tise an'bian'choma tsa'onga an'bian'da i'ngambe'yi tsu catipa ccuyaya'cho. Toya'caen majan nasipani sema'jen'da toequi tise tsaoni jimbe'yi ccuyin jaya'cho. <sup>32</sup> Lot pushene condase'choma ñotsse injan'jen'faja. <sup>33</sup> Majan tisu canse'pama ccushaeñe in'jan'da tsu qqeñaña. Tsa'ma majan tisu canse'pama cati'ta tsu ñoa'me ccushaya.

<sup>34</sup> Nane tsequi cose fae ana'jen'choni dos a'i ana'jen'choma fae'ccoe angapa faesuma catiya.

<sup>35</sup> Toya'caen dos pushesu fae'ngae sunda'je'fa'choma fae'ccoe angapa faesuma catiya. <sup>36</sup> Dos a'i nasipani sema'jen'choma'qqe fae'ccoe angapa faesuma catiya.

<sup>37</sup> Tsonsi tisema shondosundecuja Jesúsma su'fa:

—Na'su, ¿mani tsu tsa'caenjan daya?

Jesúsja tise'panga su:

—Congomba ccuini tsu ccompanajan bo'je'fa. Ña su'cho napisi qui in'jan'faya.

<sup>1</sup> Zutsse Chigama ñajaña'chove tisema shondosundecunga atesiañe in'jamba condase'choi'ccu Jesúsja condase. Nane a'ija anttembe'yi tsu Chigama ñajaña'cho tise'pa ñajan'choma isuya'ngae. <sup>2</sup> Qquen tsu Jesúsja condase:

—Fae canqqueni ñoquian'suja can'jen. Chigave in'jambipa dyojombipa ni fae a'i faesuma bove ñotssi qqen in'jambi. <sup>3</sup> Toya'caen tsandupajen'choqqe tsa canqqueni can'jen. Faesu a'i tisema egae tsonsi tsa ñoquian'suma ñajan cuintsu tsambe injama'choma somboeñe. Zutsse jipa ña'jansi <sup>4</sup> ñoquian'suja fuiteye in'jambi'ma asi'ttaen: “Ñajan Chigave in'jambipa dyojombi ni fae a'i faesuma ti'tsse'o qqen in'jambi. <sup>5</sup> Tsa'ma va tsandupajen'cho panshaen ñama noñangia'ninda gi tisema fuiteya. Tisema egae tsincon'sumbe injama'choma gi somboeña. Tsa'caen tsombian'da panshaen jipa ñama noñangian'jensi gi quimbiya.”

<sup>6</sup> Qquen supa Na'su Jesúsja su:

—Va ñoquian'suja ega a'i tsu. Tsa'ma paña'fa qui tise su'choma. <sup>7</sup> Nane tiseja ega'ma tsandupajen'choma pañamba fuite'ninda tsu Chiga'qqe tisema ñajansundecuma pañamba ccushaeña. A'ta toya'caen cose'qqe Chigave in'jamba ñajan'ninda ¿Chigata ti tise'pama se'piya? <sup>8</sup> Me'i, se'pimbipa junde tsu tise'pama ccushaeña. Tsa'ma ñajan Sefaccone Ji'cho A'i ccase ji'ta ¿jongoesuma gi va andeni atteya? ¿Ñame in'jamba tsa'caen ñajamba ronda'je'chondeccuma ti gi atteya?

### *Dos a'i Chigama ñajan'fa'cho*

<sup>9</sup> Majan a'i tisuja ño'a qqen in'jamba tisupaporama chi'ga'fa. Jesúsja va condase'pama tsendeccunga condase:

<sup>10</sup> —Dos a'i Chiga ettini ja'fa Chigama iñajañe. Fa'eja fariseo in'jan'cho a'i, osha'cho Chiga manda'choma paña'su. Faesuja gobierno impuestoma isu'su. <sup>11</sup> Fariseoja ccutsupa tisuma afaquua'caen qqen iñajan: “Chiga, ñajan faesu a'ia'cambipa gi Quema ñotsse afa'je. Cca'indeccuja a'ima dyoña'fa corifin'dima itsaye. Afopoemba a'ima dañ'o'jen'fa. Faesu pushesui'ccu ana'jen'fa. Ñajan tsa'caen tsincombi ni va impuestoma isu'sia'caen tsincombi. <sup>12</sup> Ñajan fae avujaquive dos a'ta ambe can'jen. Toya'caen jongoesuma isu'ta gi enttingeve Chiganga afe'je.” <sup>13</sup> Tsa'ma impuestoma isu'suja ccani catseme'yi ccutsu. Tsa'caen ccutsupa puntssamba sefanima camb'e'yi tivei'ccu tise utu'choma tssaipa su: “¡Chiga Quitsa, ña gi egae tsincon'su! Ñama mende'yeja.” <sup>14</sup> Ñoa'me gi su, impuestoma isu'suja avujatsse tise tsaoni ja tayo Chiga tise egae tsincon'choma joqqitssiansi. Tsa'ma Fariseoja me'i. Injanga afapa ja. Nane poi'yi'cco majan patsuye in'jan'da bove'ccoe tsu da'faya. Tsa'ma poi'yi'cco majan patsuye in'jambi'ta ti'tsse joccapitssia've tsu da'faya.

*Jesús dushundecuma me'de'cho*

*(Mt 19.13-15; Mr 10.13-16)*

<sup>15</sup> Toya'caen chambanaccu tise'pa dushundecuma Jesúsnga i'fa cuintsu tise'pama pporaeñe. Isi Jesúsma shondosundecuja attepa chambanaccuma iyu'u'fa.

<sup>16</sup> Tsa'ma Jesúsja tise'pama ttu'sepa su:

—Antte'faja cuintsu dushundeccu ñani ji'faye. Se'pi'fajama. Nane Chiga aindecuta tsu va dushundequua'can'fa. <sup>17</sup> Ñoa'me gi su: Va dushundeccuja ñame in'jan'fa. Majan tise'pa'caen ñame in'jan'da Chiga aindecuve dapa Chigama paña'faya.

Tsa'ma majan ñame in'jambi'ta ca'ni'faya'bi Chigai'ccu tsangae canseye.

*Na'su rico Jesús'ccu condase'cho*

*(Mt 19.16-30; Mr 10.17-31)*

<sup>18</sup> Ande nasundeccu'su Jesúsma ñajampaña:

—Ñotssia atesian'su, ¿jongoesuma gi tsoña tsangae canseye'ta?

<sup>19</sup> Jesúsja tisema su:

—¿Jongoesie qui ñama su “Ñotssia”? Chiga Quitsayi tsu ñotssia. A'ija poi'cco ñotssimbi tsu. <sup>20</sup> Tsa'ma tsangae canseye tsoña'chone ñajampaña'da, ¿queta ti qui atesu Chiga manda'choma? Nane qqen tsu su: Faesumbe pushei'ccu anajama. Cca'ima fi'ttijama. Cca'najama. Afopoenjama. Que yaya, que mamama'qqe ñotsse pañajan.

<sup>21</sup> Tiseja pañamba su:

—Chuitepie gi tsa'caen in'jamba pañamba canse.

<sup>22</sup> Jesúsja su:

—Toya fae'ccoe qui shaca. Que osha'cho an'bian'choma chavaemba pa'cco corifin'dima va'chandecunga att-ufaenjan. Tsa'caen afe'ta qui sefacconi ricove daya. Tsomba ñai'ccu fae'ngae jija.

<sup>23</sup> Tsa'ma tsama pañamba ande na'suja ñombi'ye osha'choma an'biamba. <sup>24</sup> Jesúsja tisema cambia su:

—Aiyepa tsu osha'choma an'bian'su Chiga a'ive daye.

<sup>25</sup> Bove aiyepambi tsu camello nojan'cco changoma pan-shañe. Nane osha'choma ambian'suta tsu ti'tsse vana'jen Chiga a'ive daye.

<sup>26</sup> Tsonsi pañasundeccuja su'fa:

—Tsa'camanda ¿majan tsu ccushaya?

<sup>27</sup> Tsa'ma Jesúsja su:

—A'i oshambi'ni'qqe tsu Chigaja oshaya.

<sup>28</sup> Tsonsi Pedroja su:



—Que canjan. Ingija tsa'o, antiama'qqe catipa gi quei'ccu fae'ngae jacan'fa.

<sup>29</sup> Jesús tise'pama su:

—Ñoa'me gi su, majan a'i tise tsa'o, tise pushe, antian, mama, yaya, du'shuma'qqe catipa Chiga in'jan'chove in'jan'da <sup>30</sup> ñoa'me tsu toya vani can'jemba ti'tsse an'biaña. Toya'caen jai'ngae Chiga sefacconi'qqe tsu tsangae canse'faya.

*Ccase Jesús tisu paya'chone condase*

*(Mt 20.17-19; Mr 10.32-34)*

<sup>31</sup> Tsomba Jesúsja tisema doce shondosundecuma ttu'sepa su:

—Paña'faja. Ingija Jerusaléni jayi'fa. Chiga Aya'fama afasundecuja Sefaccone Ji'cho A'i vanaña'chone tayopi conda'fa. Ja'ño ingi Jerusaléni jasi tsu pa'cco tsa vanaña'chone su'choja ñanga napiya. <sup>32</sup> Nane Chiga Tevaen'jen condaquia'caen israendecuja israembindeqquianga ñama afe'faya. Tsa'caen afesi ñama afasepa egave noñangiamba chi'gapa ñanga attupoen'faya. <sup>33</sup> Ñama ma'ppipa avuja'ccongga fi'tti'faya. Tsa'ma papa tres a'tangae gi ccase qquendyaya.

<sup>34</sup> Tsa'caen Jesús su'choma paña'ma shondosundecuja atesu'fambi. Nane injama'cho shacapa ñotsse paña'fambi.

*Jesús Jericó'su binima ccushaen'cho*

*(Mt 20.29-34; Mr 10.46-52)*

<sup>35</sup> Tsomba Jericó canqueni pan napiji'fa'ni binijan tsaiqui utufani dyaipa corifin'dive iñajan'jen. <sup>36</sup> Tsain'bio a'i panshanjin'fasi pañamba faesuma iñajampaña:

—¿Jongoesie tsu a'ija panshanjin'fa?

<sup>37</sup> Qquen iñajampañasi tisenga su:

—Jesús Nasareno panshanjinsi tsu tsain'bio a'i tisei'ccu jayi'fa.

<sup>38</sup> Tsa'caen pañamba tiseja quia'me fundondo'e afa:

—¡Jesús, David Dutssi'ye, ñama mende'yeja!

<sup>39</sup> Qquen fundosi o'tie jayisundeccuja tisema se'pipa su'fa:

—¡Ziyaja!

Tsa'ma ti'tsse quia'me fundo:

—David Dutssi'ye, ñama mende'yeja.

<sup>40</sup> Tsonsi Jesúsja tse'ttinga napipa ccutsupa manda binima i'faye. Bini catsesi Jesúsja iñajampaña:

<sup>41</sup> —¿Jongoesuve ña quenga tsoñe qui in'jan?

Binijan su:

—Na'su, atteye gi in'jan.

<sup>42</sup> Tsonsi Jesúsja tisema su:

—¡Tayo qui atteye osha! Queja ñame in'jamba qui ccusha.

<sup>43</sup> Tse'faei'ccuyi atteye oshapa tise'qqe Jesús'ccu fae'ngae ja. Ñoa'me Chigama ñotsse afa. Nane poi'cco a'i ccushaen'choma attepa Chigama ñotsse afa'fa.

## 19

### *Jesús Zaqueo tsaoni japa can'jen'cho*

<sup>1</sup> Jesúsja Jericó canquema ca'nimba panshanjin.

<sup>2</sup> Tse'tti tsu gobierno impuestoma isusundeccumbe na'suja can'jen. Tise iniseja Zaqueo. Tiseja osha'choma an'bian. <sup>3</sup> Jesúsma atteye in'jan'ma panshaen

re'richocopa oshambi tsain'bio a'i bo'fasi. <sup>4</sup> Tsa'caen oshambipa tise jayani buttopa japa quini'jinga ansundepa dyai tsene Jesús panshanjin'choma ñotsse atteye. <sup>5</sup> Jesúsja tse'ttinga napipa asuccocamba tisema attepa su:

—Zaqueo, junde andeja. Ñanda gi ja'ño a'ta que tsaoni japa can'jeña.

<sup>6</sup> Tse'faei'ccuyi Zaqueoja andepa avujatsse Jesúsma ca'nian tise tsa'onga. <sup>7</sup> Poiyi'cco a'i can'boemba afaccoye ashaen'fa: “Jesúsja egae tsincon'sumbe tsa'onga ca'nimba can'jen” qqen su'fa. <sup>8</sup> Tsa'ma Zaqueoja jangi ccutsupa Na'su Jesúsma su:

—Na'su, que canjan. Ña an'bian'choma enttingeve gi va'chandecunga afeya. Ñajan majama afopoemba cca'na'da gi cuatro se ti'tsse'e'qqe toequi afeya.

<sup>9</sup> Tsonsi Jesúsja su:

—Zaqueo'qqe Abraham dutssi'yepa tisia'caen ñame in'jan. Tsa'cansi ja'ño a'ta tsu va tsa'o'su aindecuja ccusha'fa. <sup>10</sup> Nane Sefaccone Ji'cho A'ita gi a'i qqe'chondecuma ccushaeñe ji.

*Diez corifin'dima coirasundeccu  
(Mt 25.14-30)*

<sup>11</sup> Jesús Jerusaléni pan napijisi a'i tisema pañamba junde Chigaja Jesúsma na'suve tsoña qqen in'jan'fa. Tsa'caen in'jan'fasi Jesúsja va condase'choma condase.

<sup>12</sup> Qquen tsu su:

—Ti'tsse'tssia ande na'su ttu'sesi joccapitssia a'i, tise ande'su na'suve dapa jiye, faesu andeni ja. <sup>13</sup> Tsa'ma toya jambite diez tisema shondosundecuma ttu'sepa poiyi'cconga mil corifin'dive afe cuintsu tise ccase jiya'ngae chavapa chavaemba ti'tsse gana'jen'faye.

<sup>14</sup> Tsa'ma majan tise aindecuja tisema chi'gapa cca'indeccuma omboe moen'fa ti'tsse'tssia ande na'sunga qqen condaye: “Va a'ima na'suve tsoñe in'jan'fambi gi.”

<sup>15</sup> Tsa'ma tsa a'ija tisu ande'su na'suve dapa toequi shandapa jipa tise corifin'dima afe'cho a'ima ttu'seye manda. Ttu'sepa mi'getsse gana'chove poiyi'ccoma iñajampaña. <sup>16</sup> Fae'ccoja na'sunga jipa su: “Na'su, que mil corifin'di'ccu gi diez mil corifin'dive gana.” <sup>17</sup> Qquen susi

na'suja su: “Ñotsse qui tson. Queja ñotssia shondo'su qui. Re'riccoi'ccu ñotsse tsonsi gi quema ccutsiaña na'suve diez canquema mandaye.” <sup>18</sup> Faesuja jipa su: “Na'su, que mil corifin'di'ccu gi cinco mil corifin'dive gana.” <sup>19</sup> Na'suja tisenga su: “Quema gi na'suve ccutsiaña cinco canquema mandaye.” <sup>20</sup> Tsonsi faesuja jipa su: “Na'su, va'tti tsu que mil corifin'di. Pañeronga onccamba gi coira. <sup>21</sup> Queja dyo'tssia a'i. Afembi'ma qui itsa'je. Jombi'ma qui tai'je. Tsa'cansi gi ñajan quema dyojo.” <sup>22</sup> Na'suja tisema su: “Que su'choyi tsu que injama'choma somboeña. Ñoa'me qui queja ega shondo'su. Ñajan dyo'tssia na'su, afembi'ma itsa'su, jombi'ma tai'su, qqen qui in'jan. <sup>23</sup> Tsa'caen in'jan'da ¿mingapa qui ña corifin'dima banco na'sunga afembi cuintsu ña jipa ñambema isuye corifin'di gana'choi'ccu?” <sup>24</sup> Tsomba na'suja pporotsse ccutsusundecuma su: “Tsambe mil corifin'dima itsapa diez mil corifin'dive an'bian'chonga afe'faja.” <sup>25</sup> Tsendeccuja su'fa: “Tsa'ma, na'su, tayo tsu tiseja diez mil corifin'dive an'bian.” <sup>26</sup> Na'suja su: “Ñoa'me gi su, majan an'bian'nijan ti'tsse tsu tisenga afeya'cho. Tsa'ma majan an'biambian'da tise re'riccoama'qqe tsu itsaya'cho. <sup>27</sup> Toya'caen ñama chi'gasundecuma i'faja. Tise'paja na'suve ñama in'jan'fambi. Tsa'ma tise'pama ipa ña caña'jen'ni fi'tti'faja.”

*Jesús Jerusaléni japa ca'ni'cho*

*(Mt 21.1-11; Mr 11.1-11; Jn 12.12-19)*

<sup>28</sup> Tsa'caen condase nanimba ccase Jerusaléni jaye ja. <sup>29</sup> Betfagéni, Betaniani pan napijipa Olivo ccotta'cconi pporotsse can'jemba tisema shondosundeccu'suma dosve manda moen <sup>30</sup> qqen supa:

—Va canquenga japa ca'nimba qui boro du'shuma atte'faya. Tsangaja majañi'qqe toya dyaipa jacambi.

Ccupapa vani i'faja. <sup>31</sup> Majan a'i: “¿Jongoesie qui boro du'shuma ccupa'je?” qquen iñajampaña'ninda: “Na'su tisenga dyaipa jaye” qquen tsu suya'cho.

<sup>32</sup> Manda moensi japa Jesús suqquia'caen atte'fa.

<sup>33</sup> Attepa ccupa'je'fasi boro du'shumbe nasundeccu tise'pama su'fa:

—¿Jongoesie qui boro du'shuma ccupa'je'fa?

<sup>34</sup> Tsonsi su'fa:

—Na'su tisenga dyaipa jaye.

<sup>35</sup> Jesúsnga ipa tise'pa ondiccu'jema boro du'shu sepacconga oppoensi Jesúsja otsepa dyai. <sup>36</sup> Tsanga Jesús dyaipa jayisi a'ija tise'pa ondiccu'je'cho sarupama tsaiquina ppappa'fa. <sup>37</sup> Olivo ccotta'ccoma andepa Jerusaléni catsesi tsain'bio tisema shondosundeccu bopa avujatsse afaye ashaen'fa. Jesús ñotsse tsonsi attepa quia'me fundopa Chigama ñotsse afa'fa. <sup>38</sup> Qquen tsu su'fa:

—Chigaja na'suma inginga afe. Ñoa'me ñotssia tsu. Sefacconi opatsse canse'faja. Pa'cco Chiga sefacconi Chigane ñotsse afa'faja.

<sup>39</sup> Tsonsi majan fariseondeccu a'i bo'fa'choi'ccu can'jemba Jesúsma su'fa:

—Atesian'su, quema shondosundeccuma iyu'uja.

<sup>40</sup> Tsa'ma Jesúsja su:

—Ñoa'me gi su, tsendeccu ziya'ninda va tsaiqui'su patu'qqe fundopa Chigama ñotsse afa'faya.

<sup>41</sup> Canquenga pan napijipa attepa Jesúsja i'namba <sup>42</sup> su:

—Ñajan in'jan cuintsu que'i Jerusalensundeccu opatsse canse'faye. Tsa'ma ja'ñonda qui tsa'caen canseye in'jan'ma toya osha'fambi. Nane tso'fema tsapiquia'caen qui tta'tta'fambi ma'caen opatsse canseya'chove. <sup>43</sup> Tayo tsu napiji que'ima

iyiccayesundeccu jipa que'i sombosa'ne shoquendi ttu'faya'cho. Toya'caen andema'qqe ovivi'faya que'i ttuccuma panshamba ca'niñe. <sup>44</sup> Ca'nimba que'ima fitti'tti'faya. Que'i dushundeccuma'qqe ttova amppian fi'tti'faya. Nane canqqe ttu'choma asittapa ni fae patuveyi'qqe faesumbe patu ombanga ántte'faya'bi. Nane que'ija Chiga que'ini jipa ccushaen'choma in'jambisi tsu tsa'caen tson'faya.

*Chiga ettini'su chavaensundeccu*

*(Mt 21.12-17; Mr 11.15-19; Jn 2.13-22)*

<sup>45</sup> Tsomba Jesús Chiga ettini ca'nimba chavaensundeccuma tteyamoeñe ashaen. Chavasundeccuma'qqe joquitssian. <sup>46</sup> Tise'pama su:

—Tise Tevaen'jenga Chigaja su; “Ña tsa'oja ñama iñajan'jen'tti tsu.” Tsa'ma que'ija va Chiga ettima ccanamba tsa'ove cambian'fa.

<sup>47</sup> Jesúsja poi a'ta Chiga ettini can'jemba atesian'jen. Chigama afa'su nasundeccu, Chiga Tevaen'jema atesu'chondeccu, joccapitssia israendeccu'qqe ttatta'fa ma'caen Jesúsma fi'ttiya'chove. <sup>48</sup> Tsa'ma ma'caen tsoña'chove atesu'fambi. Nane poiyo'cco a'i Jesúsma in'jamba tise pa'cco afa'choma paña'jen'fa.

## 20

*Jesús na'sia'caen atesian'jen'cho*

*(Mt 21.23-27; Mr 11.27-33)*

<sup>1</sup> Fae a'ta Jesúsja Chiga ettini can'jemba a'ima atesian'jen. Chiga ccushaen'chone ñotsse condase'choma candusian'jensi Chigama afa'su nasundeccu, Chiga Tevaen'jema atesu'chondeccu, israe'su coenzandeccu'qqe jipa tisema <sup>2</sup> su'fa:

—Inginga condaja majan na'su tsa'caen in'jaensi qui queja tsa'caen atesian'jen. ¿Majan tsu quema manda antte na'sia'caen afaye?

<sup>3</sup> Jesúsja pañamba tise'pama su:

—Ña'qqe gi que'ima inñajampaña. Nanga condaja:  
<sup>4</sup> ¿Juan feti'chota ti sefacconi'su Chiga mandasi feti'cho? ¿Tsambi'ta ti a'i mandasi feti'cho?

<sup>5</sup> Tsa'caen susi aindeccuja tisupaporai'ccu qqen condase'cco'fa:

—Ingi “Sefacconi'su Chiga mandasi feti'cho tsu” qqen su'ninda tsu tiseja suya: “Tsa'camanda ¿micomba qui Juanma pañamba in'jan'fambi?” <sup>6</sup> Tsa'ma “A'i mandasi feti'cho” qqen su'ninda tsu ñoa'me poiyyi'cco a'i iyicca'yepa ingima patui'ccu tovaccoen'faya. Poiyyi'cco a'i tsu Juanjan Chiga Aya'fama afa'su qqen in'jan'fa.

<sup>7</sup> Tsa'caen asi'ttaemba Jesúsma qqen su'fa:

—Majan Juanma fetiye manda'chove atesu'fambi gi.

<sup>8</sup> Tsonsi Jesúsja tise'pama su:

—Jen'da ña'qqe que'inga condaya'bi gi majan na'su mandasi ña qqen atesian'jen'choma.

*Ega coirasundecune condase'cho*

*(Mt 21.33-44; Mr 12.1-11)*

<sup>9</sup> Tsomba Jesús va condase'choma a'inga condase:

—A'ija o'fa tsa'jaccuve jomba faesu coirasundecunga afepa faesu andeni japa bo'tsse can'jen. <sup>10</sup> Taiya'cho napijisi tise'ma shondo'suma coirasundecunga manda moen cuintsu tise'pa tai'fa'cho'suma enttingeve isupa iye. Tsa'ma coirasundecuja shondo'suma ma'ppipa me'ccoeyi moen'fa. <sup>11</sup> Tsonsi na'suja faesu shondo'suma moen. Tsama'qqe ma'ppipa afasepa me'ccoeyi moen'fa. <sup>12</sup> Tsonsi ccase tres se faesu shondo'suma'qqe moen. Tsendecuma'qqe inñaccaemba joqquitssian'fa.

<sup>13</sup> Tsonsi o'fa tsajaccumbe na'suja su: “¿Ma'caen gi tsoña? Ña in'jan'cho dutssi'yema gi moeña. Tisemanda tsu paña'faya.” <sup>14</sup> Tsa'ma coirasundeccuja na'sumbe dutssi'yema attepa tisupaporai'ccu qquen condasecco'fa: “Vaja jai'ngae osha'choma isupa na'suve daya'cho. Jinge tisema fi'ttipa o'fa tsajaccuma tisumbe isu'faye.” <sup>15</sup> Tsa'caen supa tisema joqqitssiamba fi'tti'fa.

Tsa'caen tson'fa'ninda ¿ma'caen tsu na'suja ega coirasundeccuma tsoña? <sup>16</sup> Nane tiseja jipa tsu coirasundeccuma fi'ttiya. Tsendeccuma fi'ttipa o'fa tsajaccuma cca'indeccunga afeya.

Chigama afasundeccuja vama pañamba su'fa:

—Chigaja tsa'caen ántteya'bi.

<sup>17</sup> Tsa'ma Jesús tise'pama cambia qquen su:

—Tsa'cambian'da jongoesie tsu Chiga Tevaen'jenjan qquenda su:

Tsaonásundeccu joqqitssian'fa'cho patu tsu

Ñoa'me ti'tsse injienge'cho patuve da.

<sup>18</sup> Majan tsa patunga zuccopanshan amppi'ta tsu tisu uccaya. Tsa'ma tsa patu majan a'inga amppi'ninda tsaja vuviangeya.

<sup>19</sup> Chiga Tevaen'jema atesu'chondecu, Chigama afa'su nasundeccu'qqe tse'faei'ccuyi Jesúsma indiyé in'jan'ma antte'fa aindecuma dyojopa. Nane nasundeccuja pañamba in'jan'fa tise'pane Jesús va condase'pama tsa'caen condase.

*Gobierno impuestone condase'cho*

(Mt 22.15-22; Mr 12.13-17)

<sup>20</sup> Tsa'caen indiyé oshambipa a'tutsse tisema can'boen'fa. Toya'caen cca'indeccuma moen'fa Jesúsma shondosundeccu'caen attian'faye. Tsendeccuja Jesúsma can'boemba tise jongoesu qquen su'choma



ttatta'fa tisema afopoemba indipa governaroronga afeye.

<sup>21</sup> Jipa Jesúsma iñajampaña'fa:

—Atesian'su, queja tansintsse condapa qui tansintsse atesian'jen. Queja poiya'cco a'i fae'ngatssi qquen in'jamba qui dyombi'tsse Chigane atesian'choma atesian'jen. Tsa'caen in'jamba gi quema iñajampaña'ne in'jan: <sup>22</sup> ¿Chiga manda'chota ti antte cuintsu ingija na'su Césarnga impuestoma afeye? ¿Tsambi'ta se'pi ti?

<sup>23</sup> Tsa'caen Jesúsma qqueña'ne iñajampaña'fasi Jesúsja tise'pa in'jan'choma in'jamba qquen tise'pama su:

<sup>24</sup> —Corifin'dima ñanga canjaenjan. ¿Majambe tsove, majambe tevaen'cho tsu vaja?

Tise'paja su'fa:

—Na'su Césarmbe.

<sup>25</sup> Jesúsja tise'pama su:

—Tsa'caen Césarmbemajan Césarnga afe'faja. Toya'caen Chigambemajan Chiganga afe'faja.

<sup>26</sup> Tsa'caen Jesúsma iñajampaña'jen'fa'choma poiya'cco a'i tsu paña'jen'fa. Tsa'ma nasundeccuja Jesús afa'chone tisema qqueña'ne oshambipa “Ñotsse tsu afa” qquen in'jamba ziya'fa.

*Papa ccase qquendyaya'cho*

*(Mt 22.23-33; Mr 12.18-27)*

<sup>27</sup> Tsonsi majan Saduseondeccu Jesúsni ji'fa. Saduseondeccuja su'fa a'i pa'chota ccase qquendyaya'bi. <sup>28</sup> Jipa qquen Jesúsma iñajampaña'fa:

—Atesian'su, tayopi'su Moisésta tsu ingima mandapa tevaen cuintsu a'i du'shu mechoyi pasi tise pushe toya canse'ninda pa'chombe quinshi'ni tsu tsa pushesuma pusheya'cho. Du'shuma tsu isuya'cho tise quindyayembe inisema aqqe'pasa'ne. <sup>29</sup> Nane siete a'i antiandeccuja can'jen'fa. Quindyaja o'tie pushepa du'shube mechoyi

pa. <sup>30</sup> Pasi tise quinshin pa'chombe pushema pushepa tsa'caen du'shuve mechoyi pa. <sup>31</sup> Tsa'caeni faesu quinshinjan tisema pushepa pasi ñoa'me poiya'cco siete antian tsa pushesuma pushepa du'shuve mechoyi tsu pa'fa. <sup>32</sup> Omboe pushesu'qqe pa. <sup>33</sup> Tsa'caen tsonsi a'i ñoa'me ccase qquendya'ninda ¿majambe pushe tsu va pushesuja? Ñoa'me poiya'cco siete antiandeccu tsu tisema pushe'fa.

<sup>34</sup> Jesús tise'pama su:

—Va andeni tsandiendeccuja pushepa canse'fa. Pushesundeccuja tsa'ndupa canse'fa. <sup>35</sup> Tsa'ma Chigaja majan a'ima in'jamba Tisei'ccu can'jeñe ánttesi pa'cho'ye ccase qquendyapa tzeni Chiga Sefacconijan pushe'faya'bi ni tsa'ndu'faya'bi. <sup>36</sup> Tsangae pa'masiave dapa Chigama sefacconi'su shondosundeqquia'caen canse'faya. Nane tsendeccuja ccase qquendyapa tsu Chiga dushundeccuve da'fa. <sup>37</sup> Tsa'ma pa'chondeccu ccase qquendyaya'chone Moisés'qqe tayopi tevaen. Chigaja quini'si anchanda'je'cho'ye Moisésnga attiansi tevaen'choja qquen tsu su: “Na'su Chigaja Abraham Chiga tsu. Isaac Chiga tsu. Jacob Chiga tsu.” Nane tsa'caen Chigaja tise'pa Chiga qquen supa tsendeccu'qqe toya canse'fa qquen tsu su. <sup>38</sup> Nane Na'su Chigaja pa'chombe Chigambi tsu. Tsa'ma cansendeqquiambe Chiga tsu. Nane Chiganejan toya cansendeccu tayo pa'chondeccu'qqe toya ñoa'me canse'fa tsu.

<sup>39</sup> Tsonsi majan Chiga Tevaen'jema atesu'chondeccuja su'fa:

—Atesian'su, ñotsse qui su.

<sup>40</sup> Tsa'ma dyojopa tisema ti'tsse ñajampaña'fambi.

*Majambe du'shu tsu Cristoja  
(Mt 22.41-46; Mr 12.35-37)*

<sup>41</sup> Toya'caen Jesúsja tise'pama qquen ñajampaña:

—¿Ma'caen tsu atesiansundeccuja su'fa Cristoja David Dutssi'ye tsu? <sup>42</sup> Nane Davidja tise settapoen'cho tevaen'jenga qquen tsu su:

Na'su Chigaja ña Na'sunga su:

Ñai'ccu fae'ngae na'suve dapa va'ttinga dyaija ña tansin-fanga

<sup>43</sup> ña quema iyiccayesundeccoma patsusi que tsu'tte tsosicunga ccuiquua'caen oshambipa quema paña'faya'ngae.

<sup>44</sup> David tsa'caen “Ña Na'su” qquen su'ninda ¿ma'caen tsu Cristoja David dutssi'yeya?

*Jesúsja atesu'chondecuma iyu'u*

*(Mt 23.1-36; Mr 12.38-40; Lc 11.37-54)*

<sup>45</sup> Tsomba poiyo'cco a'i paña'jen'fa'ni Jesúsja tisema shondosundecunga su:

<sup>46</sup> —Injama'tse, que'i'qqe manda'choma atesu'chondecquua'caen tsonsa'ne. Tsendeccuja bia'a ondiccu'jema ondiccu'fa. Canqqe atandundunga a'i chavaeñe bo'fa'ni'qqe tsendeccuja bia'ave tisupapora chigambianccoye in'jan'fa. Chigane atesian'jen'ttinga ja'ta ti'tsse joccapitssia dyaipa'chove tsu in'jan'fa. Bopa an'jen'fa'ni ja'ta tsa'caen joccapitssianga dyaiye in'jan'fa. <sup>47</sup> Tise'pa coiraye qquen afopoemba tsandupajen'chondecu an'bian'choma cca'namba itsa'fa. Tsa'caen cca'namba bia'ave Chigama iñajan'fa ño'a qquen attiañe. Tsendecuma tsu Chigaja ti'tsse tise'pa injama'choma somboeña.

## 21

*Tsandupajen'cho Chiganga afe'cho*

*(Mr 12.41-44)*

<sup>1</sup> Jesúsja ricondeccu tise'pa afe'cho corifin'dima Chiga etti'su corifin'dima ppiña'jen'chonga ppiñasi atte. <sup>2</sup> Toya caña'jen'ni tsandupajen'cho'qqe jipa dos reama ppiña. <sup>3</sup> Tsama attepa Jesúsja su:

—Noa'me gi su, va tsandupajen'choja poiya'cco ricondeccuma ti'tsse tsu ppiña. <sup>4</sup> Tsendeccuja osha'choma tayo chavapa an'biamba tise'pa antteye'cho corifin'dima afe'fa. Tsa'ma tsandupajen'choja mechopa pa'cco tise chavapa canseye an'bian'cho corifin'dima afe.

*Chiga etti osui catiyeya'cho*

*(Mt 24.1-2; Mr 13.1-2)*

<sup>5</sup> Majan a'ija Chiga ettine Jesús'ccu condasecco'fa. Nane ñotssia patuma tsao'ñiamba osha'cho ñotssia afe'choi'ccu Chiga ettima ñoña'chone condaseccopa Jesúsja su:

<sup>6</sup> —Que'ija osha'cho va ñotssiamatte'fa. Tsa'ma jai'ngae ni fae patu faesu patumbe ombani ottaya'bi. Pa'cco tsu osui catiyeya'cho.

*Osefaeña'cho a'tane canjaeña'cho*

*(Mt 24.3-28; Mr 13.3-23)*

<sup>7</sup> Tsonsi tisema inajampaña'fa:

—Atesian'su, ¿minga'ni tsu tsa'caen daya? ¿Jongoesu canjaen'choma attepa gi tsa'caen daya'chove atesu'faya?

<sup>8</sup> Tsonsi Jesúsja tise'pama su:

—Injama'tse majandeccu que'ima afopoemba qqueñasa'ne. Chigaja ñama moen a'ima ccushaen'suve. Tsa'ma tsain'bio a'i tsu jipa “Ña gi Chiga in'jan'cho Cristo” qquen afopoen'faya. “Ja'ño tsu Chigaja a'ima ccushaeña” qquen tsu su'faya. Tsa'ma tise'pama paña'fajama. <sup>9</sup> Toya'caen osha'cho gera, iyicco'je'choma paña'an'qqe dyombe can'faja. Tsaveqqe'su tsu. O'tie tsu tsa'caen tsoña'cho. Tsa'ma tse'faei'ccuyija osefaeña'bi.

<sup>10</sup> Tsomba Jesús ti'tsse conda:

—Fae ande'su tsu faesu ande'sui'ccu iyicco'faya. Fae na'su tsu faesu na'sui'ccu iyicco'faya. <sup>11</sup> Ande'qqe oyaya. Cca'tti, cca'tti aindeccuja qquipoe'su'faya. Osha'cho paqqe'suma'qqe setsa'faya. Osha'cho dyoqqe'sui'ccu tise'pama dyoñansi a'ija sefacconi'su canjaen'choma'qqe atte'faya.

<sup>12</sup> Tsa'ma osha'cho tsa'caen toya napimbi'te cca'indeccuja que'ima indipa noñangian'faya. Que'ima Chigane atesian'jen'ttinga anga'faya que'i injama'choma somboeña. Picco'je'ttinga'qqe que'ima picco'faya. Que'ija ña aindeccusi ande nasundeccu, gobiernondeccu'qqe que'ima iyu'u'faya. <sup>13</sup> Tsa'caen que'ima iyu'uye angasi qui tansintsse ñane conda'faya. <sup>14</sup> Tsa'ma toya tsa'caen tsombi'te asi'ttaen'fajama jongoe qqen supa ccushaya'chove. <sup>15</sup> Nane ña gi que'ima in'jaemba afaeña que'i tansintsse afasi cuintsu que'ima noñangiansundeccu ziyaye. <sup>16</sup> Tsa'ma que'i antiandeccu, nane que'i yaya, mama, quindya, que'i amigondeccu'qqe que'ima a'tiemba noñangiansundeccunga afe'faya. Majan que'i'suma'qqe fi'tti'faya. <sup>17</sup> Que'ija ña aindeccusi tsu poi'cco que'ima chi'ga'faya. <sup>18</sup> Tsa'ma que'imajan qqeñañe osha'faya'bi. Ni fae tsove'su toseveyi'qqe qqeña'faya'bi. <sup>19</sup> Que'i ñame ta'etsse in'jamba qui ccushapa tsangae canse'faya.

<sup>20</sup> Tsa'ma tsain'bio sundarondeccu Jerusalén canquema shoquendi'je'fasi atepa qui in'jan'faya Jerusalén canquema osefaeña'cho tsu tayo napi. <sup>21</sup> Majan Judea andeni can'jen'da ccotta'cconga tsu ccuya'faya'cho. Majan canqueni can'jen'da tsu sombo'faya'cho. Majan tayo joccani can'jen'da Jerusaléni ca'nimbe'yi tsu jaya'cho. <sup>22</sup> Nane tsequi a'ta tsu Chigaja israendecumbe injama'choma somboeña. Osha'cho Tise Aya'fa

su'cho tsu napiya. <sup>23</sup> Va'cha pushesundeccuja majan suri'je'cho. Majan du'shuma chochoen'jendeccu tsequi a'ta tsu vana'faya. Nane poi andeni'su aindeccu vana'jen'fasi Chigaja israendeccuma iyicca'yepa tise'pa injama'choma somboeña. <sup>24</sup> Sundarondeccuja matichi'ccu tise'pama fi'tti'faya. Majamanda tsu indipa poi biani'su andeni maña ja'faya cuintsu tseni canse'faye. Toya'caen israembindeqquia tsu Jerusalénma patsupa an'bian'faya tise'pa manda'cho tsangae nangingeya'ngae.

*Sefaccone Ji'cho A'i ccase jiya'cho*  
(Mt 24.29-35, 42-44; Mr 13.24-37)

<sup>25</sup> Coejechigai'ccu canjaeña'choma qui atte'faya. Cose'suchigai'ccu, o'fei'ccu'qqe tsa'caen canjaensi qui atte'faya. Toya'caen andenga mar'su shave'pa jangipa zonzomba quia'me jensi poi'cco a'i dyopa zucco'faya. Nane gobierno nasundeccu'qqe ma'caen tsoña'chove atesumbipa dyo'faya. <sup>26</sup> A'ija jai'ngae tsoña'choma asi'ttaemba tsu dyopa paquia'caen da'faya. Nane sefacconi'su o'fe'qqe ccaningae ja'fasi tsu aindeccuja tsa'caen da'faya. <sup>27</sup> Tsonsi tse'i tsu atte'faya Sefaccone Ji'cho A'i osha'choma oshapa mandaye jiña'choma. Nane osha'cho ñotssiai'ccu unjimba'ye jiña'choma tsu atte'faya. Ña ji'ninda poi'cco tsu ñama atte'faya. <sup>28</sup> Osha'cho tsa'caen daye ashaensi asuccopa can'faja. Ñoa'me tsu que'i ccushaya'choja pan napiji.

<sup>29</sup> Tsomba Jesús va condase'choma condase:

—Higuera tetachojima can'faja. Nane poi tetachojima can'faja. <sup>30</sup> Ccaqueje sho'yosi atte'ta qui qqen in'jan'fa: “Coejefa tsu jiye tson'jen.” <sup>31</sup> Tsa'caeñi qui que'ija osha'cho ña su'choma atte'ta qqen in'jan'faya: “Chiga tsu jiye tson'jen. Ja'ño gi Tise aindeccuve da'faya.”

<sup>32</sup> Ñoa'me gi su va ja'ño can'jensundeccu pambi'te tsu osha'cho tsa'caen napiya. <sup>33</sup> Chiga sefacconi tsu pasaya. Va ande'qqe pasaya. Tsa'ma ña aya'faja tsangae tsu jinchoya.

<sup>34</sup> Majan a'ija ñoquimbipa injanga canse'fa. Majan a'ija ccusi'fa. Majan a'ija tise'pa an'bian'choma panshaen in'jan'fa. Tsa'ma injama'tse. Tsa'caen ñoquimbi'fajama. Ña su'choma'qqe aqqe'pa'fajama pan ña jisi atte jangipa dyosa'ne. <sup>35</sup> Ña ji'ninda tsu chhiriria quendecco'chonga indiyeqquia'caen a'ija atte jangi'faya. <sup>36</sup> Tsa'ma que'ija cambia ronda'jepa ñama inñajan'jen'faja. Tsayita qui osha'cho va vanaña'cho su'choma vanambe'yi ccushapa Sefaccone Ji'cho A'inga ccutsu'faya.

<sup>37</sup> Poi a'ta Jesúsja Chiga ettini can'jemba atesian'jen. Tsa'ma cose'ninda Olivo ccotta'cconga japa ana'jen. <sup>38</sup> Poi a'ta sinte'yi poi'yi'cco a'i Chiga ettinga bo'fa tisema pañañe.

## 22

### *Jesúsma indiye ñoña'fa*

(Mt 26.1-5, 14-16; Mr 14.1-2, 10-11; Jn 11.45-53)

<sup>1</sup> Israendeccu pan cupana'cco mechoa fiesta pan napiji. Tsaja Chiga panshaen'cho injienge'cho a'ta'su fiesta. <sup>2</sup> Chigama afa'su nasundeccu, Chiga Tevaen'jema atesu'chondecu'qqe Jesúsma fi'ttive in'jamba tta'tta'fa ma'caen a'tutsse fi'ttiya'chove. A'i bo'fa'choma dyopa tise'pama qqejeccoñe in'jan'fambi.

<sup>3</sup> Fa'e Jesúsma shondo'suja, Judas Iscariote tsu. Cocoya na'su, Satana, tise injama'choma in'jaensi <sup>4</sup> Judasja japa Chigama afa'su nasundeccui'ccu sundaro capitándeccui'ccu condasecco ma'caen Jesúsma tise'panga afeya'chove. <sup>5</sup> Tsendeccuja avujapa Judasnga corifin'dima afeye su'fa. <sup>6</sup> Tsonsi Judasja afeye qqen

supa japa tta'tta maqui a'i bo'fambi'te Jesúsma afeye cuintsu indi'faye.

*Na'su Jesús an'jen'cho*

*(Mt 26.17-29; Mr 14.12-25; Jn 13.21-30; 1 Co 11.23-26)*

<sup>7</sup> Pan cupana'cco mechoama añá'cho a'ta napi. Tsequi a'ta tsu Chiga panshaen'cho injienge'cho ovejama'qqe fi'ttiya'cho. <sup>8</sup> Tsa'cansi Jesúsja Juani'ccu Pedroma moen qqen supa:

—Japa ñoña'faja Chiga panshaen'cho injienge'cho añá'choma añá'chove.

<sup>9</sup> Tise'paja su'fa:

—¿Mani qui in'jan ingi ñoña'faye?

<sup>10</sup> Jesúsja tise'pama su:

—Que can'faja. Canquenga ca'nimba qui a'i tsa'ccu tsoripama angaji'choma cachui'faya. Tisema omboemba ja'faja. Mani tise ca'ni'ninda que'i'qqe ca'nimba <sup>11</sup> tsa tsa'o na'sunga conda'faja: “Atesian'su Jesús tsu quema iñajampaña: ¿Mani tsu queni pasiasundeccu cuarto? Tseni gi ñajan ñama shondosundecui'ccu Chiga panshaen'cho injienge'cho añá'choma añá.” <sup>12</sup> Sefani'su ppappacco rande cuartoma tsu tiseja que'inga canjaeña. Tseni tsu osha'cho jin que'i sho'ccoemba ñoña'faya'cho ingi añe. Tseni japa ñoña'faja.

<sup>13</sup> Tise'paja japa osha'choma Jesús suqquia'caen atepa Chiga panshaen'cho injienge'cho añá'choma sho'ccoen'fa.

<sup>14</sup> Añe bopa Jesúsja tisema shondosundecui'ccu an'jen'cho mesa jin'tti piyive ccuipa <sup>15</sup> tise'pama su:

—Ñoa'me gi va injienge'cho añá'choma que'i'ccu añe in'jan ña vanaña'cho toya napimbi'te. <sup>16</sup> Ccase añambi gi va panshaen'cho injienge'cho añá'choma Chiga a'i egae tsincon'choma panshaemba joqquitssiaña'gae. Tsequi



a'ta gi poiya'cco Chiga aindecui'ccu fae'ngae bopa ccase an'faya.

<sup>17</sup> Tsomba tasama isupa tsane Chigama ñotsse afapa tisema shondosundeccuma su:

—Vama isupa poiya'cco fae'ngae re'riccoe cu'i'faja.

<sup>18</sup> Ñoa'me gi su ja'ño cu'ipa gi ccase va o'fa tsaja tsa'ccuma cu'ia'bi Chigai'ccu poiya'cco Tise aindecui'ccu fae'ngae bo'faya'ngae.

<sup>19</sup> Tsomba Jesús panma isupa tsane'qqe Chigama ñotsse afapa doñamba tise'panga attufaen qqen supa:

—Vaja ña ai'vo tsu. Que'ine gi ña ai'voma afe. Tsa'cansi va panma an'da ña que'ine afe'choma injan'jen'faja.

<sup>20</sup> Omboe pa'ccoma an nanimba tasama'qqe isupa afe. Tasama afepa qqen tsu su:

—Chiga Quitsa aindecui'ccu cuname injancco'fa'choma condasesi ña anjampa tsu tsane tssaña'cho. Que'ine gi ña anjampama tssañaña. Va o'fa tsaja tasa tsu ña anjampa tssamba ccushaen'choma canjaen.

<sup>21</sup> Tsa'ma que can'faja ñama chi'gapa afe'su tsu fae'ngae va mesani ñai'ccu an'jen. <sup>22</sup> Ñajan Sefaccone Ji'cho A'i gi Chiga mandaquua'caen paya. Tsa'ma va'cha tsu ñama chi'gapa afe'su.

<sup>23</sup> Jesús qqen susi tisema shondosundeccu tisupaporai'ccu condasecco'fa majan tsu tsa'caen Jesúsma chi'gapa afeya'cho.

*Majan tsu ti'tsse'tssia qqen afacco'fa*

<sup>24</sup> Toya'caen tsu afacco'fa majan tise'pa'su ti'tsse jocapitssia. <sup>25</sup> Tsonsi Jesús tise'pama su:

—Israembindequua nasundeccuja tise'pa a'ima manda'fa. A'ima fuiteye tsa'caen manda'fa qqen tsu su'fa. <sup>26</sup> Tsa'ma que'inejan tsa'cambi tsu. Que'inejan majan ti'tsse'tssia tsu utu'ccoe daya'cho. Manda'su

tsu shondo'sia'caen daya'cho. <sup>27</sup> ¿Majan tsu ñoa'me ti'tsse'tssia? ¿Mesani an dyai'su? Tsambi'ta ¿semamba o'fian'su? Ju, mesani an dyai'su tsu ti'tsse'tssia. Tsa'ma ñajan tsa sema'sia'caen que'i'ccu can'jen.

<sup>28</sup> Que'ija ñai'ccu fae'ngae jacamba qui ñai'ccu fae'ngae vana'jen'fa. <sup>29</sup> Chiga ña Quitsaja tayo tsu ñama na'suve manda. Tsonsi tsa'caen gi ña'qqe que'ima na'suve manda cuintsu <sup>30</sup> ña na'suve dasi que'i'qqe ñai'ccu ña an'jen'cho mesanga fae'ngae amba cu'i'faye. Que'ija na'su dyaipa'chonga dyaipa qui poiya'cco israendecumbe in-jama'choma somboeñe manda'faya.

*Pedro atieña'chone Jesús conda*

*(Mt 26.31-35; Mr 14.27-31; Jn 13.36-38)*

Toya'caen tsu Na'suja su:

<sup>31</sup> —Simón, Simón, vama canjan. Satanajan poiya'cco que'ima in'jamba iñajan trigoma qqe'shoqquia'caen que'ima vanaeñe. <sup>32</sup> Tsa'ma ñajan quene gi Chigama iñajan que ñame in'jan'choma qqesa'ne. Vana'jen'cho pan-shansi ccushapa que faengasundecuma'qqe quiñaen-jan.

<sup>33</sup> Tsama pañamba Pedro tisema su:

—Na'su, quema picco'je'ttinga picco'fa'ninda gi ña'qqe que'ccu fae'ngae piccoyeya. Quema fi'tti'fa'ninda gi ña'qqe que'ccu fae'ngae paya.

<sup>34</sup> Jesúsja su:

—Pedro, ñoa'me gi quenga su: Arapa gayo toya ja'ño a'ta se'yombi'te queja ñane tres se a'tieña “Tisema ate-sumbi gi” qqen supa.

*Jesús vanaña'cho tayo napi*

<sup>35</sup> Tsomba Jesús poiya'ccoma iñajampaña:

—Ña que'ima bosa ni o'va ni sapatove'qqe me'ccoe manda moe'ninda ¿jongoesu tsu shaca?

Tise'paja su'fa:

—Me'i, shaca'fambi.

<sup>36</sup> Tsonsi Jesúsja su:

—Tsa'caen tayoe mandapa gi ja'ñojan que'ima conda: Majan bosapa'ta tsama angaya'cho. O'vama'qqe tsa'caen. Majan a'i sundaro matichive mechota bove ñotssi tsa tise omba'su ondiccujema chavaemba sundaro matichima chavaye. <sup>37</sup> Ñoa'me gi su: Va Chiga Tevaen'jen ñane su'choja ja'ño tsu napi: “Egae tsinconsundecui'ccu tisema in'jan'fa.” Pa'cco ñane tevaen'cho tsu junde napiya'cho.

<sup>38</sup> Tise'paja su'fa:

—Na'su, que canjan. Vani gi an'bian'fa dos sundaro matichima.

Jesúsja cambia su:

—Nanitssi tsu.

*Jesús Getsemaníni Chigama ñajan*

*(Mt 26.36-46; Mr 14.32-42)*

<sup>39</sup> Tsomba Jesúsja sombopa tise in'janquia'caen Olivo ccotta'ccongja. Tisema shondosundecqu'qqe fae'ngae jaja'fa. <sup>40</sup> Tseni napipa Jesús tise'pama su:

—Chigama ñajan'jen'faja egae tsinconsa'ne.

<sup>41</sup> Tsomba tiseja ti'tsse joccani ja -biambi'ccoe- patura ttovaquia'can'ccoe. Japa ccaru dyaipa Chigama ñajamba <sup>42</sup> su:

—Yaya, que in'jan'da va ña vanaña'choma joquitssianjan. Tsa'ma joquitssiañe in'jambi'ta que in'janquia'caen tsonjan. Ña in'jan'chomajan me'i.

<sup>43</sup> Tsonsi Chigama sefacconi'su shondo'su Jesúsnga atimba tisema quiñaen. <sup>44</sup> Tsa'caen ñoa'me vana'jemba ti'tsse quia'me Chigama ñajan. Poipa'su'qqe sombopa ñoa'me injan'tsse anjampa tssanquia'caen andenga amppi'je.

<sup>45</sup> Chigama iñajan nanimba jangipa tise ma shondosundeccunga japa tise'pa ñombi'yepa ana'jen'choma atte.

<sup>46</sup> Attepa tise'pama su:

—¿Micomba qui ana'jen'fa? Jangipa Chigama iñajan'jen'faja egae tsinconsa'ne.

*Jesúsma indi'fa'cho*

(Mt 26.47-56; Mr 14.43-50; Jn 18.2-11)

<sup>47</sup> Tise toya afa'je'ni tsain'bio a'i jiña'fa. Jesúsma shondo'su Judas tsu a'ima angacan. Tiseja Jesúsma mochaye catse. <sup>48</sup> Tsa'ma Jesús tise ma su:

—Judas, ¿Aquia ti qui in'janquia'caen mochapa Se-facone Ji'cho A'ima cca'indeccunga afeya?

<sup>49</sup> Tsonsi Jesús'ccu jacansundeccuja ma'caen tsoña'chove in'jamba su'fa:

—Na'su, ¿matichi'ccu iyicco'faya'an ti gi?

<sup>50</sup> Qquen supa fa'e tise'pa'su Chigama afa'su na'sumbe sema'suma atui pa tise tansinfa'su tsosinama qquerui ttova. <sup>51</sup> Tsa'ma Jesúsja su:

—¡Anttéja! Panshaen jova'caen tsinconjama.

Qquen supa sema'sumbe tsosinama pporaemba toeningatsse ccushaen. <sup>52</sup> Omboe Chigama afa'su nasundeccu, sundaro capitándeccu, israe'su coenzandeccu'qque tsa'caen Jesúsma indiye ji'fasi Jesúsja tise'panga su:

—¿Ccanambama indiye jiquia'caen ti qui sundaro matichi, quini'ccoi'ccu ji'fa? <sup>53</sup> Ñajan Chiga ettini poi a'ta que'i'ccu can'jen'ma qui ñama pporaen'fambi. Tsa'ma va tsu que'i patsuya'cho hora. Sinttia'su na'su, Satana, tsu ja'ño patsu.

*Pedro Jesúsne a'tien'cho*

(Mt 26.57-58, 69-75; Mr 14.53-54, 66-72; Jn 18.12-18, 25-27)

<sup>54</sup> Tsonsi Jesúsma qquitssa indipa anga'fa. Chigama afa'su na'su ettinga angapa ca'nian'fa. Pedroja omboe biacca jacan. <sup>55</sup> Aindeccu tsa'o atandundunga si'ngema set-saemba sa'vuye dyai'fasi Pedro'qqe fae'ngae tise'pai'ccu dyai. <sup>56</sup> Pedro si'nge anchanda'cho a'tatssiani dyaisi sema'su pushesu tisema attepa can'boemba su:

—Va a'i'qqe tsu Jesús'ccu canjen'su.

<sup>57</sup> Tsa'ma Pedroja qqen supa a'tien:

—Pushesu, ni ñajan tisema atesumbi.

<sup>58</sup> Omboe faesu'qqe Pedroma attepa su:

—Que'qqe tsendeccu'su qui.

Tsa'ma Pedroja su:

—Tsandie, me'i gi.

<sup>59</sup> Fae hora'ca'en pasasi faesuja quia'me qqen su:

—Ñoa'me tsu va tsandieja Jesús'ccu canjen'su.

Tise'qqe Galilea'su.

<sup>60</sup> Tsa'ma Pedroja su:

—Tsandie, atesumbi gi que jongoe qqen su'choma.

Tse'faei'ccuyi arapa gajoja se'yo. <sup>61</sup> Se'yosi Na'su Jesúsja piyicamba Pedroma can'boen. Tsonsi Pedroja Na'su Jesús qqen su'choma in'jan: “Arapa gayo toya ja'ño a'ta se'yombi'te queja ñane tres se a'tieña.”

<sup>62</sup> Tsa'caen in'jamba Pedroja sombopa quia'me i'na.

### *Jesúsma afase'fa'cho*

*(Mt 26.67-68; Mr 14.65)*

<sup>63</sup> Tsonsi Jesúsma indisundeccuja tisema afasepa tsse'tsse'fa. <sup>64</sup> Tise tso'fema sarupai'ccu tandamba tise cambajuma tsaipa iñajampaña'fa:

—Injama'choi'ccu in'jamba condaja majan tsu quema tssai.

<sup>65</sup> Toya'caen osha'cho egae afa'choi'ccu tisema afase'fa.

*Jesúsma iñajampaña'fa'cho*

*(Mt 26.59-66; Mr 14.55-64; Jn 18.19-24)*

<sup>66</sup> Cosepa a'tasi poi'cco israe'su coenzandeccuja bo'fa. Poi'cco Chigama afa'su nasundeccu, poi'cco Chiga Tevaen'jema atesu'chondeccu'qqe bo'fa. Tsa'caen bo'fa'chonga Jesúsma angasi nasundeccuja tise'ma su'fa:

<sup>67</sup> —¿Queta ti qui Chigambe Cristo? Inginga condaja.

Tsa'ma Jesúsja su:

Que'inga conda'ni'qqe qui ñama paña'faya'bi. <sup>68</sup> Ña que'ima iñajampaña'ni'qqe qui ñanga conda'faya'bi.

<sup>69</sup> Tsa'ma Chigaja osha'choma oshacho. Ñajan Sefaccone Ji'cho A'i. Jai'ngae gi Chiga Quitsai'ccu dyaipa fae'ngae osha'choma mandaya.

<sup>70</sup> Tsonsi tsu poi'cco su'fa:

—¿Tsa'caenda ti qui Chiga Dutssi'ye?

Jesúsja tise'pama su:

—Ju, que'i suqquia'can gi.

<sup>71</sup> Tsonsi tsu su'fa:

—¿Micomba gi cambia afasundeccuve ti'tsse ttatta'je'fa? Tayo gi tise aya'fai'ccu tise su'choma paña'fa.

## 23

*Na'su pilato Jesúsma iñajampaña'cho*

*(Mt 27.1-2, 11-14; Mr 15.1-5; Jn 18.28-38)*

<sup>1</sup> Tsomba tse'i poi'cco bo'fa'chondeccu fae'ngae jangipa Jesúsma anga'fa Na'su Pilatonga. Tseni napipa

<sup>2</sup> Jesús ma'caen tsincon'choma condaseye ashaemba su'fa:

—Ingija va a'ima atepa gi indi'fa. Tiseja ingi aindec-cuma afopoemba atesian'jen. Ingima tsu se'pi Na'su César iñajan'cho impuestoma afeye. Tiseja Cristo qqen tsu su, ande na'su qqen su'cho.

<sup>3</sup> Tsonsi Pilatoja Jesúsma iñajampaña:

—¿Queta ti qui israe'su na'su?

Jesúsja conda:

—Que suqquia'caen, ña gi.

<sup>4</sup> Tsonsi Pilatoja Chigama afa'su nasundecuma, a'i bo'fa'chondecuma'qqe su:

—Ñajan tisene shacapave attembi gi.

<sup>5</sup> Tsa'ma tise'paja ti'tsse iyicca'yepa qqen su'fa:

—Tiseja poiya'cco Judea aindecuma qqejecoen'su tsu. Nane Galileani atesiañe ashaemba ja'ñojan va can-qqueni'qqe tsa'caen atesian'jen.

### *Herodes Jesúsma ñajampaña'cho*

<sup>6</sup> Pilatoja tsama pañamba qqen ñajampaña: “¿Jesústa ti Galilea'su?” <sup>7</sup> “Ju,” qqen susi Pilatoja Jesúsma angaye manda Herodesnga. Galilea ande na'su Herodesja tsequi a'ta Jerusaléni can'jen. <sup>8</sup> Herodesja Jesúsma atepa ñoa'me avuja. Osha'choma tisene pañamba bo'tssingae tisema atteye ñombi'ye. Toya'caen tsu in'jan cuintsu Jesús majan sefani'su canjaen'choma attiansi atteye. <sup>9</sup> Tsa'caen in'jamba tsain'bitsse Jesúsma ñajampaña. Tsa'ma Jesúsja afambi. <sup>10</sup> Chigama afa'su nasundeccu, Chiga Tevaen'jema atesu'chondecu Herodesnga fae'ngae ccutsupa ñoa'me Jesúsne osha'cho egave conda'fa. <sup>11</sup> Herodes, tise sundarondeccu'qqe Jesúsma chi'gapa afase feña'jen'fa. Ñotssia na'su sarupa'cain'ccu tisema ondiqquimba toequi Pilatonga maña. <sup>12</sup> Tayoeja Herodesja Pilatoi'ccu iyiccaye'su. Tsa'ma tsequi a'ta tsu ñoquicco'fa.

### *Jesúsma fi'ttiye manda'cho*

(Mt 27.15-26; Mr 15.6-15; Jn 18.39-19.16)

<sup>13</sup> Tsomba tse'i Pilatoja Chigama afa'su nasundecuma, israe'su nasundecuma, poiya'cco a'ima'qqe ttu'se boñamba <sup>14</sup> su:

—Tiseja aindecuma quejeco'en'su qquen supa qui va a'ima ñanga i'fa. Que'i caña'jen'ni gi tise ma iña-jampaña'ma que'i suquia'caen egae tsinon'chove attembi. <sup>15</sup> Toya'caen Herodes'qqe tise ma iñajampaña'ma shacapave attembipa tise ma toequi moen. Va a'ija jongoesuma'qqe egae tsincombi tise ma fi'ttiya'chove. <sup>16</sup> Tsa'cansi gi tise ma ma'ppipa ccupaya.

<sup>17</sup> Poi canqqe'fa Chiga panshaen'cho injienge'cho fiesta panshaen'jenqui tsu na'su Pilatoja fae indiye'choma ccupaye atesu. <sup>18</sup> Jesúsma ccupaye qquen susi poiya'cco a'i fae'ngatse fundondo'e afa'fa:

—¡Va a'ima fi'ttipa Barrabásma ccupaja!

<sup>19</sup> Nane voeyi Jerusaléni tsa Barrabásja nasundecuma joquitssiañe in'jamba a'ima fi'ttisi tise ma indipa piccopa an'bian. <sup>20</sup> Pilatoja toya Jesúsma ccupaye in'jamba ccase aindecunga tsa'caen su. <sup>21</sup> Tsa'ma ti'tsse fundondo'e su'fa:

—¡Avuja'ccongá otija! ¡Avuja'ccongá otipa fi'ttija!

<sup>22</sup> Ccase, tres se Pilatoja aindecunga su:

—¿Jongoesune qui tise ma fi'ttiye in'jan'fa? ¿Jongoesian tsu egaeta tsinon? Attembi gi jongoesuve egae tsinon'choma tise ma fi'ttiya'chove. Tsa'camba gi tise ma ma'ppipa ccupaya.

<sup>23</sup> Tsa'ma aindecuja iyicca'yepa quia'me fundondo'e afapa Pilatoma manda'fa cuintsu avuja'ccongá Jesúsma fi'ttiye. Tsa'caen fundo'jepa Pilatoma patsu'fa. <sup>24</sup> Tsónsi Pilatoja Jesúsma fi'ttiye manda tise'pa in'janquia'caen. <sup>25</sup> Tsomba indiye'cho Barrabásma, tsa nasundecuma joquitssiañe in'jamba a'ima fi'tti'su, tsama tiseja ccupa. Tsa'ma Jesúsma a'inga afe cuintsu tise'pa in'janquia'caen tson'faye.



*Avuja'ccongá fi'tti'cho**(Mt 27.32-44; Mr 15.21-32; Jn 19.17-27)*

<sup>26</sup> Tsonsi sundarondeccu Jesúsma fi'ttiye angaji'fa'ni Simón, Cirene ande'su a'i, canquenga ca'nisi cachuicopa tisema indi'fa. Indipa manda'fa cuintsu Jesús avuja'ccoma andupa Jesús sepaccofae jiye. <sup>27</sup> Toya'caen tsain'bio a'i Jesús sepaccofae jiña'fa. Tsain'bio pushesundeccu'qqe jiñamba ñombi'yepa ina'jen'fa. <sup>28</sup> Tsa'ma Jesúsja piyicamba tise'pama su:

—Jerusaléni'su pushesundeccu, ñane i'na'fajama. Tsa'ma que'ine, que'i dushundeccune i'na'faja. <sup>29</sup> Nane jai'ngae napisi tsu a'ija qqen su'faya: “Avujatssiya tsu majan pushesu du'shu mechoaja. Nane majan du'shuve isumbi'ta, majan du'shuma chochoembi'ta avujatssiya tsu.” <sup>30</sup> Tsequi a'ta tsu a'ija paye in'jamba ccotta'cco tisenga amppipa a'tuye ñombi'ye'faya. Tsa'caen in'jamba tsu ccotta'ccoma qqen su'faya: “¡Inginga amppi otssija!” <sup>31</sup> Nane cuna ttemba re'riccoe si'ngenga ju'ruqquia'caen ñajan ja'ño vanaña. Tsa'ma quini'cco samba quia'me ju'ruqquia'caen qui que'ija ti'tsse'tsse vana'faya'cho.

<sup>32</sup> Toya'caen faesu dos a'i, egae tsinconsundecuma'qqe Jesús'ccu fae'ngae fi'ttiye anga'fa. <sup>33</sup> “Tsove tsu'tta” qqen su'cho ccotta'ccongá napipa tse'ttinga Jesúsma avuja'ccongá otipa ccutsian'fa. Tsa dos egae tsinconsundecuma'qqe faesu avuja'ccongá otipa ccutsian'fa fa'emajan Jesús tansinfanga, faesumajan Jesús pavefanga. <sup>34</sup> Ccutsiansi Jesúsja su:

—Yaya, tise'pa'ye va egae tsincon'choma joqquitssianjan. Va aindeccuja tise'pa tson'jen'choma atesu'fambi.

Toya'caen sundarondeccuja gana qqen cofe'je'fa Jesús ondicu'je'cho sarupama attufaenccoye. <sup>35</sup> Aindeccuja can ccutsu'fa. Toya'caen nasundeccuja tisema afase'fa qqen supa:

—Tiseja faesuma ccushaen. Cuintsu faesuma ccushaenqquia'caeni tisuma'qqe tsa'caen ccushaenjan. Tiseja ñoa'me Chiga in'jan'cho Cristota tsa'caen tsu canjaeña'cho.

<sup>36</sup> Sundarondeccu'qqe tisenga catsepa inzatssia o'fa tsaja tsa'ccuma cui'ña qqen co'fe'fa. <sup>37</sup> Toya'caen afasepa tsu qqen su'fa:

—¡Queja ñoa'me israe'su na'suta tisuma ccushaenjan!

<sup>38</sup> Toya'caen Jesús tsove omba'ttinga qqen tevaen'choma avuja'ccongá ancaen'fa.

Vaja israe'su na'su.

<sup>39</sup> Fa'e egae tsincon'su Jesús'ccu pporotsse avuja'ccongá otiye'choja Jesúsma afasepa su:

—¡Queja ñoa'me Cristota Tisuma ccushaemba ingima'qqe ccushaenjan!

<sup>40</sup> Tsa'ma faesu otiye'choja tise faenga'suma iyu'upa su:

—¿Dyombi ti qui Chiganejan? Que'qqe va a'ia'caen paya. <sup>41</sup> Ingija egae tsincomba gi ja'ño vanamba tsane afepoen'jen'fa. Nane manda'cho mandaqquia'caen gi pa'faya. Tsa'ma va a'ija egae tsincombi.

<sup>42</sup> Tsomba tiseja Jesúsma su:

—Jesús, que na'suve da'ta ñama injan'jenjan.

<sup>43</sup> Jesúsja tisema su:

—Ñoa'me gi su, ja'ño a'ta qui ñai'ccu Chiga ñotssiani can'jeña.

### *Jesús pa*

*(Mt 27.45-56; Mr 15.33-41; Jn 19.28-30)*

<sup>44</sup> Tayo chiga tansia'ni pa'cco ande'ye sintsse cose-qquia'ca'en da. Nane chiga ondu'setsse tsa'caen sintsse da. <sup>45</sup> Tsa'caen cojechiga da'je'ni Chiga etti'su Chigai'ccu cachuicco'je'cho quartoma picco'je'cho sarupa'qqe chit-tain ja. <sup>46</sup> Tsonsi Jesúsja quia'me afapa su:

—¡Yaya, ña qquendya'pama gi quenga afe'je!  
Qquen susi tise qquendya'pa somboin jasi pa.

<sup>47</sup> Tsonsi sundaro capitán tsa'caen da'choma attepa Chigama ñotsse afapa su:

—Ñoa'me va a'ija egae tsincombi.

<sup>48</sup> Tsain'bio a'i avuja'ccongá fi'tti'choma atteye bopa Jesús tayo pasí attepa tise'pa utu'choma tssai'fa ñombi'ye'choma canjaeñe. Tsa'caen ñombi'yepa tise'pa tsaoni jaja'fa. <sup>49</sup> Toya'caen Jesús amigondeccu'qqe biapieyi ccutsupa pa'tssima atte'fa. Majan pushesundeccu'qqe, Jesús'ccu fae'ngae Galileane ji'chondecu'qqe tsendecui'ccu fae'ngae ccutsupa atte'fa.

*Jesúsma a'tu'fa'cho*

*(Mt 27.57-61; Mr 15.42-47; Jn 19.38-42)*

<sup>50-51</sup> Israe'su nasundeccu bopa Jesúsma fi'ttiye mandasi fa'eja tansintsse in'jamba fi'ttiye se'pi. Tsaja ño'a a'i, tise iniseja José. Judea ande'su Arimatea canqqe'su a'i tsu. Tiseja in'jamba Chiga tisu aindecuma ccushaemba mandaya'chove ronda'je. <sup>52</sup> Tise tsu Pilatoni japa Jesús ai'vove in'ajan. <sup>53</sup> “Isupa angaja” qqen susi avuja'cco'ye andiamba totoa sarupai'ccu findipa ñoña'cho fattocco chango atu'ttinga ccuiña'fa. Tseccungaja faesu pa'choma toya a'tumbi'choa. <sup>54</sup> Sema'ma'qquia a'ta tayo napijisi toya tsu ñoña'jen'cho a'ta.

<sup>55</sup> Tsonsi pushesundeccu'qqe Jesús'ccu fae'ngae Galileane ji'chondecu omboe jipa atu'ttima atte'fa. Ai'voma ma'caen ccuiña'choma'qqe attepa <sup>56</sup> toequi Jerusaléni ja'fa. Tsa'caen japa pa'chombe ai'voma onjoenqqe'su ñome'bama'qqe ñoña'fa Jesús ai'voma onjoeñe. Manda'cho mandaqquia'caen sema'ma'qquia a'ta tseni ño'fá can'jen'fa.

## 24

*Jesús ccase qquendya'cho**(Mt 28.1-10; Mr 16.1-8; Jn 20.1-10)*

<sup>1</sup> Cuna avujaquive a'tapa coe'je tseyi deji'ni tsesu pushesundeccuja atu'ttini ja'fa. Ñome'bama tayo ñoñamba anga'fa. <sup>2</sup> Napipa atte'fa picco'cho patuma tayo joqqitssian'choma. <sup>3</sup> Tsa'ma atu'ttinga ca'nimba Na'su Jesús ai'voma atte'fambi. <sup>4</sup> Toya dyopa asi'ttaén ccutsu'fa'ni dos a'i, ondiccu'je chhariccotssia'ma ondiccucho'chondeccu, fae'ngae fae'tti ccutsu'fa. <sup>5</sup> Tsama atepa pushesundeccuja dyopa puntssan ccutsu'fa. Tsa'ma tsa tsandiendeccuja tise'pama su'fa:

—¿Jongoesie qui a'ija cansiama pa'cho ccuini ttatta'je'fa? <sup>6</sup> Tiseja va'tti can'jembi. Tayo tsu qquendyapa ja. ¿Injan'jen'fambi ti qui Jesús que'inga su'choma? Nane toya Galileani can'jemba tiseja conda <sup>7</sup> ma'caen Sefaccone Ji'cho A'i egae tsinconsundeccunga afeyeya'choma. Tsendeccu avuja'ccongá tise'ma fi'ttisi tres a'ta pasasi ccase qquendyaya'chone conda.

<sup>8</sup> Tsa'caen susi Jesús su'choma in'jamba <sup>9</sup> atu'ttine sombopa japa Jesúsma once shondosundeccunga conda'fa. Cca'i Jesús aindeccunga'qqe pa'ccoma conda'fa. <sup>10</sup> María Magdalena, Juana, faesu María (tsaja Santiago chan) tise'pai'ccu jacan'su pushesundeccu'qqe pa'ccoma atepa Jesúsma shondosundeccunga condase'fa. <sup>11</sup> Tsa'ma tsendeccuja pañamba “Aquia su'cho” qqen in'jamba in'jan'fambi.

<sup>12</sup> Tsa'ma Pedroja tse'faei'ccuyi jangipa buttopa atu'ttini ja. Ccarupa ppoicamba oppoen'cho sarupaveyi atte. Atepa ma'caen da'choma asi'ttaemba toequi tsaoni ji.

*Jesús tsaiqui'ye attian'cho*  
(Mr 16.12-13)

<sup>13</sup> Tsequi a'ta dos a'i Emaús canqqueni jayi'fa. Tsa canqqueja Jerusaléne once kilometro tsu. <sup>14</sup> Jayipa osha'cho voeyi tson'chone condase'je'fa. <sup>15</sup> Tsa'caen condase'je'fasi Jesúsja catsepa fae'ngae jayi. <sup>16</sup> Tsa'ma a'ija Jesúsma atte'ma tise've atesu'fambi. <sup>17</sup> Tsonsi Jesúsja tise'pama inñajampaña:

—¿Jongoesune qui condasé jayi'fa?

Tsa'caen inñajampañasi ñombi'yepa zu ccutsu'fa. <sup>18</sup> Tsa'caen zu ccutsupa fa'e, Cleofás, qqwen inisecho'cho, tisema su:

—Poiyi'cco biani can'jensundeccu tsu Jerusaléni jipa tseni voeyi tson'choma atesu'fa. ¿Queyi ti qui tsama atesumbi'choa?

<sup>19</sup> Tsonsi Jesús tise'pama su:

—¿Jongoesuma tsu tson'fa?

Tsonsi tisenga conda'fa:

—Jesús Nasarenoma tson'cho tsu. Tiseja Chiga Aya'fama afa'su. Osha'cho ñotssiave atesiamba osha'cho ñotssiave tson. Chiga tisei'ccu can'jensi poiyi'cco a'i tise've in'jan'fa. <sup>20</sup> Tsa'ma Chigama afa'su nasundeccu, ingi nasundeccu'qqe, tsa Jesúsma indipa Na'su Pilatonga afe'fa cuintsu fi'ttiye. Pilato fi'ttiye mandasi sundarondeccu tisema avuja'cconga otipa fi'tti'fa. <sup>21</sup> Ingija asi'ttaemba in'jan'fa'a tiseja israendeccuma ccushaen'su. Tsa'ma ja'ño tres a'ta tsu pasa osha'cho tsa'caen tson'fa'cho. <sup>22</sup> Toya'caen ja'ño a'ta majan ingi'su pushesundeccu ccaningae tson'choma'qqe inginga conda'fa. Ja'ño sinte'yi atu'ttini japa <sup>23</sup> Jesús ai'voma atte'fambi. Tsa'ma sefacconi'su Chigama shondosundeccuma attepa “Jesúsja tayo qqquendya” qqwen paña'fa. Tsa'caen tsu inginga conda'fa. <sup>24</sup> Majan

ingi'su tsandiendeccu'qqe atu'ttini japa pushesundeccu suqquia'caen atte'fa. Tsa'ma Jesúsma atte'fambi.

<sup>25</sup> Tsonsi Jesúsja tise'pama su:

—¡Tsoinambi'fa qui! Ñoa'me qui injama'cho shaca'fa osha'cho Chiga Aya'fama afasundeccu su'choma in'jañe.

<sup>26</sup> Nane tsendeccuja tansintsse tsu conda'fa. Cristoja toya joccapitssia've dambi'te tsu tsa'caen osha'chone vanaña'cho.

<sup>27</sup> Tsomba Moisés condase'choi'ccu ashaemba pa'cco Chiga Aya'fama afasundeccu Cristone condase'choma a'tatsse tise'panga atesian.

<sup>28</sup> Emaús canqqueni pan napijipa Jesúsja ti'tsse joccani jaya'caen jayisi <sup>29</sup> tise'ma se'pi'fa qquen supa:

—Tayo tsu sime. Coseya tsu. Ingi'ccu can'jenjan.

Tsonsi Jesúsja tise'pa tsaoni japa ca'ni. <sup>30</sup> Tise'pai'ccu mesanga dyaipa Jesúsja panma isupa Chigama iñajan. Tsomba panma doñamba tise'panga afe. <sup>31</sup> Panma afesi tse'faei'ccuyi tise'pa tso'fe fettayeququia'caen Jesúsve atepa in'jan'fa. In'jan'fasi Jesúsja atte'masiave dapa ja.

<sup>32</sup> Tsonsi tisupanaccu condasecco'fa:

—¿Injama'cho tsosipie avujatssi'fambi ti gi tiseja tsaiquina ingi'ccu condase'jesi? Nane Chiga Tevaen'jema inginga atesian'jensi gi ñoa'me avuja'fa.

<sup>33</sup> Tse'faei'ccuyi jangipa toequi Jerusaléni shanda'fa. Jipa Jesúsma once shondosundeccu faesundeccu'ccu fae'ngae can'jen'choma atte'fa. <sup>34</sup> Tsonsi Jesúsma shondosundeccuja tise'pama su'fa:

—Ñoa'me tsu Na'suja ccase qquendya. ¡Simónja tsu Tisuma attian!

<sup>35</sup> Tsonsi Emaús can'jensundeccu'qqe poiye'cconga condase'fa Jesús tise'pai'ccu tsaiqui'ye ja'choma. Toya'caen Jesús doñamba afesi in'jan'choma'qqe condase'fa.

*Shondosundecunga attian'cho**(Mt 28.16-20; Mr 16.14-18; Jn 20.19-23)*

<sup>36</sup> Tsa'caen condase'je'fa'ni Jesús tise'panga attiamba enttingenga ccutsupa su:

—Dyombe can'faja.

<sup>37</sup> Poiyi'cco dyopa can'boen'fa aya qquen in'jamba.

<sup>38</sup> Tsa'ma Jesúsja su:

—¿Micomba qui dyo'fa? ¿Micomba qui injama'choni asi'ttae'ma toya in'jan'fambi? <sup>39</sup> Ña tive, ña tsu'ttema'qqe can'faja. Ñañi gi. Ñama pporaemba can'faja. Camba qui in'jan'faya ñajan nama, tsu'ttama'qqe an'bian. Ayaja tsa'caen an'biambi.

<sup>40</sup> Qquen supa tise tive, tsu'ttema'qqe canjaen.

<sup>41</sup> Tsa'ma tsendeccuja avuja'ma toya in'jañe osha'fambi. Toya asi'ttaen'jen'fa'ni Jesúsja su:

—¿Aña'chomanda ti qui an'bian'fa?

<sup>42</sup> Tsonsi avu san'jama, tuño cuñajun'choma'qqe afesi

<sup>43</sup> isupa poiyi'cco caña'jen'ni an. <sup>44</sup> Tsomba Jesúsja tise'pama su:

—Ña toya que'i'ccu can'jeinte gi ja'ño tsoña'chone conda'a. Nane Moisés manda'cho, Chiga Aya'fama afasundeccu tevaen'jen, settapoen'cho tevaen'jen'qqe ñama tsoña'chone condase'fa. Tsa tayoe ña que'inga condase'choma tsu ja'ño tson'fa.

<sup>45</sup> Tsomba tise'pa injama'choma in'jaen cuintsu Chiga Tevaen'jema in'jan'faye. <sup>46</sup> Toya'caen tsu su:

—Tayo tsu tevaen: Ccushaen'su Cristoja vanamba papa tres a'tangae ccase qquendyaya'cho. <sup>47</sup> Toya'caen tsu tevaen: Jerusaléne ashaemba tsu Cristone ñotsse condase'choma poi ande'su aindecunga condaseya'cho cuintsu paña'faye. Pañamba tise'pa egae tsincon'choma chi'gapa Cristove in'jan'ninda tiseja a'i egae tsincon'choma joqquitssiaña. <sup>48</sup> Que'ija pa'cco vama

camba cca'indeccunga condase'faya'cho. <sup>49</sup> Ja'ño gi ña  
Yaya afeya'cho qquen su'choma que'inga afeya. Tsa'ma  
Jerusaléni ronda'je'faja sefacconi'su Chiga Qquendya'pa  
que'ima in'jaeña'ngae.

*Jesús sefacconi ansunde'cho*

*(Mr 16.19-20; Tson 1.6-11)*

<sup>50</sup> Tsomba sombopa Jesúsja tise'pama Betaniani angaji.  
Tsa'caen angajipa tise tivema sefaningae yasapa Chigama  
iñajan cuintsu Chiga tisema shondosundecuma fuiteye.  
<sup>51</sup> Toya tsa'caen iñajan'jen'ttie Jesúsja tise'pama catipa  
sefacconi ansundin ja. <sup>52</sup> Tsa'caen jasi shondosundecuja  
Jesúsne ñotsse afapa ñoa'me avujapa toequi Jerusaléni  
shanda'fa. <sup>53</sup> Poi a'ta Chiga ettini can'jemba Chigama  
ñotsse afa'je'fa.

Tsangaeyi.



Chiga Tevaen'Jema Atesuja 1, Aisheve Caña'cho  
New Testament and Genesis in Cofán (EC:con:Cofán)

copyright © 2012 Wycliffe Bible Translators, Inc.

Language: Cofán

Translation by: Wycliffe Bible Translators, Inc.

Cofán

con

Ecuador

### Copyright Information

©Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cofán

### ©Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 12 Mar 2019 from source files dated 5 Mar 2019

dac2c985-27da-5832-a781-3d6b3890f4c7